


# Awara Baibel



Genesis, Ruth, and Jonah in the Awara Language of Papua New  
Guinea

## Awara Baibel

Genesis, Ruth, and Jonah in the Awara Language of Papua New Guinea  
Buk Stat, Rut, na Jona long tokples Awara long Niugini

copyright © 2011 Wycliffe Bible Translators, Inc.

Language: Awara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-29

---

PDF generated using Haiola and XeLaTeX on 4 Mar 2019 from source files dated 29 Nov 2017  
901be67c-3025-58b6-81c0-9c823153f0ef

## Contents

Awara Bible . . . . .	1
Yakap . . . . .	2
Rut . . . . .	67
Jona . . . . .	72
Wam Yäpuli . . . . .	75

## Awara Bible

Genesis, Ruth, and Jonah in the Awara Language of Papua New Guinea

Awara Baibel long tokples Awaralong Niugini  
[awx]

Translation: © 2011, Wycliffe Bible Translators, Inc.

Web version  
2015, Wycliffe Bible Translators, Inc.  
www.Wycliffe.org

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/3.0>

Your are free to share – to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice – For any reuse or distribution, you must make clear to others the license terms of this work.

### Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

## Yakap Hängä Yakap Alakinde Wam

### *Anätutä hängäläpä pahawän yiwikin*

<sup>1</sup> Yakapde hikngä Anätutä kepkät yekäpkät yawän yiwikin. <sup>2</sup> U yawän yiwikin gwenune, kewu moyo wom yiwikut. Tiwän kupilä täkngatä yanggä gwende enetängä yiwikut. Tiwän Anätule Wawunggä yanggä unggwende enetängä kungapgut.

<sup>3</sup> Tixäwik Anätutä using yakut. “Kwakäpä täknga tingalayok,” yawän, kwakäpä täknga tingalakut. <sup>4</sup> Tiwän kwakäpä uläknganin kake, täke natäpgut. Tikengä kwakäpä täkngaxät kupilä täkngaxät matäkut. <sup>5</sup> Matäke, kwakäpäätäne umanä “kwakäpä” yang inikut. Tikengä kupilätäne umanä “kupilä” yang inikut. Tiwän täpduxu yakawu unggwenu tukwake kwakakut.

<sup>6</sup> Tiwänä Anätutä using yakut. “Yanggä matäwikge, wangga womdu yanggä bänäkängän tingalayok,” yawän, <sup>7</sup> inä u yakut using tike, uwomdä yanggä bänäkängän matäwän, yanggä käwutdu uwomde enetängä yiwän, käwutdu kematde yiwikut. <sup>8</sup> Tiwän wangga uwomu umanä “yekäp” yang inikut. Tiwän täpduxu 2 unggwenu tukwake kwakakut.

<sup>9</sup> Tiwänä Anätutä using yakut. “Yanggä yekäp gepbine yiwixaxu womdunekän täku yiwän, womdu koxolä yiwiyok,” yawän, inä u yakut using tikut. <sup>10</sup> Tiwän koxolä yiwikulu uwomu umanä “kep” yang inike, yanggä u päku yiwikulu umanä “yanggä gwen” yang inikut. Tikengä unin dayike, täke natäpgut.

<sup>11</sup> Tikengä hipdu using yakut. “Kep däkänetä songäsongä, pa, äwä nak yang alätnong. Tike salinä inäinäne alätnong,” yawän, inä u yakut using alakin. <sup>12</sup> Kep däkäne songäsongä, pa äwä nak yang doke, salinä inäinäne alakin. Tiwän unin dayike, täke natäpgut. <sup>13</sup> Tiwän täpduxu 3 unggwenu tukwake kwakakut.

<sup>14</sup> Tiwänä Anätutä using yakut. “Kwakäpä täknga äwä kupilä täknga yang tuwängutningge, kakalä gwenggwenu yekäwune alätnong. Tikengä hopä täpduk, gusit täpduk, äwä täpduxu inulung gwenggwen yangu tuwängutning. <sup>15</sup> Itä yekäwune yiwike, kep däkäle kwakäpä imining,” yäwan, inä u yakut using alakin.

<sup>16</sup> Anätutä kakalä inulungu gwenalä pahakut. Kakalänä inulung hikngä gwenu, kwakäpänele tahakut. Tikengä kakalänä mätekngä bimä gwenu, kupilänele tahake, kuminamkäyä pahakut. <sup>17-18</sup> Tikengä kep däkäle kwakäpä imike, kupilä täknga kwakäpä täknga yang matäke daying yiwitningge, yekäwune pewän yiwikin. Tikengä unin dayike, täke natäpgut. <sup>19</sup> Tiwän täpduxu 4 unggwenu tukwake kwakakut.

<sup>20</sup> Tiwänä Anätutä using yakut. “Yanggä gwenkätanu pis, hängä ulung pahanangäsä yangu meya yiwitnong. Tixawän kwäwitkäyä alake, enetängä wepmähikunong,” yang yakut. <sup>21</sup> Hängä inulung hikngä täpäläpä yanggä gwenkätanu yiwixaying äwä hängä undä ulung tahake yanggä gwenkätanu meyä yiwixaying yangu, inäinäne pahakut. Tixäwik kwäwitkäyä inäinäne undä pahakut. Tikengä unin dayike, täke natäpgut.

<sup>22</sup> Tikengä hängä u pahakulu, wam gwalängu using yämikut. “Pisu duksäng sakngälake, yanggä gwenu yiwä dopsok. Tixawän kwäwitkäyä kewune meyä sakngälät-nong,” yakut. <sup>23</sup> Tiwän täpduxu 5 unggwenu tukwake kwakakut.

<sup>24</sup> Tiwänä Anätutä using yakut. “Kälawu kep däkäne nanä inäinäne alätnong. Kälawu songäne nanä, kälawu äminsak äwä gwakgwak yangu inäinäne alätnong,” yawän, hängä inä u yakut using alakin. <sup>25</sup> Anätutä kälawu songäne nanä, kälawu äminsak, äwä gwakgwak yangu inäinäne pahake, unin dayike, täke natäpgut.

<sup>26</sup> Tikengä using yakut. “Äminu nihä bimä pahanim. Tiwän itä hängäläpä yanggäne nanä, kwäwilu enetängä nanä, kälawu songäne nanä, kälawu äminsak, äwä hängäläpä

undä kep däkäne nanä yang daying yiwitning,” yake,<sup>27</sup> Anätutä äminu inä bimä pahakut. Wäwi mängälä yangu inä hikngä bimä pahakut.

<sup>28</sup> Tikengä wam gwalängu using yämikut. “Engangu meyä dukngisol. Tiwän unetä sakngälake, kewune yiwitake kuwä dopän, hänga undä daying yiwitnong. Tike pisu yanggäne nanä, äwä kwäwilu enetängä nanä, äwä kälawu kep däkäne nanä yangge kuhiläle yiwitnong,” yang yakut.

<sup>29</sup> Tikengä hipdu using yänikut. “Katak natäpsol. Nätä naxu tämbam salin bimä,\* pa salin yangu undä naksäle daminggat. <sup>30</sup> Tiwän songäsongä undä kälap, kwäwit yanggä näningge yäminggat,” yawän inä u yakut using tikin.

<sup>31</sup> Tiwän Anätutä hängä undä u pahakulunin dayike, take hikngä natäpगत. Tiwän täpduxu 6 unggwenu tukwake kwakakut.

## 2

<sup>1</sup> Anätutä kepkät yekäpkät pahake, hängäläpä undä inäinäne nomän hikngä pepulukut.

<sup>2</sup> Tiwänä täpduxu 7 gwendä kwakawänu, puyä awahapulukutde, moyo yiwikut. <sup>3</sup> Tike täpduxu 7 gwenu wam gwaläng imike, tahawän takwän tikut, inale puyä awahapulukutde, täpduxu unggwenune, inä Anätu moyo yiwikut.

### *Anätutä ämin pahakut*

<sup>4</sup> Wamu aläknga kepkät yekäpkät yawän yiwikindäne. Anätu Yawetä\* kepkät yekäpkät pahakutkätanu, <sup>5</sup> naxu puyäne nanä kep däkäne dondopgin, inale Anätu Yawetä kep gomune hopä dolewän takut, tiwän äminu täpätu kep gomune doyiwiki, puyä dowahakut. <sup>6</sup> Tiwändeyä yanggä kewunetä akoxäwik, kep däkä tänguxawä kwikakut. <sup>7</sup> Tiwänä Anätu Yawetä kewu päke, ämin† kwätäluk, inä kwämanu käluk yiwitnangäsä taknga nomnä gwäk puyäpä, äminu uläpä käluk yiwikut.

<sup>8</sup> Tiwänä Anätu Yawetä gusitdä akonggak käwulune, Idenkätan puyä womdu pahakut. Tikengä äminu uläpä kwätälukulu une tewän yiwikut. <sup>9</sup> Tixawän Anätu Yawetä pahawän, puyä ulängäne pa kepkätandä inäinäne meyä dopgin. Pa kayitä dayipä takäningge äwä salinä alawä näningge yang pekut. Ile bänäkänkätanu pa däkälä. Däkätule salin nakengu käluk yiwitnangäsä, tiwän däkätule salin nakengu nomän bä wäyi yang natäpnangäsä pekut.

<sup>10</sup> Puyä ulängäle yanggä imikge, yanggä dupitu Idenkätandä tewän sipgut. Yanggä undupinetäkän upuke, inäinä sipmäke kukinu unekänu 4. <sup>11</sup> Yakap dupi umanä Pison. Undupi asipmäke, ku Hawilale kewune kunggak. Kewu uwomu golu käyä. <sup>12</sup> Golu uwomune nanä nomän. Tiwän uwomune pa inuxu kápängä gwälam hikngä äwä huwu gwälam hikngä umanä oniks yang yänikayingu käyä. <sup>13</sup> Yanggä käwutdu dupi umanä Gihon. Undupi asipmäke, ku Käs kep womune kunggaxunin. <sup>14</sup> Yanggä käwutdu 3 dupi umanä Taigris, Asutde gusitdä akonggak käwut sipmänggaxunin. Tiwän 4 dupi umanä Yupretis.

<sup>15</sup> Anätu Yawetä äminu uläpä puyä ulängä kang yiwikge une tekut. <sup>16</sup> Teke wamu kitokngä hikngä takngatu using inikut. “Gä pa salinu puyä alängäne nanä takekän näyo. <sup>17</sup> Tiwändeyä pa nomän bä wäyi yang natäpnangäsä däkätäne salinä manäyo, inale anakengu, täpduxu inä unggwenunekän kupiläk,” yang inikut.

<sup>18</sup> Tikengä Anätu Yawetä “Äminu inäkän yiwänu nomänundo. Ge gatäkgatäkngäle notnä täpätu tahawit,” yake, <sup>19</sup> kepdä kälawu kewune nanä äwä kwäwilu enetängä nanä pahakut yangu “Äminu uläpätä dayike umanä dasingga yäniwik?” yake, päkapgut. Tiwän itä dayike, umanä dasingga yänikulu, umanä unin. <sup>20</sup> Äminu uläpätä kälap, kwäwit

\* 1:29: Naxu tämbam salin bimä sänggum, wit, bali, rais yang. \* 2:4: Yawe yangu Anätule uman. Hibrü wamune alemgin. Tiwändeyä äpmasimu takwän yake, Täkeläpä yang inikaying. † 2:7: Hibrü wamune ‘adam’ yangu yäpuli ämin bä wäwi. Tiwän ‘adamah’ yangu yäpuli kep. Wamu uläkngayalu guläkngä usäkän bimä.

äwä hängäläpä ämindä daying yiwitnangäsä yangu umanä undä yänikut. Tike teyã gatakgtäkngäle äläwambän malikut.

<sup>21</sup> Ge Anätu Yawetä tahawän, äminu uläpä däpmunä kupsä hikngä pekut. Awexawänä, äminu uläpäle tãkãpulä tãpätu tãkengä, hipdu gupnätã tahang umukut. <sup>22</sup> Tikengä mängälä tãpã äminu uläpäle tãkãpulä tãkutdã kwätãlukut. Tikengä mängälä uläpä wãwi uläpätã käwikge tãkapgut.

<sup>23</sup> Tãkapän kakulãkaxãwik using yakut. “Ile kwätãnu nãle kwätãn, tiwãn ile guwu nãle gup. Äminu uläpä wãwile tãngãnetã kwätãlukut. Ge umanä ‘mängälä,’”<sup>†</sup> yang yakut. <sup>24</sup> Ge ile tiwãn, wãwi nanãmingã peke, mängãtnãxãt unekãn gatãke yiwã, gupnã bulãkãnu dãkngãkaying.

<sup>25</sup> Wãwi uläpãxãt mängãtnãxãlu belum yiwixãwik geyã, domãyãkãkumãläk.

### 3

#### *Äminu uläpãyatdã Anãtule wam upukumãläk*

<sup>1</sup> Anätu Yawetã hãngã dakngã käyã pahakutkãtanu, gomoxu äminu kem yãnikãxãluwikge nomãn hikngã. Ge mängälä tãpã yawãnyaxu using inikut. “Anãtutã ‘Pa salinu puyã alãngãne nanã manahol,’ yangu hiyãkãnde hikngã danikut?” yang inikut.

<sup>2</sup> Iniwãn mängälä tãpätã using inikut. “Pa salinu alãngãne nanã tãke nahim. <sup>3</sup> Tiwãndeyã Anãtutã using ninikut. ‘Pa puyã bãnakãn nanã dãkãle salinu manahol. Tike kãtakgaxãyã malahol. Using tahakengu axumsimãläk,’ yang ninikut,” yang inikut.

<sup>4</sup> Yawãn gomokgã inikut. “Doxumsimãläk. <sup>5</sup> Anätu using natãpgut. ‘Unin nakengu, kayi kakalã tining. Tiwãn nina bimã dãkngake, nomãn bã wãyi yang natãpsimãläk,’ yang natake usingu ile danikut,” yang inikut.

<sup>6</sup> Mängälä tãpätã pa undãkãle salinu kayitã dayipãn, nomãn tiwã, nãnangãsã tikin. Tiwãn unin napãn, natãdetdetnã käyã tiwikge natãpgut. Ge unin pãke naxãwik, kãwutdu ayãle imãn nakut. <sup>7</sup> Unin napãt, natãdetdetnã kakalawã, “Belum yiwixamãk,” yang natãpgumãläk. Tikengã pa “fixu” dãkãtule tãm pãke, gupnã wamãng umukumãläk.

<sup>8</sup> Tukwatde kewu axwikaxawãn, wãwi tãpã äwã mängãtnã yanggã natãxawãlu, Anätu Yawe puyã tãngãne apuhiwãn kake, pa yãpuli dãkãndãkãxãtan kohopikumãläk. <sup>9</sup> Tiwãndeyã Anätu Yawetã wãwi tãpã using inikut. “Adam, gã sandan?” yawãn, <sup>10</sup> using yakut. “Puyãxãtan apuhiwi kake, nã belum yiwitde ãnaxãlake kohoppinggat,” yakut.

<sup>11</sup> Yawãn Anãtutã inikut. “Gã belum yangu imindã ganik? Pa salinu donãpilãkge ganikumu imindã ganiwãn nalãk?” yawãn, <sup>12</sup> Adamdã “Mängälä nãxãtde tekulãxu alãpätã pa salinu notnã anãmãn nat,” yang inikut.

<sup>13</sup> Tiwãn Anätu Yawetã mängälä uläpä “Ulãknga inale tahalãk?” yang iniwãn, mängälãtã “Gomokgã kem naniwãn nat,” yakut.

<sup>14</sup> Yawãnã Anätu Yawetã gomoxu using inikut. “Ulãknga tahalãkge, tokngã wam yãwa, gã gikakãn tokngã dãkã pãpilãk. Tike kãlawu äminsak äwã songãne nanã yangu tokngã dowãning. Gã tãpduktãpduki yiwilãxu, kep dãkãne muhipdatã pengwãhake tihikuxawi, muluwu mapdaxãtan kopning. <sup>15</sup> Tiwãn nãtã pahawa, gãxãt mängälä tãpãxãt iwaliwalnã dãkngahimãläk. Tiwãn gãle bapuka mängälä tãpãle bapunã yangkãyã usãkãn yiwitãke kuning. Tiwãn ile bapunãtã kuhitda yayiwã, gãtã bãlãngãne yãhawilãk,” yang inikut.

<sup>16</sup> Inikengã mängälä tãpã using inikut. “Engangga tãngãkane kaya tiwãnu, meyã dãkã gamit. Tiwãn tokngãmbam pãxãwik, engangu dukngiwilãk. Tike teyã apdale natãnggãmãtawi, itã kuhitdale yiwik,” yang inikut.

<sup>17</sup> Inikengã, wãwi uläpä using inikut. “Mängãtdale wam gwãlamike, pa salinu donãpilãkge kitokngã ganikumu nalãk. Ge gãle tiwãn, tokngã wam yãwa, kep dãkã maliwik. Ge tãpduki tãpduxu yiwilãxu, tokngãmbam pãxãwik, kep dãkã yamãpuke, puyã pahawilãk. <sup>18</sup> Tiwãn unetãkãnu kep dãkãne songãsongã pãlangãnã käyã doke bupning. Tiwãn kwätãl pahakengã, naxu puyãne nanã napilãk. <sup>19</sup> Puyã mepgãmãn bulak

<sup>†</sup> 2:23: Hibrũ wãmune ‘wãwi’ äwã ‘mängälã’ yangu gulãkngã usãkãn bimã.

pahawiyä, naxu alawä napiläk. Usinggän pahahika, hipduka kewune kuwiläk, inale gä unetä alakuläk. Gä kepdä kwätalukum. Ge hipduka kep däkäne kuwiläk,” yang inikut.

<sup>20</sup> Adamdä mängätnä “Äminbamu käluk yiwitning täpäläpale apekngä däkngawik,” yake, umanä Iv\* yang inikut.

<sup>21</sup> Anätu Yawetä täwixu kälap gupdä Adamkät Ivkätde pahake yämikut. <sup>22</sup> Tikengä using yakut. “Wäwi aläpä nihä bimä andäkngake, nomän bä wäyi yangu anatäxak. Ge pa käluk yiwitnangäsä däkätäne salinä nake, käluxu iwikge yiwiyäk” yake, <sup>23</sup> puyä Idenkätanu ulängänetä täwakut. “Anätu Yawetä äminu uläpä kepdä kwätalukum. Ge äminu uläpä kewu undäkäne yamäpuke pahawik,” yake, <sup>24</sup> täwambän epuxukut. Tiwän puyä ulängä gusitdä akonggak käwutkätan, ängela kerup yang yänikaying täpäläpaxät gwäwäyä täpätuxät pewän kang yiwikin. Keruwu uläpäläpä kitokngänä kayä. Tiwän gwäwäyä uläpäne, däki ayähakoxawä kungapgut. Anätutä unin pewän, itä pa käluk yiwitnangäsä däkäle kahilu kang yiwikin.

#### 4

##### *Ken Abel yangge wam*

<sup>1</sup> Adamu mängätnä Ivkät yiwikumäläk. Tiwän tängene käyä tiwänä, wawakngä täpätu dukngikut. Tikengä “Yawetä gatängamän, wäwi täpätu kake tät,” yake, umanä Ken\* yang inikut. <sup>2</sup> Tikengä yiwitake kuhika, Kende ulawu, Abel, dukngikut. Uläpalyu inulung täpäyat tike, Abelu sipsip daying yiwixawän, Kenu nak puyä pahakakut.

<sup>3</sup> Gwendune Kendä naxu puyäne nanä päke, Yawele ofa tahakut. <sup>4</sup> Tixawän Abelu sipsip mätexu yakap pekin gwengwenu ofale päkut. Tikengä sipsip mätexu sipmäke matäke, gwaxu nomängän tahakut, ofanän. Unin imän, Yawetä Abelkät ofanäxätde täke natäpgut. <sup>5</sup> Tike Kenkät ofanäxätde mähe natäpgut. Ile tiwän Kenu tokngä hikngä natäpän, nomnä malikin.

<sup>6</sup> Tiwän Yawetä Kenu using inikut. “Tokngä inale natäxaläk? Nomda inale malikaying? <sup>7</sup> Nomän täknga tahawi gandupa, täke tiwik yangu donatäläk? Tike nomänu dolahawi, wäyi täknga angguwikge yämäkane yiwixak. Kuhitdale yiwikge natänggämatanggak. Tiwändeyä gäta yapmike, ile kuhiläle yiwike, wäyi täknga mawahayo,” yang inikut.

<sup>8</sup> Tiwänä Kendä ulapnä iniwän, songäxätan kukumäläk. Täku une tänguwän kungut.

<sup>9</sup> Tiwänä Yawetä Kenu using inikut. “Ulapda Abelu sandan?” yang iniwän, Kendä using inikut. “Doxat. Inale naninggaläk? Nä ile kula tahanggalunin?” yang inikut.

<sup>10</sup> Tiwän Yawetä using inikut. “Wäyi uläknga inale tahaläk? Natäpso. Ulapdale daxu kepkätandä kwänämu näle tiggak. <sup>11</sup> Gätä notda tänguwi kupän, ile daxu kepkätan kuying. Ge tokngä wam yake, kewu awomunetä gäwämba kuwiläk. <sup>12</sup> Ku kewune puyä pahawi, naxu doalätning. Tiwän gä yotda wenä tiwän, kep gomune täwake tihikuwiläk,” yang inikut.

<sup>13</sup> Tiwän Kendä yakut. “Meyä namiläxu inulung hikngä. Nätä pänangäsändo. <sup>14</sup> Kewu awomunetä gäle nomune doyiwitde anäwaxaläk. Yotna wenä tiwän, kep gomune täwake tihikuwa, imindäka nandukengu, anuwän kupit,” yang yakut.

<sup>15</sup> Yawän Yawetä inikut. “Äminu täpätutä guwän kupi, meyä gäle gamilu ayapmike, meyä 7 inulung äminu uläpätä päpik,” yang inikut. Tikengä “Ämindä kake, tänguwä kumsäk,” yake, Kenu tuwäng tengämikut.

<sup>16</sup> Tiwän Kenu Yawe äwä kewu Idenu uwom yang peke, gusitdä akonggak käwutkätan kewu womdu, umanä “Tihikutihikuk” uwomune päku yiwikut.

<sup>17</sup> Tikengä mängätnäxät yiwihika, mängätnä tängene käyä tiwän, wawakngä Enok dukngikut. Tiwän Kendä yolu gäpanggu tahake, unggäpangu Enok yang inikut.

<sup>18</sup> Tiwänä yiwitake kuhika, Enokgä wawakngä Irat towimbänä, Iratdä Mehujael towimbänä, Mehujaeldä Metusael towimbänä, Metusældä Lamek towikut.

\* 3:20: Hibru wamune ‘Iv’ yangu yäpuli käluk yiwitnangäsä täknga. \* 4:1: Hibru wamune ‘Ken’ äwä ‘alät’ yangu guläkngä usäkän bimä.



<sup>19</sup> Tiwänä Lamexu mängätnä täpöyalä päkut. Täpätu umanä Ada, tiwän täpätu Sila.  
<sup>20</sup> Ada Jabal dukngikut. Tiwänä Jabalde bapunä mahande alakindä selyot päku kewu womduwomdu tapike yiwixäwik, kälawu äminsak towikakin. <sup>21</sup> Jabalde ulawu umanä Jubal. Tiwänä Jubalde bapunä mahande alakindä gita sipmäxäwik, pipip puyäkakin.  
<sup>22</sup> Silaxäyā wawakngä dukngikut. Umanä Tubal-Ken. Itä hängä puyä pahanangäsa bä amäk pahanangäsa yangu ain äwä kapa yanggä pahakut. Tiwän haminäle umanu Nama.  
<sup>23</sup> Gwendune Lamekgä mängätnä using yänikut.  
 “Adaxät Silaxät, natäxasol.  
 Mängätna, wamu nätä yäwa, mäläk pähol.  
 Äminu täpätutä dak nuwänu, nätä äminu uläpä alänguwa kupik.  
 Tike wawakdäkä täpätutä nä nuwänu, ixäyā kupsäle tänguwit.  
<sup>24</sup> Äminu täpätutä Ken tängukengu, meyä 7 inulung päpik.  
 Tiwändeyä äminu täpätu nä nukengu, meyä Kendäne ayapmike, inulung hikngä 77 päpik,” yang yänikut.  
<sup>25</sup> Adamu mängätnäxät hipdu yiwikumäläk. Tiwänä mängätnätä wawakngä täpätu dukngike, “Kendä Abel tänguwän kumgutde, Anätutä engangu Abelde tangge namik,” yake, umanä Set† yang inikut. <sup>26</sup> Tiwänä yiwitake kuhika, Selu wawakngä towike, umanä Enos yang inikut. Täpduxu unggwenggwenkätanu ämindä tumuxu Yawele käluk yakin.

## 5

*Adamde bapunämbam*

<sup>1</sup> Wamu aläknga Adamde bapunä yiwitäkapgindäne temginunin. Anätutä ämin pahakengu, inä bimä pahakut. <sup>2</sup> U pahakulu wäwi, mängälä yang pahake, bänip kwikwik yämikut. Tikenga umanä “ämin” yang yänikut.  
<sup>3</sup> Tiwän Adamu krismanä 130 yiwikengä, wawakngä inä hikngä bimä towikut. Towikengä umanä Set yang inikut. <sup>4</sup> Tikengä krismasu 800 yiwixäwixu, wawak yäpanä towikut. <sup>5</sup> Unekänu krismanä 930 yiwike kumgut.  
<sup>6</sup> Tiwän Selu krismanä 105 yiwikengä, Enosde nanä däkngakut. <sup>7</sup> Tikengä krismasu 807 yiwixäwixu, wawak yäpanä towikut. <sup>8</sup> Unekänu krismanä 912 yiwike kumgut.  
<sup>9</sup> Tiwän Enosu Krismanä 90 yiwikengä, Kenande nanä däkngakut. <sup>10</sup> Tikengä krismasu 815 yiwixäwixu, wawak yäpanä towikut. <sup>11</sup> Unekänu krismanä 905 yiwike kumgut.  
<sup>12</sup> Tiwän Kenanu krismanä 70 yiwikengä, Mahalalelde nanä däkngakut. <sup>13</sup> Tikengä krismasu 840 yiwixäwixu, wawak yäpanä towikut. <sup>14</sup> Unekänu krismanä 910 yiwike kumgut.  
<sup>15</sup> Tiwän Mahalalelu krismanä 65 yiwikengä, Jaretde nanä däkngakut. <sup>16</sup> Tikengä krismasu 830 yiwixäwixu, wawak yäpanä towikut. <sup>17</sup> Unekänu krismanä 895 yiwike kumgut.  
<sup>18</sup> Tiwän Jarelu krismanä 162 yiwikengä, Enokge nanä däkngakut. <sup>19</sup> Tikengä krismasu 800 yiwixäwixu, wawak yäpanä towikut. <sup>20</sup> Unekänu krismanä 962 yiwike kumgut.  
<sup>21</sup> Tiwän Enoxu krismanä 65 yiwikengä, Metuselale nanä däkngakut. <sup>22</sup> Tikengä Anätuxät gatäke yiwikumäläxu, krismasu 300 yiwikut. Yiwixäwixu, wawak yäpanä une towikut. <sup>23</sup> Unekänu krismanä 365 yiwikut. <sup>24</sup> Tiwänä Anätuxät gatäke yiwike, Anätutä tükut. Tiwän doxakin.  
<sup>25</sup> Tiwän Metusela krismanä 187 yiwikengä, Lamekge nanä däkngakut. <sup>26</sup> Tikengä krismasu 782 yiwixäwixu, wawak yäpanä towikut. <sup>27</sup> Unekänu krismanä 969 yiwike kumgut.  
<sup>28</sup> Tiwän Lamexu krismanä 182 yiwikengä, wawakngä towikut. <sup>29</sup> Dungikengä, using yakut. “Yawetä tokngä wam yake, kep tahawän malikutde, puyä kitokngä pahake, meyä päkamäng. Tiwändeyä mahande engangu aläpätä yiwitäkaxu äpme nimik,” yang yake

† 4:25: Hibrü wamune ‘Set’ äwä ‘anamik’ yangu guläkngä usäkän bimä.

umanä Noa\* yang inikut. <sup>30</sup> Tikengä krismasu 595 yiwixäwixu, wawak yäpanä towikut. <sup>31</sup> Unekänu krismasnä 777 yiwike kumgut.

<sup>32</sup> Tiwän Noa krismasnä 500 yiwikengä, Sem, Ham, Jafet yangge nanä däknagakut.

## 6

### *Äminu yiwiyiwikngä gutongä yiwikin*

<sup>1</sup> Äminu kewune yupsänggän sakngälaxäwik, yäpanä dukngikin. <sup>2</sup> Tixawän Anätule wawak täpäläpätä äminde yäpa dayipä, gwälam hikngä tixawä, daying butaxäwik, mängätnäle päkin. <sup>3</sup> Tiwän Yawetä using yakut. “Äminu kitokngänä wenä. Ge käluk iwikiwixu dowewa yiwitning, kewunen. Tike krismasu 120-kän yiwixäwik kumning,” yang yakut.

<sup>4</sup> Tiwän täpduxu uwomkätan äwä mahande yiwikin yangu Anätule wawakgä äminde yäpa päpä, ixät yiwike, engangä dukngikinu äminu äyapmike, inulung hikngä täpäläpä tākake, kitokngänä käyā tikin. Tiwän umanä käyā tikin.

<sup>5</sup> Tiwän Yawetä dayipänu, äminbamu yiwiyiwikngä kekem hikngä tiwän, bāniyāne wāyi pahaninggekän natānggāmätakin. <sup>6</sup> Tiwän äminu kewune pahakutde, meyā hikngä natāpgut. <sup>7</sup> Natāke yakut. “Äminu pahakumde, meyā natāxat. Ge äminu undä pahawa hopining. Hängä kewune yiwixaying äwä awepmāke tihikukaying yangu awahawa hopining,” yang yakut. <sup>8</sup> Tiwändeyä Noale bānip gwaläng natāpgut.

<sup>9</sup> Noale wam. Noa äminomän täpä. Äminu kewu anggomune yiwikinkätanu Anätule kayine Noatakän gutongänä wenä yiwikut, inale Anätuxät gatāke yiwikumäläk. <sup>10</sup> Noale wawaxu täpāyalä täpātu. Umanä Sem, Ham, Jafet yang.

<sup>11</sup> Anätule kayine äminbamu notnä sipmāxäwik, wāyi hikngä yiwixakin. <sup>12</sup> Tiwän Anätutä dayipänu, kewune nanä äminu gutongä hikngä yiwikin. <sup>13</sup> Tinggawän Anätutä Noa using inikut. “Äminbamu äminsipmāk tāknga tahake yiwixaying. Ge hängä undä käluk yiwixayingu awahawa hopining. Hängä undä äwä kep gom yang pahawa hopining.

<sup>14</sup> “Ge gä siwu gwendu pa nomän päke tahayo. Tikengä okopixätanu ämindä yiwitningge äwä kälapdä yiwitningge, inäinä matāke peyo. Tikengä yanggätä kopnäng yakengu, okopi käwut kepmän käwut yangu koltatä pahayo.

<sup>15</sup> “Sip gwenu using tahayo. Belakngänä 140 mita, kwalangänä 23 mita, tiwän dāmnä 13.5 mita tahayo. <sup>16</sup> Tiwänä nomnäne gänangä mätekngä hap mita tewi kungapsok. Tiwän yolu gwenalä gwendu pahayo; yāpuline gwendu, bānäkānu gwendu, äwä nomnäne gwendu yang. Tikengä yāmā dākā teyo.

<sup>17</sup> “Nätä yanggä inulung tewa, kewu anggomu yiwikdoke pānguhiwik. Tiwän hängä kewune nanä käluk yiwixayingu undä pahawa hopining. Tiwän hängä undä käluk yiwixayingu axumning.

<sup>18</sup> “Tiwändeyä nätä kontraknga gāle tahawa, sip gwenune kopiläk. Gä, wawakga, ile mängätnä, äwä gika mängät yang kopning. <sup>19</sup> Gikaxät käluk yiwitningge, hängä haxalike tihikuke yiwixayingu ayä mängätnä yang päko peyo. <sup>20</sup> Hängä kewune tihikukaying, awepmāke tihikukaying yangu ayä mängätnä yang gāle apning, käluk yiwitninggen. <sup>21</sup> Ge naxu gika äwä hängä ulākwāk yanggä nāningge, inäinäne peyo,” yang inikut.

<sup>22</sup> Tiwän Noa Anätutä yakut using tawake pahakut.

## 7

### *Kewu anggwenu yanggätäkän yiwikdoke pānguhikut*

<sup>1</sup> Täpdukngätä apän, Yawetä Noa inikut. “Äminu ayiwixayingkätanu, nätä gandupa, äminomānu gākän. Ge gin yānggwālu undä sip gwenkätan kopnong. <sup>2-3</sup> Gwaxu nomānu\* inäinä, äwä kwāwilu inäinä, mängälä 7, wāwi 7 yang päyo. Tikengu gwaxu nomānundo täpäläpä, mängälä gwendu, wāwi gwendu yanggän pätake kuyo. Ge

\* 5:29: Hibru wamune ‘Noa’ äwä ‘yiwitākak’ yangu gulākngä usākän bimä. \* 7:2-3: Gwaxu Anätule kayine nomānu, ofāle bā anananggengu tāke.

uläkwäkgäyā kewune sakngälawik. <sup>4</sup> Anggwenunetä täpduxu 7 yiwikengä, hopä tewa, kwakäpäne kupiläne yang takuhixawän, ku täpduxu 40 apuxuwik. Tiwän hängäläpä kewu anggomune nina pekumu, undä pahawa hopining,” yang inikut. <sup>5</sup> Tiwän Yawetä u yakut using tawake pahakut.

<sup>6</sup> Noa krismasnä 600 yiwixawän, yanggätä kep gomu yiwikdoke pänguhikut. <sup>7</sup> Noa, mängätinä, wawakngä, äwä wawakngäle mängät yang, “Yanggätä nihipsäk,” yake, sip gwenune kopgin. <sup>8</sup> Gwaxu nomän, gwaxu nomänundo, äwä kwäwit yangu ayä mängätinä yang <sup>9</sup> sip gwenune kopgin, Anätutä Noa inikut using. <sup>10</sup> Täpduxu Anätutä yakut using 7 gwendä apän, yanggä une sipgin.

<sup>11</sup> Noa krismasnä 600 tixawän, yekäwu 2 gwende täpduxu 17 gwenune kep gomu gänanggänangäkän tixawä, yanggä undandä akopgin. Tixawän yekäpde yämäxäyā wangga tixawä, <sup>12</sup> hopä takuhixawän, ku täpduxu 40 apuxukut.

<sup>13</sup> Inä täpduxu unggwenunekänu, Noa, mängätinä, wawakngä äwä wawakngä uläk-wäke mängät yang siwune kopgin. <sup>14</sup> Tiwän hängä kewune alihikuke yiwixaying, awepmäke tihikukaying, inulung, mätekngä yang undä kopgin. <sup>15</sup> Hängä undä mepme pexayingu gwenälänänäxäyā apä, sipkätan Noaxät using kopgin. <sup>16</sup> Anätutä Noa inikut using, hängä undä u kopginu, mängätinä ayä yang kopgin. Tiwänä Yawetä yämä däkä tahakuhikut.

<sup>17</sup> Tiwänä yanggä kepkätandä akoxawä, hopä alakuhixawän, täpduxu 40 apuxukut. Yanggätä yiwikdoke, sip gwenu enen hikngä tängenakut. <sup>18</sup> Yanggätä inulung hikngä yiwitexäwik, sip gwenu täpän tayikut. <sup>19</sup> Tiwän unetäkän yanggä inulung hikngä yiwitexäwik, täwalu belakngä däkändäkä undä pänguhikut. <sup>20</sup> Pänguhike, täwalu 7 mita ko yapmikut.

<sup>21</sup> Tikengä hängä kewune tihikukaying, kwäwit, hängä inulung, mätekngä äwä ämin yangu undä pänguhiwän kumgin. <sup>22</sup> Hängä täpä mepme pexäwik, kep däkäne tihikuke yiwixayingu, undä hikngä kumgin. <sup>23</sup> Tiwän hängäläpä kep däkäne nanä undä pahawän hopikin. Tike Noaxät siwune yiwikindäkän käluxu yiwikin.

<sup>24</sup> Tiwän yanggä ayiwikut täkngane using yiwixawän, ku täpduxu 150 apgut.

## 8

### *Yanggä gwenu yiwikulu aleke pukukut*

<sup>1</sup> Tixawän Anätutä Noa äwä hängäläpä ixät sipkätan yiwikinde natäke, kwämanu tewän puyäpän, yanggä teke pukukut. <sup>2</sup> Tiwän kep gomu gänanggänangä tiwä, yanggä akopginu gwätinakin. Tixawän yekäpde yämäxäyā wangga tikinu apu umumbä, hopä däkngakut. <sup>3</sup> Yanggä wepdäwepdä teke pukuxawängän, täpduxu 150 apgut. <sup>4</sup> Tiwän yekäwu 7 gwende täpduxu 17 gwenune siwu täku, täwalu Alalatkätanu däkätune yiwikut. <sup>5</sup> Tixawän yanggä hipdu teke pukuxawän, yekäwu 10 gwende täpduxu 1 gwenune täwalde nomnä alanggämän tikin.

<sup>6</sup> Ge täpduxu 40 apänä, Noa sipde windua sike, <sup>7</sup> kápamu gwendu\* tatewän kungu, yanggä doleke pukukutnä kake, enetängä wepmähikuxawän, yanggä gwenu teke pukukut.

<sup>8</sup> Tiwän Noa yiwän maliwän, yanggä ambä teke pukuk yake, kombunanangu gwendu tatewän, wepmäke kukut. <sup>9</sup> Yanggätäkän yiwikutde, kombunanangu unggwenu ayiwit-nangäsä wenä tiwän kake, hipdu wepmäke apän, tätektut.

<sup>10</sup> Tikengä täpduxu 7 yiwike, kombunanangu unggwenu hipdu tatewän kukut. <sup>11</sup> Ku tihikuhika tukwatdeyā, pa “oliwu” däkätule tämu käluxu handu mayätä ihinggänggänuke, täkapän kakut. Unin kakengä, Noa “Yanggä gwenu aleke pukukngä tinggak,” yangu natäpgut.

<sup>12</sup> Tikengä hipdu täpduxu 7 yiwike, kombunanangu tatewän kukengu, doapgut.

\* 8:7: Kwäwilu kápam bimä, kwayit wamune kotkot yang yänikaying.

<sup>13</sup> Noa krismasnä 601 tixawän, yekäwu 1 gwende täpduxu 1 gwenune yanggä gwenu teke pukukut. Tiwän sip gwen tahangumukulunin wäsike, unetä kewu koxolä bimä alikutnä kakut. <sup>14</sup> Tixawänä yekäwu 2 gwende täpduxu 27 gwenune kep gomu koxolä hikngä tikut.

<sup>15</sup> Tiwän koxotawänä, Anätutä Noa inikut. <sup>16</sup> “Gika, mängätäda, wawakga, äwä wawakgale mängät yangu teke epuxuxut, sip gwenun. <sup>17</sup> Hängä undä gäxät yiwixayingu, kewune sakngälake yiwitake kuwä dopikge, päke epuxuyo,” yang inikut.

<sup>18</sup> Tiwän Noa, mängätinä, wawakngä, äwä wawakngäle mängät yangu siwu teke epuxukin. <sup>19</sup> Tixawän kälap, kwäwit, gwakgwak, undä uläpäläpähimkäyä teke epuxukin.

<sup>20</sup> Tiwän Noatä alta tahake, gwaxu nomän äwä kwäwilu nomän yangu gwendu gwendu päke sipmäke, däkine Yawele hakut. <sup>21</sup> Häwän, Yawetä ile kápängu gwälam tiwän natäke, bäniyäne using natäpगत. “Äpmanu ämindä yiwikmaliwä, kewu andäka tokngä wamu hipdu dohikngä yake tahawa maliwik. Engangunetä äminbamu wäyi täkngäläknga pahaninggekän natänggämätäkaying. Tiwändeyä mahande u pahawa malikin usingu, hängäläpä undä käluk yiwixayingu dowahawa malining. <sup>22</sup> Ge unin. Kewu anggomu using yiwixawängän, puyä däändän, bulä nak pänangäsä däändän, o gusit däändän, hopä däändän, kwakäpä bä kupilä yanggäkän apukaning,” yang yakut, Yawetän.

## 9

### *Anätutä kontraxu Noale tahakut*

<sup>1</sup> Anätutä Noa, wawakngä yangu wam gwalängu using yämikut. “Ginu engangu meyä dukngitnong. Tiwän unetä sakngälake, kewune yiwitake kuwä dopsok. <sup>2</sup> Tiwän kälawu undä kep däkäne nanä, kwäwilu enetängä nanä, äwä pisu yanggäne nanä yangu ginde kätaxune pexat. Ge gindä kuhiläle yiwä, itä dandung naxälatning.

<sup>3</sup> “Naxu puyäne nanä tupä damikum usinggän, kälapkäyä using näningge daminggat. <sup>4</sup> Tiwändeyä gwaxu dakngäxälu manänong, inale käluk yiwitnangäsä täknga daxune yiwixak. <sup>5</sup> Tike äminu täpätutä ämin notnä tänguwän kupänu, yäkwäle ile dakge nätä tokngä däkä imit. Tike kälawu täpätutä äminu täpätu tänguwän kupänu, ixäyä kupsäle tänguwit, <sup>6</sup> inale Anätutä äminu inä bimä pahakut. Ge imindäka äminu täpätu tänguwän kupänu, äminu uläpä ämin notnätä tänguwä kupik.

<sup>7</sup> “Ginu, engangu meyä dukngitnong. Tiwän kewune äminu meyä yiwitning,” yang yänikut.

<sup>8</sup> Tikengä Anätutä Noa wawakngä yangu hipdu using yänikut. <sup>9-10</sup> “Nätä kontraknga gin, bapuhä mahande yiwitning, hängä undä ginkät yiwike siwunetä epuxuying, äwä kewune nanä undä mahande yiwitning yangge tahanggat. <sup>11</sup> Kontraknga using tahanggat. Hipdu hängä käluk yiwixayingu undä yanggätä doyäwa pahawän hopining. Tiwän kewu anggompkäyä yanggätä doyäwa tahawän maliwik,” yang yänikut.

<sup>12</sup> Yänike, unetäkänu using yänikut. “Kontraxu gin äwä hängäläpä käluk yiwixaying yangge tahake, tuwängu täkngatu textat. Ge kontraxu aläknga iwikge yiwixäwik. <sup>13</sup> Kontraxu kewune nanäle tahanggalu uläkngale tuwängge, sawilakwäna mingädäkäne textat. <sup>14</sup> Yekawune mingändäkä pewa umumbä, sawilakwändä une alawänu, <sup>15</sup> kontrakngale natäpit. Tikengä hängäläpä käluk yiwixayingu undä yanggätä hipdu dowahawa malining. <sup>16</sup> Sawilakwänu mingändäkäne alawän kakengu, kontraxu iwikiwik yiwikge, ginu kep däkäne nanä undäle tahanggalu uläkngale natäpit. <sup>17</sup> Kontraxu kep däkäne nanä undäle tahat täkngale tuwängu uläknga textat,” yang yänikut.

### *Noaxät wawakngäxät*

<sup>18</sup> Noale wawaxu siwunetä epuxukinu, Sem, Ham, Jafet yang. Tiwänä Hamu wawakngä täpätu umanä Kenan. <sup>19</sup> Noale wawaxu aläkwäkgä äminu undä kep däkäne yiwixayingge bapunä däkngakin.

<sup>20</sup> Noa nak puyä pahakakut. Pahake yakapde itä wain puyä pahakut. <sup>21</sup> Gwendune Noa wain tängoke datdawuke, täwikngä päpän epä, selyotnäne belum pekut. <sup>22</sup> Tixawän Hamu Kenande nanä, selyolune ko, nanä belum pekgawän kake, epuxu notnä täpâyalu yänikut. <sup>23</sup> Yäniwän Semkät Jafetkätdä täwixu kwämbätdu take, gwälamnäne mehe käwut mapät epgut. “Nanit kähäm,” yake, mahatä täko, nanä omikngämikumäläk.

<sup>24</sup> Noa andatdawukulu wenä tiwä enake, wawakngä wasekngä täpätä u tahakulunin natäke, using inikut. <sup>25</sup> “Kenanu tokngä däkä päpik. Notnäle gepbine yiwixäwik, ile puyä däkä pahangyämik,” yang inike, <sup>26</sup> unetäkänu using yakut. “Yawe, Semde Anätunä, ile uman yatängenatnim. Tiwän Kenanu Semde gepbine yiwixäwik, ile puyä däkä pahangämik. <sup>27</sup> Anätutä tahawän, Jafelu bapunä meyä tiwä, kewune yiwitake kuning. Tiwän Jafetde bapunäxät Semde bapunäxälu unekän gatäke yiwitning. Tiwändeyä Kenanu Jafetde gepbine yiwixäwik, ile puyä däkäxäyä pahangämik,” yang yakut, Noatän.

<sup>28</sup> Yanggä gwendä yiwikdoke pänguhiwän, Noa krismasu 350 yiwikut. <sup>29</sup> Unekänu krismasnä 950 yiwike kungut.

## 10

### *Noale wawakge bapunämbam*

<sup>1</sup> Kewu yanggätä yiwikdoke pänguhiwän, Noale wawaxu Sem, Ham äwä Jafet yanggä wawakngä towikindäne.

### *Jafetde bapunämbam*

<sup>2</sup> Jafetde wawaxu umanä Gomer, Magok, Madai, Jawan, Tubal, Mesek, äwä Tiras yang.

<sup>3</sup> Tiwänä Gomerde wawaxu umanä Askenas, Ripat, äwä Togama yang.

<sup>4</sup> Tiwän Jawande wawaxu umanä Elisa, Tasis, äminu Saiprus nanä, äwä Dodan nanä yang. <sup>5</sup> Unetä sakngälawän uhike, yanggä kwayimune päku, bapunäne, wamnäne ku kepnä päxäwik, kantrinä inäinä yiwikin.

### *Hamde bapunämbam*

<sup>6</sup> Tiwän Hamde wawaxu umanä Kus, Isip, Libia, äwä Kenan yang.

<sup>7</sup> Tiwänä Kusde wawaxu umanä Seba, Hawila, Sapta, Rama, äwä Sapteka yang. Tiwänä Ramale wawaxu umanä Seba äwä Dedan yang.

<sup>8</sup> Inä Kusde wawakgänu täpätu umanä Nimrot. Uläpä kitokngänä inulung tiwän, yolu gäpangguvine nanä äminu axu sipmäxäwik, kuhiläle yiwikut. <sup>9</sup> Yawetä Nimrotde natdetdelu nomän imän, kälawu buläkän sipmäkakut. Ile tiwän using yäkaying. “Yawele kayine äminu uläpä Nimrotdä bimä nomän sipmänggak,” yangun. <sup>10</sup> Yolu yakapde pahake yiwikut gäpanggäpangu umanä Babilon, Ere, Akat äwä Kalne yang.\* Yolu unggapanggäpangu Babiloniale kewunekän yiwixakin. <sup>11</sup> Nimrotdä Babiloniale kep teke, ku Asiriale kewune taunu inulungu gäpangguyi pahakut. Umanä Niniwe, Rehobotir, Kala, <sup>12</sup> äwä Resen yang. Resenu Niniwe äwä Kala yolu inulung hikngä unggäpangatde bänäkängän yiwixakut.

<sup>13-14</sup> Isiwu äminu Lidia nanä, Anam nanä, Lehap nanä, Naptu nanä, Patrus nanä, Kaslu nanä, äwä Krit nanä yangge bapunä däkngakut. Filistia nanä Kaslutä towimbän, unetä sakngälakut, äminu unin.

<sup>15-18</sup> Saidonu Kenande wawaxu yakap täpänin. Tiwän Kenanu Hit nanä, Jebus nanä, Amor nanä, Girgas nanä, Hiwi nanä, Arka nanä, Sini nanä, Arwat nanä, Semar nanä, äwä Hamat nanä yangge bapunä däkngakut. Kenan nanä unetä sakngälake, päku yolu inäinä yiwitake kukin.

<sup>19</sup> Tiwän Kenande kewu using päkin. Saidondä ku taun Gerar ku Gasa kukut. Tiwän unetä täpän täkwämbän, gusitdä akonggak käwut ku, taun Sodom, Gomora, Atma, Seboim yang kukut. Lasale kewune wäkngäsim, Seboimun.

\* 10:10: Äminu täpätuyitä Kalne taunu womdu yang natäxaying. Tiwändeyä Hibru wamune kakalä hikngändo.

<sup>20</sup> Äminu aläkwäxu Hamde bapunä. Bapunäne wamnäne upuke, kepnä äwä kantrinä yangu inäinä päke yiwikin.

### *Semde bapunämbam*

<sup>21</sup> Jafetde ulawu Semkäyā wawakngä towikut. Tiwän Semde wawaxu unetä sakngälake dukngikinu bapunä täpätu Eber. Tiwänä Semu Eberunetä sakngälakin täkwäkge bapunä. <sup>22</sup> Semde wawaxu umanä Elam, Asur, Apasat, Lidia äwä Aram yang. <sup>23</sup> Tiwänä Aramde wawaxu umanä Us, Hul, Geter äwä Mas.

<sup>24</sup> Apasatde wawaxu Sela. Tiwänä Selale wawaxu Eber.

<sup>25</sup> Eberde wawaxu täpäyalä. Yakäp täpä umanä Pelek yang inikut. Ile täpdukätanu kewu inäinä upuke yiwikin, ge ile tiwän Pelek yang inikut.† Ile ulapnä umanä Joktan.

<sup>26</sup> Joktande wawaxu umanä Almodat, Selep, Hasamawet, Jera, <sup>27</sup> Hadoram, Usal, Dikla, <sup>28</sup> Obal, Abimael, Seba, <sup>29</sup> Ofir, Hawila äwä Jobap yang. Äminu aläkwäxu undä Joktande wawak. <sup>30</sup> Kewu itä täke yiwikinu, Mesa unetä ku Sefar gusitdä akonggaxu täwal halak yiwikin.

<sup>31</sup> Äminu aläkwäxu Semde bapunä. Bapunäne wamnäne upuke, kepnä äwä kantrinä yangu inäinä päke yiwikin.

<sup>32</sup> Tiwän äminu aläkwäxu Noale wawaxunetä sakngälakinunin. Kewu yanggätä yiwikdoke pänguhiwänä, sakngälake, unetä upuke, päku kantrinä inäinä yiwitäke kukin.

## 11

### *Yawetä äminu wamu buläkän täknga yakinunin pängginungukut*

<sup>1</sup> Ämimbamu kep däkäne yiwikinu wamnä buläkän täknga yakin. <sup>2</sup> Tixäwik äminu gusitdä akonggak käwutkätan tihikuke, kewu kupi gwendu Babilonixätan kake, uwomune päku yiwikin. <sup>3</sup> Päku yiwike, “Kep gämänu päke, däkine häna, yähakitokawä, blik däkngäning,” yang yakin. Yolu hup simen yanggä dowahakin, tike kolta tuliwä, blixu päpä kitokakin. <sup>4</sup> Tiwän using yakin. “Inäinä domatäke, womdu womdu dowäku yiwihikunim,” yake, “Yolu gäpanggu tahake, yot bänäkängän yolu belakngä gwendu tahana, yekäwune kopik. Tiwän umaninu käyā tiwik,” yang yake, using pahakin.

<sup>5</sup> Tixawändeyä Yawe äminu kewune nanätä yot gäpang, yolu belakngä gwen yang pahaxawä, unin dayipikge epgut. <sup>6</sup> “A! U äminu inä uninggän, tiwän wamnä buläkän täknga. Yakapde unin pahaying. Ge mahande dasingga pahaningge natäkengu, awahaningunin,” yake, <sup>7</sup> “Puku wamnä pängginungutnim. Tiwän wamnä yawä, notnäta donatäpning,” yang yakut.

<sup>8</sup> Yake, Yawetä äminu womduwomdu petäke kuwän, yolu tahakinu dolahapulukin. <sup>9</sup> Ile tiwän yolu unggäpangu umanä Babel yang inikakin.\* Yolu unggäpangune Yawetä äminbamde wamnä pängginunguke, unetä petäke kuwän, päku kep däkäne womduwomdu yiwihikukin.

### *Semde bapunämbam apu Tera*

<sup>10</sup> Semde bapunä. Yanggä gwendä yiwikdoke teke pukuwän, krismasu gwenälä apuxukut. Tiwän Semu krismasnä 100 yiwikengä, wawakngä Apasat towikut. <sup>11</sup> Ile mahene krismasu 500 yiwixäwixu, wawak yäpanä towikut.

<sup>12</sup> Tiwän Apasalu krismasnä 35 yiwikengä, wakwakngä Sela towikut. <sup>13</sup> Ile mähene krismasu 403 yiwixäwixu, wawak yäpanä towikut.

<sup>14</sup> Tiwän Sela krismasnä 30 yiwikengä, wawakngä Eber towikut. <sup>15</sup> Ile mähene krismasu 403 yiwixäwixu, wawak yäpanä towikut.

<sup>16</sup> Tiwän Eberu krismasnä 34 yiwikengä, wawakngä Pelek towikut. <sup>17</sup> Ile mähene krismasu 430 yiwixäwixu, wawak yäpanä towikut.

<sup>18</sup> Tiwän Pelexu krismasnä 30 yiwikengä, wawakngä Reu towikut. <sup>19</sup> Ile mähene krismasu 209 yiwixäwixu, wawak yäpanä towikut.

† 10:25: Hibrü wamune ‘Pelek’ yangu yäpuli upukin. \* 11:9: Hibrü wamune ‘Babel’ äwä ‘pängginungukut’ yangu guläkngä usäkän bimä.

<sup>20</sup> Tiwän Reu krismasnä 32 yiwikengä, wawakngä Seruk towikut. <sup>21</sup> Ile mähene krismasu 207 yiwixäwixu, wawak yäpanä towikut.

<sup>22</sup> Tiwän Seruxu krismasnä 30 yiwikengä, wawakngä Nahor towikut. <sup>23</sup> Ile mähene krismasu 200 yiwixäwixu, wawak yäpanä towikut.

<sup>24</sup> Tiwän Nahor krismasnä 29 yiwikengä, wawakngä Tera towikut. <sup>25</sup> Ile mähene krismasu 119 yiwixäwixu, wawak yäpanä towikut.

<sup>26</sup> Tiwän Tera krismasnä 70 yiwikengä, wawakngä Abram, Nahor, äwä Haran yang towikut.

<sup>27</sup> Terale bapunä. Tera Abram, Nahor, Haran yangge nanä. Tiwän Haranu Lotde nanä. <sup>28</sup> Nanä käluk yiwixawän, Haranu Ur Kaldia alakut womune kungut. <sup>29</sup> Tiwän Abramkät Nahorkät mängätnä päkumäläk. Abramde mängälu umanä Sarai, tiwän Nahorde mängälu umanä Milka, Harande yäpa. Haranu Milka äwä Iska yangge nanä.

<sup>30</sup> Sarai engang hongge yiwikut.

<sup>31</sup> Teratä wawakngä Abram, bapunä Lolu Harande wawak, bapunä Sarai Abramde mängät yang päpän, Ur yolu Kaldiaxätanu unggäpangu teke, Kenan kuningge kukindeyä, Haran yolu unggäpangune päku yiwikin. <sup>32</sup> Yiwihika, Tera krismasnä 205 yiwixäwixu, une kungut.

## 12

### *Yawetä Abramü Kenan kuwike inikut*

<sup>1</sup> Gwendune Yawetä Abramü using inikut. “Kantrika, notdambam, nangga yänggwät yang peke, kewu nätä ganiwa, uwomune kunggayo. <sup>2</sup> Nätä pahawa, bapuka sakngälake, kantri inätä täke yiwä, umanä käyä tiwik. Tiwän bänip kwikwik gamike, tahawa umanda inulung tiwik. Tiwän gäle natake, äminbamu mahandexäyä bänip kwikwixu äpme yämit. <sup>3</sup> Ämindä gäle bänip kwikwik gamä, nätä yäkwäle ile bänip kwikwik yämit. Tike ämindä tokngä däkä gamä, nätä yäkwäle tokngä däkä yämit. Gäle tiwän, yotyolu kewune nanä undä bänip kwikwik päning,” yang inikut.

<sup>4</sup> Tiwän Abramü yotnä teke, Yawetä inikut using kukut. Lotkäyä ixät kukumäläk. Abramü krismasnä 75 yiwikengä, Haranu teke kukut. <sup>5</sup> Mängätnä Sarai, notnäle wawak Lot, hängäläpä äwä puyä äminu Haran päkin yangu undä päke, kewu Kenan uwomune kuningge kukin. Kuhika, Kenan kewu uwomune kundopgin.

<sup>6</sup> Kundoke kuhika, Sekem päku, pa takwänu More undäkäne yiwikin. Täpduxu uwomkätanu kewu uwomune Kenan nanä ayiwixakin. <sup>7</sup> Tiwän Yawetä apu, Abram using inikut. “Kewu awomu bapukale äpme yämit,” yang inikut. Yawetä ile apgutde, ile tiwän, Yawele alta gwenu uwomune tahakut.

<sup>8</sup> Tikengä Sekem teke kuhika, Betelde gusitdä akonggak käwutkätan päku, selyotnä täwal kemat tapike yiwikut. Uwäku yiwikulu, Betelde gusitdä akonggak käwut, tiwän Aile gusitdä pukunggak käwutde, bänäkängän päku yiwikut. Unexäyä alta gwendu tahake, Yawele uman tängenakut. <sup>9</sup> Tikengä uwomu teke, päku womduwomduhim yiwitäke, Negepde\* kukut.

### *Abramü Isip päku yiwikut*

<sup>10</sup> Kewu uwomkätanu gusit täpduk tiwän, naxu wenä hikngä tikut. Tiwän Abramü womduhimu Isip päpu yiwikge pukukut. <sup>11</sup> Isip kundopningge kuxäwik, mängätnä Sarai using inikut. “Gä mängälä gwälam hikngä. <sup>12</sup> Isip nanätä ganduke ‘Ile mängät,’ yakengu, nä anuwä kungäxäwa, Gä täning. <sup>13</sup> Ge ayäwä kakengu, ‘Hamina’ yang yäniyo. Tiwän gäle natakengu, donuwä kupit,” yang inikut.

<sup>14</sup> U inikut using kuwäl, Isip nanätä mängätnä kawä, gwälam hikngä tikut. <sup>15</sup> Tiwän kingge puyä ämindä kake, ku kingu “Mängälä gwälam hikngä täpätu undan kamäng,” yang inikin. Tikengä Sarai kingge yolune täke kukin. <sup>16</sup> Tiwän kinggä Sarai täkutde tiwän, Abramde sipsip, towiyä gämän, donggi, kamel, puyä ämin yang imikut.

\* 12:9: Negewu kep uman. Tiwän yäpulinä saut.

<sup>17</sup> Tiwändeyä kinggä Abramde mängätinä tākutde, Yawetä iwalu wäyi hikngä king, äminu undä yotnäne yiwixakin yangge yämän dambätakin. <sup>18</sup> Andambätake, kinggä Abram yawän apän, using inikut. “Usingu inale tahakuläk? ‘Mängätina’ yangu dasingge tiwän donanikuläk? <sup>19</sup> ‘Hamina’ yangu kemu inale naniwi tākum? Wanin, mängätän. Tāke kunggä,” yang inikut. <sup>20</sup> Inike, puyä äminä yäniwän, itä Abram, mängätinä, yang yäningyāpiwä, hängä täpänä undä päke kukumäläk.

## 13

### *Abramkät Lotkät matäke kukumäläk*

<sup>1</sup> Abramdä Isip teke, mängätinä, hängä täpänä yang päke, hipdunä Negep kōpgut. Notnäle wawaxu Lotkät using kōpgumäläk. <sup>2</sup> Abramū moningä silwa, gol, kälawu äminsak yangu meyä hikngä tiwäyā, päke kōpgut. <sup>3</sup> Täko yiwihika, Negep teke, womduwomduhim yiwitāke, Betel kukut. Täku Betelkät Aixätde bänäkän yiwikut, tupä selyotnä tapike yiwike, <sup>4</sup> alta gwenu Yaweले tahakut womune. Une päku yiwike, hipdu Yaweले tumuk takahut.

<sup>5</sup> Tixawän Lotkäyā sipsipnä, towiyä gämänä, äminu ixät kukin yangu meyä. <sup>6</sup> Abramkät Lotkätäne kälapnä meyä hikngä tiwän, kewu uwomunekānu yiwitnangäsä dolikut. <sup>7</sup> Äminu Abramde kälap daying yiwixakin äwä äminu Lotde kälap daying yiwixakin yanggä yanganikin. Tixawän uwomkätanu Kenan nanä Peres nanä yangu uwomunekän yiwäxakin.

<sup>8</sup> Puyä äminätä yanganiwä, Abramdä Lolu using inikut. “Puyä äminilu amäk wam yawä, tāke dolinggak. Nilu u notnäxäluninggän. Ge amäk wamu teta. <sup>9</sup> Kayo. Kewu inulung. Ge inäinä matäke kuhim. Gä hiyā käwut kuwiläkge natäpi, nä kwänä käwut kuwit. Tike gä kwänä käwut kuwiläkge natäpi, nä hiyā käwut kuwit,” yang inikut.

<sup>10</sup> Iniwän Lotdä Jodan kupi ku Soar kewu uwom kawānu, yanggänä käyā tikut, Yaweले puyä bimä,\* äwä Isipde kupi bimä. (Yawetä Sodom Gomora yangu dosipmäxawän kakut.☆) <sup>11</sup> Kewu unin kake, Lotdä kupi undä gwen inäle tuwänguke, womduwomduhim yiwitāke, gusitdä akonggak käwulunele kukut. Tiwänä Abramkät Lotkälū matäke kukumäläk. <sup>12</sup> Abramū Kenan yiwixawän, Lolu kupi unggwenune yolu gāpangguyi bänäkängän päku, selyotnä Sodomū kwayimune tapike yiwikut. <sup>13</sup> Äminu Sodom nanä gutongä ämin. Yaweले kayine wäyi hikngä pahakakin.

<sup>14</sup> Lotdä Abramū teke kuwänä, Yawetä Abramū using inikut. “Anetä yiwike, kewu undä dayipso. Gusitdä akonggak käwut, gusitdä pukunggak käwut, not käwut, äwä saut käwut yangu dayipso. <sup>15</sup> Kewu undä undayixaläxu nätä gäxät bapukaxätde gihäle tupäkände äpme damit. <sup>16</sup> Nätä tahawa, bapuka naxälä hikngä tike, haluhalu bimä tining. Äminu täpätutä haluhalu kendekengä, bapukaxäyā kendewik. Tiwän bapuka naxalä hikngä tiwän, kendetnangäsä doliwik. <sup>17</sup> Kuke, kewu awomdäne belakngänä däpinä yangu undä dayipso, inale gäle gamit,” yang inikut.

<sup>18</sup> Iniwän Abramdä selyotnä wäsipäke, Hebron täku Mamrele pa takwän dākändäkäne selyotnä tapike, uwomune yiwikut. Une täku yiwike, alta gwenu Yaweले tahakut.

## 14

### *Abramdä Lot gatängämikut*

<sup>1</sup> Täpduxu uwomune kingu malä nanä täpāyaläxät täpāyaläxätä amäk äminä päpä, Kenan apä, amgin. Elamde king Kedorlaomer, Babiloniale king Amrapel, Elasarde king Ariok, äwä Goimde king Tidal, yanggä apä, kingu Kenan nanäxät amgin. <sup>2</sup> Kingu Kenan nanä using: Sodomde king Bera, Gomorale king Birsa, Atmale king Sinab, Seboimde king Semeber, äwä Belale king. Bela äpmanu Soar yang inikaying. <sup>3</sup> Kenande kingu uläkwäxu amäk äminä päke, Sidim Kupi kukin, Sol Yanggä Gwende kwayimune.

\* 13:10: Puyä Yawetä Idenkätanu pahakut wom. Yakap 2:8-10 kayo. ☆ 13:10: Yakap 19:1-29



<sup>4</sup> Using tupä Kenan nanä Kedolaomerde gepbine yiwixawä, krismasu 12 apuxuwän, krismasu 13 täpäne mähe natäke, wamnä donggwälamikin. <sup>5</sup> Ile tiwän krismasu 14 täpäne Kedolaomerxät king notnäxät amäk äminä päpä, Astoret Karnaim apu Repa nanä sipmäke, Ham apu Sus nanä sipmäke, Sawe Kiriataim apu Em nanä sipmäke, <sup>6</sup> Seir täwal däkändäkäne apu Hor nanä sipmäke, Elparan nanä apu sipgin. Elparanu kepdän däkäle inälängändän. <sup>7</sup> Unetä täpä täkwämbän, Enmispät, äpmanu Kades yang inikayingune ku, Amalek nanä sipmäke, kepnä unda päke, Amori nanä Hasason Tamar yiwäxakinkäyä sipmäke, kepnä unda päkin.

<sup>8</sup> Unin sipä, kingu Sodom nanä, Gomora nanä, Atma nanä, Seboim nanä äwä Bela nanä yanggä amäk äminä päpä, Sidim kupine päku ämningge tändäkngakin. <sup>9</sup> Elamde King Kedolaomer, Babiloniale King Amrapel, Elasarde King Ariok, äwä Goimde king Tidal, yanggä apä, ixät amgin. Amäk äminu 4 täkwäkgänetä apä, amäk äminu 5 täkwäkgänexät amgin.

<sup>10</sup> Sidim Kupi Gwenune, gänangä däkändäkä koltatäne käyä. Tiwän amänggawä täke doliwän, Sodomde amäk äminäxät Gomorale amäk äminäxät andatäkuningge tahake, notnä kolta gäpmane päpu sipän, notnä täwal däkändäkäne datäkukin. <sup>11</sup> Datäkuwä iwalnätä päku, Sodomdäne Gomoratäne yang hängälöpänä nakngä yang päkin. <sup>12</sup> Tixawän Abramde notnäle wawaxu Lot Sodom yiwäxakutde, amäk ämindä hängä täpänä Lot yang päke kukin.

<sup>13</sup> Tiwänä äminu andatäkukinu täpätutä apu, Abram Hibrü uläpä inikut. Äminu Amor nanä täpätu umanä Mamre, panä takwän däkändäkä käyä. Tiwän Abrahamu pa undäkändäkäle kwayimune yiwixakut. Eskol, Aner yanggu Mamrele epänepän notnä. Tupä Abram, Mamre, Eskol, Aner yang gatäkgatak tahaningge wamu aläkakut. <sup>14</sup> Abramü wawakngä täkinde natäke, amäk äminä Abramde yolune alakinu 318 ämin yangyäwämbän, päku iwalnä yäwatäke kuhika, Dan yot gäpangune kukin. <sup>15</sup> Kupiläne Abramdä amäk äminä uhike pewän, iwälnä sipä datäkuxawä, yäwatäke kuhika, Hoba kukin, Damaskusde not käwutkätan. <sup>16</sup> Kuke hängälöpä iwalnätä päkinu, wawakngä Lot, Lotdäne hängälöpä äwä wäwi mängälä yang päkapgin.

#### *Melkisedekgä Abramü wam gwaläng inikut*

<sup>17</sup> Abramdä King Kedolaomerxät king notnäxät sipmäke, hipdunä Sawe Kupi bä Kingge Kupi yang inikayingune apuxawän, Sodomde kingu Abramkät yiwik yähimäläkge apgut.

<sup>18</sup> Tiwänä Melkisedexu Salemde kingkäyä Abramde apgut. Täkapu bretkät wainkät imikut. Melkisedexu Anätu Enetängä Nanä Täpäle prisde yiwikut. <sup>19</sup> Itä apu wam gwalängu using imikut. “Abram, Anätu Enetängä Nanä kepkät yekäpkät pahakut täpätä, gäle bänip kwikwixu äpme gamik. <sup>20</sup> Tiwän Anätu Enetängä Nanä Täpäle uman yatängenatnim, inale itä iwalda kätakgane pewän sipguläk,” yang inikut. Iniwän Abramdä hängälöpä upuke, 9-u inäle pexäwik, 1-u Melkisedekge imikut.

<sup>21</sup> Tiwänä Sodomde kingu Beratä Abramü using inikut. “Hängä täpä gikale pexäwik, äminakän namiyo,” yang inikut.

<sup>22</sup> Tiwändeyä Abramdä using inikut. “Kätaknga tängenake, Yawe, Anätu Enetängä Nanä, kepkät yekäpkät pahakut täpäle umande wamu hiyäkän hikngä yänggat. <sup>23</sup> Hängä täpätu gätäne dohikngä täpit. Täwikge tret bä bälängyayikge kätak yangu mätekngä. Tiwändeyä dowäpit. Using päpitnä, gätä ‘Nätä tahawa, Abramü hängänämbamgän tigin,’ yang yeyä. <sup>24</sup> Hängä täpätu ninale doläpit. Tike hängä amäk äminatä anayingu unin. Tike Aner, Eskol, Mamre yangu näxat kukumäng. Ge hängä mätekngä itäkän päning,” yang inikut.

#### *Yawetä Abramü hiyäkän wam inikut*

<sup>1</sup> Abramdä awewelike kaxawän, Yawetä apu, wamu using inikut. “Manaxälayo. Nä tulungguka bimä. Tike bänip gwalängge hängä inulung gamit,” yang inikut.

<sup>2</sup> Tiwän Abramdä yäkwäle inikut. “Täkeläpä Yawe, hängä dasä bimä namiläk? Enganga wenä. Ge nätä kupa, Elieser Damaskas nanä täpätä näle tangge yiwike, hängäna päpik.

<sup>3</sup> Engangu donamikuläkge, puyä ämina täpätutä näle hängä päpik,” yang inikut.

<sup>4</sup> Iniwän Yawetä wamu hipdu using inikut. “U. Gäle hängä äminu uläpätä dowäpik. Tike gika wawak hikngätä päpik,” yang inikut. <sup>5</sup> Inike kepmän täkepuke using inikut. “Yekäpkätan kake, kuminamu kendeyo. Kendetnangäsä tinggak? Bapuka using tining,” yang inikut.

<sup>6</sup> Iniwän Abramdä Yawele bänip tiwän, Yawetä “äminomän” yang inikut.

<sup>7</sup> Tiwänä hipdu Yawetä Abramam using inikut. “Nä Yawe. Nätä kewu awomunin gamitde Ur yolu Kaldiaxätanu unggäpangunetä täkapgum, gän,” yang inikut.

<sup>8</sup> Tiwän Abramdä inikut. “Täkeläpä Yawe, dasing tahawi kakengä, hiyäkände yangu natäpit?” yang inikut.

<sup>9</sup> Iniwän yäkwäle inikut. “Towiyä gämän mängälä gwendu, meme mängälä gwendu, sipsiwu wäwi gwendu, undä krismasnä gwenalä gwendu, äwä kombunanang mätexu gwendu, päkalu gwendu yangu päkapu namiyo,” yang inikut.

<sup>10</sup> Iniwänä Abramdä undä Yawele päkapu, bänäkängän wehike, käwutdu pexäwik, käwutdu petäke kuwän, täkngayalä tikut. Tikengä kwäwilu dowehikut. Tike gwendu käwutdu täkngane teke, gwendu käwutdu täkngane tekut. <sup>11</sup> Pewän dayike, kápämädä epu naninngä epä, Abramdä yäwambän datäkuin.

<sup>12</sup> Tiwänä gusitdä pukuxawän, Yawetä natäpän, däpmunä kupsä hikngä pekut. Pexawän, kupilä täkngaxät naxälä täkngaxät apän naxälakut.

<sup>13</sup> Tiwän Yawetä inikut. “Wamu ganiwa, hiyäkängän natäpso. Bapuka kewu womdune päku, apuyiwit däkngake, uwomune nanäle kematde yiwitning. Tiwän puyä kitokngä yämä pahaxawä, äminu sipmäxäwik pahawä malixawä, 400 krismas apuxuning. <sup>14</sup> Tiwän äminu gin pahawä maliningu, nätä tokngä däkä äpme yämit. Tiwän bapuka hängä täpänä naxälä päke, yolu uwomu teke kuning. <sup>15</sup> Tiwänä gän, yiwitake kuhika, äminälake hikngä damänsim tike, bänip kwikwik täkngane kupi kwayining. <sup>16</sup> Bapuka gwenu gwenaläxät gwenaläxät sakngäläxawänä, ane apning. Amor nanäle wäyinä inulung hikngä tiwän kakengä, anetä yäwämba epuxuning,” yang inikut.

<sup>17</sup> Gusitdä pukuwän kupilä tiwänu, gäpma kupänä käyä gwenkät, aläkätäwu däkinä käyä täpaxätädä tingalake, kälawu wehike pekulune bänäkändekän apuxukumäläk. <sup>18</sup> Täpduxu unggwenune Yawetä Abramam hiyäkän wam täknga using inikut. “Bapukale kewu awomunin yämit, Isipde yanggä dupinetä apuxu yanggä inulungu Yufrites dupine. <sup>19</sup> Ken, Kenis, Kadmon, <sup>20</sup> Hit, Peres, Repa, <sup>21</sup> Amor, Kenan, Girgas, äwä Jebus yangge sakngayile kewu undä bapukale yämit,” yang inikut.

## 16

### *Hagartä Abramde wawaxu Ismael dukngikut*

<sup>1</sup> Sarai, Abramde mängälu, engangu dondukngikut. Tiwändeyä mängälä täpätu Isip nanä puyä äminäle yiwikulu umanä Hagar. <sup>2</sup> Ge Saraitä Abram inikut. “Yawetä bänipna umumbän, engangu dondukngit. Ge kuyo. Tiwän puyä äminaxät däpmunu pesimäläk. Dasingga? Itä enganga äpmembä betangamik?” yang inikut.

Iniwän Abramam täke natäpget, Saraitä yawänun. <sup>3</sup> Abramam Kenan täku krismasu 10 yiwikut. Tiwänä, Saraitä puyä äminä Hagaru Abramde imikut.

<sup>4</sup> Tiwän Hagarxät yiwät, tängene käyä tikut. Tiwän kake, Hagaru inäle natäpänu axopgut. Tiwän towikngä\* Saraile natäpänu aepgut. <sup>5</sup> Tiwänä Saraitä Abramam using inikut. “Gätä tahawi, nä meyä pänggat. Puyä ämina uläpä nina gäle kätaxune tekum. Tiwändeyä Hagaru tängene käyä tiwän kake, itä nandupänu, kwakwakngä tinggak. Ge Yawetä gäxät näxälu äpme uhinggiwik,” yang inikut, Saraitä Abramam.

\* 16:4: Hängä täpä uhike towikngä däkngakaying usinggän, hängänämbamgän ämindä äminu puyänä pangyämininge uhike, towikngä däkngakakin.

<sup>6</sup> Yawän yäkwäle Abramdä using inikut. “Täke. Gika puyä ämin. Gika dasingga tahawiläkge natäläxu, gika tängäne yiwixak,” yang inikut. Yawänä Saraitä mähemähe kaxäwik tahanggawän, Hagaru datäkukut.

<sup>7</sup> Yawele angelätä kepgän gomune, Hagaru yanggä akondokayingune kakut. Yanggä akondokayingu unggwäxu Surde kähit kwayimune yiwixak. <sup>8</sup> Tiwän ängelatä using inikut. “Hagar, Saraile puyä ämin, sänetä apuläkngä, säne kunggaläk?” yang inikut.

Iniwän “Nä towiknga Saraile naxälake datängapunggat,” yang inikut.

<sup>9</sup> Iniwän Yawele ängelatä inikut. “Hipdu päku towiknga Saraile gepbine yiwiyo,” yang inikengä, <sup>10</sup> unetäkänu using inikut. “Nätä tahawa, ayika sakngälawä meyä tiwän, kendetnangäsä doliwik. <sup>11</sup> Gä äpmanu tängakane käyä. Ge engangu wäwi täpä dukngiwiläk. Tikengä umanä Ismael† yang iniyo, inale kwänämu tiläxu, Yawetä anatak. <sup>12</sup> Wawakga uläpä donggi tuk bimä däkngake, äminbamde iwalnä däkngawik. Däkngawän yäkwäle iwalnä däkngawä, tahake yiwitning. Tikengä notnambamkälu gupsängu doyiwitning,” yang inikut.

<sup>13</sup> Yawetä Hagaru wam inikutde, “Ananduxak Täpä axat,” yake, umanä täkngatu using inikut. “Anätu Ananduxaläk Täpänin” yang inikut. <sup>14</sup> Ile tiwän yanggä akondokayingu unggwäxu umanä “Käluk Yiwäxäwik Nanduxak Täpäle Yanggä” yang inikin. Yanggä akondokayingu unggwäxu Kadeskät Beretkätde bänäkängän yiwäxak.

<sup>15</sup> Tiwänä Hagardä Abramde wawak dukngiwän, Abramdä umanä Ismael yang inikut.

<sup>16</sup> Abramü krismasnä 86 yiwixawän, Hagardä Ismaelu une dukngikut.

## 17

### *Wamu gupnä matäkindäne*

<sup>1</sup> Abramü krismasnä 99 yiwixawän, Yawetä apu inikut. “Nä Anätu Kitokngäna Käyä Täpä. Näxät gatäke yiwixäwik, nomängän pahayo. <sup>2</sup> Kontraknga gäxät tahakumäxu aläpa kitokawän, tahawa bapuka meyä hikngä tiwik,” yang iniwän, <sup>3</sup> Abramdä sopäsopä puke, kuhilä kewune täpu temgut.

Tiwän Anätutä using inikut. <sup>4</sup> “Näle kontraxu using. Mahande kantri yiwitäke kuninggäne bapunä däkngawiläk. <sup>5</sup> Ile tiwän umanda Abram\* yangu dongganikaning. Tike umanda Abraham† yang ganikaning, inale nätä pahawa, bapuka meyä sakngälake, kantrinä inäinä päke yiwitning. <sup>6</sup> Nätä tahawa, bapuka meyä dukngixäwik, kantri däkngake yiwitäke kuning. Tiwän bapuka täpätuyi kingge yiwitning. <sup>7</sup> Kontraknga hipdu täpa kitokawän, iwikge using yiwik, bapuka mahande alätninggexät. Nä gäle Anätuka, tiwän bapuka mahande alätningge Anätunä. <sup>8</sup> Gä Kenande kewune apuyiwitde päkapu yiwixaläk. Tiwändeyä kewu Kenandäne awomu undä gäxät bapuka mahande alätningkätde gihäle tupäkände damike, Anätunäle yiwit,” yang yakut.

<sup>9</sup> Tikengä unetäkänu using inikut. “Gäxät bapuka mahande alätningkälu näle kontrak tawake yiwitnong. <sup>10</sup> Kontraknga uläknga using. Wäwi undä gität yiwixayingu, yämünäle gup matänong. <sup>11</sup> Kontrakngitde tuwängge gupnä matäkaningu uläkngatä yiwik. <sup>12</sup> Wäwi gität yiwitning, engangu wäwi alake täpduxu 8 yiwitning, äwä malä nanä puyä äminsäle moninggä uhining yangu, undä gupnä matänong. Usäkän bapuka mahande alätningkäyä usinggän tahanong. <sup>13</sup> Yotsäne alätning bä moninggä uhining yangu undä gupnä amatänong. Uläkngatä tuwängge yiwän, kontraknga iwikge yiwixäwik. <sup>14</sup> Tike wäwi täpätu iminda gupnä domatäwixu, näle kontraxu doläwämbik. Ge aläwämbä epuxuyok,” yang inikut.

<sup>15</sup> Täkngatu using inikut. “Mängätäda Sarai yang inikakinu aleke, Sara yang ininong.

<sup>16</sup> Nätä bänip kwikwik ima, wawakga dukngiwik. Unetäkänu nätä bänip kwikwik ima, yotyotde hawanä däkngawik. Tiwän ayinä täpätuyi kingge yiwitning,” yang inikut.

† 16:11: Hibrü wamune ‘Ismael’ yangu yäpuli Anätutä anatäxak. \* 17:5: Abram yangu yäpuli ‘nanä umanä käyä täpä’. † 17:5: Abraham yangu yäpuli ‘äminu meyäle nanä’.

<sup>17</sup> Iniwän Abrahamdä sopäsopä puke, kuhilä kewune täpu temäke, using natäpgut. “Wäwi krismasnä 100 tiwänu, engangu äpme towimbik? Saraxäyä krismasnä 90. Ge engangu äpme dukngiwik?” yang natäpän, kwakwakngä tiwän mikut. <sup>18</sup> Tikengä Anätu using inikut. “Wamu yaläxu, Ismaelde täkembä imiläk?” yang inikut.

<sup>19</sup> Tiwänä Anätutä inikut. “Ile donatäke yat. Tike mängätäda hikngä, Saratä wäwi täpätu äpme dukngiwik. Tiwän umanä Aisak yang iniyo. Tiwänä kontraknga ixät tahake, täpa kitokawän, iwikge using yiwik, bapunä mahande alätninggexät. <sup>20</sup> Ismaelde yaläxu anatät. Ge ixäyä bänip kwikwixu äpme ima, engangu meyä towimbik. Wawakngä 12 towimbän, uläkwäxu kuhiläle yiwike, kantrinä täke yiwitning. <sup>21</sup> Tiwändeyä kontraknga uläknga Aisakät tahahim. Äminu uläpä krismasu ende gwenuneyä Saratä kake täpik, täpduxu asawomune,” yang inikut. <sup>22</sup> Wamu Abraham iniwän puluwänu, Anätu axukut.

<sup>23</sup> Täpduxu inä unggwenunekän Abrahamdä Ismael, wäwi inäxät yiwixakin, moninggä uhikut yangu wäwi undä gupnä Anätutä inikut using matäkut. <sup>24</sup> Abrahamu krismasnä 99 tixawän, gupnä matäkin. <sup>25</sup> Tike wawakngä Ismaelu krismasnä 13. <sup>26</sup> Täpduxu inä unggwenunekän Abrahamkät Ismaelkätde guwu matäkin. <sup>27</sup> Abraham, wäwi inäxät yiwixakin, moninggä malä nanä uhikut yangu wäwi undä gupnä matäkin.

## 18

### *Äminu täpälälä täpätu Abrahamde apgin*

<sup>1</sup> Abrahamu selyotnä Mamrele pa takwän däkändäkäle kwayimune täku tapikut. Ngä täpduxu gwendune gusilu tokngä tiwän, selyotnäle yämäne yiwixawän, Yawe apgut.

<sup>2</sup> Abrahamu kuhilä kwayiwän enawän, äminu täpälälä täpätu päkapu yiwikinä dayipgut. Unin dayikengu, selyotnä yämä däkänetä ihapmäke kuke, sopäsopä puke, kuhilä kep däkäne temgut.

<sup>3</sup> Temäke using yakut. “Bulämbam täpä, nä ilakngä nandukengu, puyä äminda manapmake kuyo. <sup>4</sup> Puyä ämina iniwa, yanggä täkapu damän, bälängsä häluke, pa andäkale gepmäne yiwä täkanong. <sup>5</sup> Näle apuyingge, naxu mätekngä hangdama, nakitokakengä, axunangge natäyingune kunong,” yawän, “Täke. Usingu täke tahawiläk,” yang yakin.

<sup>6</sup> Tiwän Abrahamu yupsäng ihapmäke, selyotkätan koptut, Sarale. Ko Sara using inikut. “Flawa gwälamu bulämbamu tupälälä päke, bret hayo,” yang inikut.

<sup>7</sup> Tikengä ihapmäke, towiyä gämände kukut. Ku towiyä gämän mätexu tänge ilakngäkänu gwendu täkapu, puyä äminä täpätule imän, itä yupsäng matäke hakut.

<sup>8</sup> Tiwänä towiyä gämändäne mäm yanggä kälukät, äwä mäm yanggä awäke pewä kitokakinkät, towiyä gämän mätexu u hakinkät päkapu yämikut. Yämike, pa gepmä yiwike, daying yiwixawän, nakin.

<sup>9</sup> Tikengä using inikin. “Mängätäda Sara sandan?” yang yawä “Endesing. Selyotkätan,” yang yänikut.

<sup>10</sup> Tiwänä u yiwikinu täpätutä using yakut. “Täpduxu asämbimä gwenu krismasu endenggwenune apa, mängätäda Sara engangu wäwi täpä kake täpik,” yang inikut.

Wamu u yakinu, Sara selyolune yiwixawik natäpgut. <sup>11</sup> Abrahamkät Saraxälu äminäläke hikngä tiwät, engangä dukngitnangäsä täpduxu ayapmikut. <sup>12</sup> Ge Sara using natäpgut. “Apnaxät nilu äminäläke alimäk. Engang äpme dukngiwik yake yänggak?” yang natäke, mipäkohopikut.

<sup>13</sup> Tiwän Yawetä Abrahamu using inikut. “Sara inale mikgak? ‘Engangu kake tänangäsändo. Äminäläke alit,’ yangu inale yänggak? <sup>14</sup> Hängä täkngatu Yawetä using tiwik yang natäpänu, doaläwik? Tiwän täpduxu angganit gwenune hiyäkände äpme apit. Tiwän engangu wäwi täpä kake täpik,” yawän, <sup>15</sup> Sara anaxäläke “Domit,” yawän, Yawetä “Hiyäkände. Amiläk,” yang inikut.

### *Abrahamkät Täkeläpaxätä Sodomde yakumäläk*

<sup>16</sup> Äminu uläkwäxu Sodomde kuningge enawä, Abrahamkät kukin. Kuke päku kahitbänä yiwike, yot gäpangkätan kakin. <sup>17</sup> Yawetä using natäpgut. “Hängä tahawitde

natälu, Abrahamu doxanghopike tahawit, <sup>18</sup> inale Abrahamu bapunä sakngälake, kantri inätä täke yiwä, kitokngänä käyä tiwik. Tiwän Abrahamde tiwän, kantri kewune nanä undä bänip kwikwik päning. <sup>19</sup> Abrahamu, engangä, bapunä yang yänindämumbän, nomängän tahaxäwik, Yawele kahit täwaningge tuwängukum. Ge hiyäkän wamu Abraham inikumu, inä using pahawit,” yang natäpugut.

<sup>20</sup> Tikengä Yawetä using inikut. “Sodom nanäxät Gomora nanäxät gutongä hikngä pahaxawä, kwänäm tixäwik, näle yayingu meyä hikngä. <sup>21</sup> Ge nina pukuke dayikengä, hängä wäyi pahawä wamu natäpugumu hiyäkän bä kem yangu natäpüt,” yang inikut.

<sup>22</sup> Tiwänä äminu Yawexät kukin täpöyalu Sodomde kuxawät, Yawexät Abrahamkälu ayiwikumäläk. <sup>23</sup> Yawetä yiwikulune inälängän ku, Abrahamdä using inikut. “Ngä dasing? Äminomänkät gutongä äminkät undä sipnangge tinggaläk? <sup>24</sup> Ngä äminomänu 50 tiwänu, ile butayä donatäxäwik, yolu undä gäpangu pahawi malining? <sup>25</sup> Gätä gutongä ämin sipmäkengu, äminomänu dosipnangäsä, inale undä sipmäkengu, meyä usakän yämiläxunin. Kewu undä womde meyä uhinggikgaläxunin. Kekem usingu dolahanangäsä,” yang inikut.

<sup>26</sup> Tiwänu Yawetä using inikut. “Sodomkätanu äminomänu 50 dayikengu, butayä ile natake, yolu undä gäpang tewa yiwik,” yang inikut.

<sup>27</sup> Tiwänä Abrahamdä hipdu using inikut. “Nä kep ämingän. Wamu yänangäsändo. Tiwändeyä hipdu yäwit. <sup>28</sup> Äminomänu 5-u wenä tiwän, 45-kän tiwänu, dasing? Yolu undä gäpangu asipiläk?” yang iniwän, “45 dayikengu, dosipit,” yang inikut, Yawetän.

<sup>29</sup> Tiwänä hipdu using inikut. “Ngä 40-kän tiwänu, dasing?” yawän, “Äminu 40 uläkwäke tiwänu, dosipit,” yang inikut.

<sup>30</sup> Iniwän hipdu “Täkeläpä, tokngä manandupso. Hipdu yänanggenggat. Ngä 30-kän tiwänu, dasingga?” yawän, “Dawahawit, 30-kän tiwikäyän,” yang inikut.

<sup>31</sup> Iniwän hipdu inikut. “O, Täkeläpä, wamu hipdu angganinggat. Ayäwa kakengu, mähe manatängamiyo. Ngä undanu 20-kän tiwänu, dasing?” yawän, “20-kän dayikexäyä, dosipit,” yang inikut.

<sup>32</sup> Iniwänä “O Täkeläpä, wamu wäsekngä hikngä ganiwit. Dasing? Äwä undanu 10-gän dayikengun?” yawän “10-gän dayikexäyä, dosipit,” yang inikut.

<sup>33</sup> Tiwänu wamu yakumäläxu, une using ku yiwikut. Tiwän Yawe teke kuxawän, Abrahamu yotnäle hipdu kukut.

## 19

### *Yawetä Sodomkät Gomoraxät sipgut*

<sup>1</sup> Lolu taunu Sodomde yämä däkäne, wamu inulung wopwom yiwik yakakin wom-une puku yiwike yiwixawän, ängela uläpöyalu kupilä täkngaläknga kundopgumäläk. Kundopät dayikengu enake, ku sopäsopä uläpöyatde puke, kuhilä kep däkäne temgut. <sup>2</sup> “Bulämbam täpä, nä puyä äminsä. Ge yotnane apät kuna. Päku bälängsä häluwät, une petnim. Ge enakengä, gihä natämäläxune kuhol,” yang yänikut.

Yäniwän yäkwäle using yakumäläk. “Ane, kekewune pesim,” yang inikumäläk.

<sup>3</sup> Tiwän Lotdä kitokawän, ile yolune kukin. Flawa yisnä wenä hangyämike, nakäyä meyä hake, yämän nakin. <sup>4</sup> Yämän nake, awetningge däpi tixawän, wäwi Sodom nanä undä, wawakdäkä, äminäläke yang Lotde yolu yiwit täpän gwähawän, <sup>5</sup> Lotde yangoke yakin. “Äminu gäle apumäläxu, yawi epuxuwät tahakana,” yang yakin.

<sup>6</sup> Tiwän Lotdä epuxuke, yämä mehene gupsäng tahake, yänikut. <sup>7</sup> “O mäte notna. Wäyi täknga usingu malahanong. <sup>8</sup> Tike yäpana täpöyalä wäwixälu doyiwixayingu undan. Ge unin päkepu dama, gihä natäying täknga unuxät yiwitnong. Tike äminu aläpöyalu mawahawä malinong, inale näle yolunekän apumäläk,” yang yänikut.

<sup>9</sup> Yäniwän, “Kuke nipmit,” yang inikin. Inikengä yakin. “Lolu womdune nanä täpätä päkapu yiwike, ninu gutongä äminde nininggak,” yang yakin. Tikengä using inikin.

“Meyä uläpätde natämäng tāknga gāle tahana, meyāmbamu gātā päpilāk,” yang yake, Lolu tekwätāmapä kuxawän, yämä uputningge tahakin.

<sup>10</sup> Tiwāndeyä okupi yiwikumäläxu uläpätde Lolu tulitāmapät kopän, yämä gupsäng tahakuhikumäläk. <sup>11</sup> Tikengä kepmän yiwikinu uläkwäxu undä pahawät, kayi kupilawä, yämä dākā kanangäsä dolikut.

<sup>12</sup> Tiwänä uläpätde Lolu using inikumäläk. “Yepmäka, wawakga, yäpaka, bä gikaxät nanä täpätuyi andanu käyā kakengu, päpi awomu teke kukanong, <sup>13</sup> inale yolu anggapangu awahata malining. Äminu ane nanätä gutongä pahaxawä, Yaweke kwänäm tixäwik yayingu meyä hikngä tiwän, Yawetä niningyāpiwän, nitdä pahata maliningge apumäk. Ge notda päpi, yolu awomu teke kukanong,” yang inikumäläk.

<sup>14</sup> Iniwät Lolu enake epuxuke, yepme yäpanä uläpätde pähimäläkge tuwungukin täpätde kuke yänikut. “Yupsäng enake, yolu anggapangu teke kukahol, inale Yawetä pahawän malinangge tinggak,” yang yäniwän, “Yamändetbä nininggak?” yang natäpğumuläk.

<sup>15</sup> Gusilu moyokän akondoxawän, ängelatä Lolu iningyāpikumäläk. “Mängätde yäpaka yang päke epuxunggayo. Tike yolu anggapangkät pahata malinäng,” yang inikumäläk.

<sup>16</sup> Tiwāndeyä Lolu hipnalä tahangyiwikut. Tinggawän ängelatä Lot mängätinä yäpanä yang kätakngäne päke, epu päke kukumäläk, inale Yawetä Lotde butayä natäpğut. <sup>17</sup> Epu päke kuke, ängela täpätutä using yänikut. “Tupäkände datäkukanong. Päkungu kupi gwenune mayiwä takanong. Tiwän maläpä täkwämbän kanong. Tupäkändekän täwalune datäkukanong. Tike dahipän kumnäng,” yang yänikut.

<sup>18</sup> Tiwāndeyä Lotdä using yakut. “O, Bulāmbam täpä, usingu mayawi tahanom. <sup>19</sup> Nä axumnangäsä tiwāndeyä, gātā puyä äminda ilakngä nanduke, nandung yiwixawi, käluk yiwixat. Tiwän täwalu malä hikngä. Ge unele datäkuxätäna, meyä uläkngatä apungu, anihipän kumnimunin. <sup>20</sup> Tike yolu atunggäpangsimu wäkngäsim. Tiwän mätekngä hikngä. Ge une täkembä datäkuke doxupit?” yang inikut.

<sup>21</sup> Iniwän ängelatä inikut. “Täke. Wamu u yänggaläxu using tahawit. Yolu unggäpangsimu dowahawa malining. <sup>22</sup> Tiwän yupsäng ihapmäke, datäkunggayo, inale yolu gäpangsimune doxuxawi, näta hängä tākngatu pahanangäsändo.” (Yolu unggäpangsimu Lotdä mätekngä yang inikutde, umanä Soar yang inikakin.\*)

<sup>23</sup> Gusilu moyokän ako apuxawän, Lolu Soar kundopğut. <sup>24</sup> Kundopän kakengä, Yawetä huwu tokngä yähakaying gwengwenu,<sup>†</sup> yekäpkätandä pewän, hopätä epukaying bimä tāknga epgin, Sodom Gomoraxätanun. <sup>25</sup> Tiwän Yawetä pahawän, ämin, yot, hängäläpä yangu kupi unggwenune yiwixayingu undä yähakukin. <sup>26</sup> Unin ihiwän natake, Lotde mängälu täpän täkwämbän kake, hup bimä<sup>‡</sup> däkngake, däm täpä yiwikut.

<sup>27</sup> Yolu yähakuxawä, gwäsi hikngä Abrahamu Yawexät yakap yiwikumäläk womune täku yiwike, hapäpu, <sup>28</sup> Sodom, Gomora, kupi unggwen yang kaxawän, gwäha bulāmbam hikngä kewu uwomkätandä mingändäkä bimä gwendä kopän kakut. <sup>29</sup> Anätutä yot kupi unggwen yang pahawän malikin täpduxu, Abrahamde natake, Lolu iniwän, andatäkuke meyä uläknga yapmikut.

#### *Lotde yäpa*

<sup>30</sup> Lolu Soar yiwitnanggengu anaxälake, yäpanä täpäyalu päpän, päko täwal dākäne hupgänangkätan yiwikin. <sup>31</sup> Täpduxu gwendune päyenätä ulapnä inikut. “Nanilu äminälake hikngä alinggak. Tiwän kewu anggomune mängälä ayä käyäkän. Tike kewu awomkätanu nit päke yiwitnangäsä wäwi wenä. <sup>32</sup> Ge nanilu wain imita, tängoke andatdawuwänä, unuxät petnim. Unetäyä engangu käyä tiwik,” yang inikut.

<sup>33</sup> Ge kupilä unggwenune nanä wain imät tängopğut. Tangopänä yäpanä yakap täpätä kuwän pekumäläk. Tiwāndeyä nanä donatäpğut.

\* 19:22: Hibu wamune ‘Soar’ yangu yäpuli mätekngä. † 19:24: Huwu unggwenu umanä sulfa. Däkita bimä yähakaying. ‡ 19:26: Hup bimä undäkä sol.

<sup>34</sup> Kwepdätä päyenätä ulapnä inikut. “Kupilä anggwenune nankälu axuwa pemäk. Ge hipdu imita tängoke datdawuwik. Tiwänä kuwi pesimäläk,” yang inikut. <sup>35</sup> Ge kupilä unggwenune wainu hipdu tängoke datdawuxawänä, yäpanä mahan täpätä kuwän pekumäläk. Tiwändeyä nanä donatäpgut.

<sup>36</sup> Unin tahakengä nanätä yäpanäle engangmuhiwu pängyämikut. <sup>37</sup> Tiwänä yäpanä yakäp täpä engangu wäwi täpa dukngike, umanä Moap<sup>§</sup> yang inikut. Ile tiwän Moap nanä äpman yiwixayingu, Lotdä bapunä dakngawän yiwixaying. <sup>38</sup> Inä usinggän yäpanä mahan täpaxäyän wawakngä dukngike, umanä Ben-Ammi<sup>\*\*</sup> yang inikut. Ile tiwän Amon nanä äpman yiwixayingu<sup>††</sup>, Lotdä bapunä däkngawän yiwixaying.

## 20

### *Abimelekgä Abrahamde mängät täkut*

<sup>1</sup> Abrahamu Mamrele pa gänang teke, Negep päku, Kadeskät Surxätde bänakan yiwikut. Päku Geraru mätekngä wesim yiwixäwikngä, <sup>2</sup> mängätinäle “Hamina” yang yakut. Tiwänä Gerarle kingu Abimelekgä puyä äminä yäninyäpiwän, ku Sara täkapu imä, yotnäne tekut.

<sup>3</sup> Tiwän kupilä gwendune Anätutä dambu tängäne apuke, Abimelexu inikut. “Gä axumnangge tinggaläk, inale gä mängälä uläpä täkuläxu ayä käyä,” yang inikut.

<sup>4</sup> Tiwändeyä Abimelexu Saraxät däpmunu dowekumäläk. Ge Abimelekgä using inikut. “Täkeläpä, äminu gutongänä wenä asipiläk? <sup>5</sup> Abrahamdä Sarale ‘Hamina,’ yawän, Saratäxayä ‘Hamina,’ yakut. ‘Ayä wenämbä,’ yake yäwa ku täkapgin. Tiwändeyä nätä gutongä täkngatu ile dolahakum. Ge undanu gutongä wenä,” yang inikut.

<sup>6</sup> Iniwän Anätutä dambu tängäne inikut. “Hiyäkände. Gä donatäxäwik tahakuläk yangu anatät. Ile tiwän, nätä natäpa, mängälä uläpä doläke, wäyi täknga dolahakuläk, nälen. <sup>7</sup> Ge mängälä uläpä hipdu ayäle imiyo. Äminu uläpä profet. Ge aimi, itä gäle tumuk wam yawänu, gä doxupiläk. Tike doimiläxu, yäko! Gä äwä gikaxät nanä yangu undä axumning,” yang inikut.

<sup>8</sup> Kwepdätä gwäsi hikngä, Abimelekgä puyä äminä undä yangyävambän apä, meyä apgutdäne yäniwän, anaxälakin. <sup>9</sup> Tiwänä Abraham yatävambän apän, inikut. “Gä ninde dasing tahanggaläk? Nätä gäle meyä täkngatu dolahakum. Tiwändeyä gä kem yake, meyä täknga ninde täkapunggaläk. Äminbamdä dowahakaying täknga, gätä ninde tahanggaläk. <sup>10</sup> Yäpuli inale hikngä tahakuläk?” yang inikut.

<sup>11</sup> Tiwänä Abrahamdä inikut. “‘Ane nanä Anätule donaxäläke, nuke mängätinä tänäng,’ yang natäpgum. <sup>12</sup> Tike ‘Hamina’ yangu hiyäkände yakum. Nanilu uläpäninggän. Tike mingilu inäinä. Tiwändeyä mängätinäle täkum. <sup>13</sup> Tiwänä Anätutä natäpän, yotnä teke, kewu womduwomdu tihikuxäwik, mängätinä using inikum. ‘Gätä näle nomän tahaxawi, yotyotbä säneka kuhimu, näle gätä “Hamina” yang yäniyo,’ yang inikum,” yang yakut, Abrahamdän.

<sup>14</sup> Tiwänä Abimelekgä Sara Abrahamde hipdu imikut. Imike towiyä gämän, sipsip, puyä ämin yang imikut. <sup>15</sup> Imikengä Abrahamu using inikut. “Awomu näle kepgän. Gika sawomuneka yiwitnangge natakungu, une yiwiyo,” yang inikut.

<sup>16</sup> Inikengä Sara using inikut. “Nätä hamindale moningu silwa meyä 1000 sekel<sup>\*</sup> imit, gutongä uläknga gäle tahakumden. Tiwän äminbamu gäxät yiwixayinggä using natäpning. ‘Gä gutongä täkngatu dolahakuläk,’ yang natäpning,” yang inikut.

<sup>17-18</sup> Tiwänä Abrahamdä Anätule tumuk wam yakut. Tupä Abimelekgä Abrahamde mängät täpän, Yawetä mängälä undä Abimelekät nanä engang dayike pänangäsä bäniyä

§ 19:37: Hibrü wamune ‘Moap’ äwä ‘nananetä’ yangu guläkngä usäkän bimä. \*\* 19:38: Hibrü wamune Ben-Ammi yangu yäpuli notnambamde wawak. †† 19:38: äpman yiwixayingu Mosesdä wamu aläkngä temgut. Täpduxu inä yiwikut womune natake ‘äpman’ yang temgut. \* 20:16: Hibrü wamune 1000 sekel yangu 11.5 kilogram.

umukut. Tiwäna Abrahamdä ile tumuk wam yawän, Anätutä Abimelek, mängätinä, mängälä puyä äminä yang gatängyämän, hipdu engang dayike pänangäsä täke tikin.

## 21

### *Saratä Aisak kake täkut*

<sup>1</sup> Yawetä Sarale natake apuke, yakäp wamu hiyäkän täknga yakulu tahawän bulä tikut. <sup>2</sup> Abrahamu äminäläke aliwänä, Sara tängene käyä tiwän, täpduxu Anätutä yakut gwenune, engangu wäwi täpä kake täkut. <sup>3</sup> Täpänä Abrahamdä umanä Aisak\* yang inikut. <sup>4</sup> Tixawän täpduxu 8 gwendä apän, Abrahamdä engangäle gup matäkut, tupä mämä wam täknga Anätutä yakut using. <sup>5</sup> Abrahamu krismasnä 100 yiwixawän, Aisaxu alakut.

<sup>6</sup> Saratä using yakut. “Anätutä bänip gwaläng täknga namän, axuläkake mikgat. Ge äminbamdä ile natakengu, näxät axuläkake mitnim,” yang yakengä, <sup>7</sup> unetäkän yakut. “Tupä äminbamu ‘Abrahamde mängälu Sara engangä dombä kake täpik?’ yang natäpgin. Tiwändeyä Abrahamu äminäläke aliwänä, engangä kake tänggat,” yang yakut.

### *Abrahamdä Hagarxät Ismaelkät yangyävambän kukumäläk*

<sup>8</sup> Aisaxu bulämbam tike, mämu tewän kakengä, Abrahamdä naxu bulämbam gwen hawän nakin. <sup>9</sup> Tiwänä Saratä kaxawänu, wawakngä Aisaxu Abrahamdä Isip nanä mängälä Hagar uläpä täkutde wawakngä wäyi täkngaläknga inixäwik inimikut. <sup>10</sup> Kakengä Abrahamu inikut. “Mängälä puyä äminda uläpäxät wawakngäxälu yangyävambi kukakun. Axungwäxawi, puyä äminda uläpäle wawakngä hängä täpäka dowäpik. Tike näle wawaxu Aisakgäkän päpik,” yang inikut.

<sup>11</sup> Ismaelu Abrahamdä inä wawak. Ge ayangyävambikge yawänu, meyä päkut. <sup>12</sup> Tiwän Anätutä Abrahamu using inikut. “Wawakga Ismael äwä puyä äminda Hagar yangyävambiläkge, meyä mawäyo. Saratä dasingga yak using tahayo, inale ‘Bapukambamu meyä hikngä tiwik,’ yang hiyäkän wam täknga ganikumu, wawakga Aisake tiwän yakum. <sup>13</sup> Tike puyä ämindale wawakngä tahawa, meyä sakngälake kantrinä inätä täke yiwitning, inale ixäyä wawakga,” yang inikut.

<sup>14</sup> Kwepdätä gwäsi hikngä, Abrahamdä nak, yanggä kälap guwune uhike pekinunin yang päkapu, Hagarde gwälamune pekut, wawakngäxät. Pewän päke, Berseba kepgän womune päke tihikukut. <sup>15</sup> Yanggä kälap guwune päkulu alängopät puluwän, wawakngä pa mätekngä kwämbätsimde gepmä tekut. <sup>16</sup> Teke “Wawaknga kayitä hikngä doxaxawa kupik,” yake, inäkän päku malähimsim yiwixäwik, kwänämnä tikut.

<sup>17</sup> Engängä kwänäm tiwän, Anätutä natäpगत. Tiwän Anätule ängelatä Hagaru yekäwunetä using inikut. “Hagar, inale tikgaläk? Engang täpä awexäwik tixu, Anätutä anatäk. Ge manaxälayo. <sup>18</sup> Ku kätakngäne täke täpi enawän, inale nätä tahawa ile engangu meyä sakngälake, kantrinä inätä täke yiwitning,” yang inikut.

<sup>19</sup> Tiwänä Anätutä tahawän, kayi kakalä tiwän, gäpma yanggäle kwayikinu däkätu kake, täku kälap guwu une tewän pukuwän dopän, täkapu wawakngä imän tängopगत.

<sup>20</sup> Wäwi mätexu uläpä aläkaxawän, Anätu ixät yiwikumäläk. Paran kepgän womune yiwixäwik, kwalemu mutnatäpगत. <sup>21</sup> Tixawän mingätä mängätinä Isip nanä täkapu inikut.

### *Abrahamkät Abimelekät wam yakumäläk*

<sup>22</sup> Täpduxu gwendune Abimelekät Fikol amäk äminäle kuhiläle yiwixakut uläpäxät ku, Abrahamu using inikumäläk. <sup>23</sup> “Inaka pahaläxu, Anätutä gatänggaminggak. Ge Anätule umande wamu kitokngä hikngä naniyo. ‘Gä, wawakga, bapuka yangu kemu dondaniwit,’ yang niniyo. Nätä gäle nomän tahakum usinggän, gätäxäyä nä äwä kantri anggäpang apuyiwitde päkapu yiwixäläk yangge usinggän tahayo,” yang inikut.

<sup>24</sup> Iniwän Abrahamdä “Anätule umande kitokngä hikngä yanggät. U yänggaläk usingu äpme tahawit,” yang inikut.

\* 21:3: Aisak yangu yäpuli ‘mikgak’.



<sup>25</sup> Tikengä using inikut. “Yanggä gäpma däkätu kwayikumu, puyä ämindatä kukäle inale täke towikngä däkngaying?” yang inikut.

<sup>26</sup> Tiwändeyä Abimelekgä “Ngä, itä täkin yangu donatät. Moyokän tahawä donanikuläk. Ngä äpmangän yawi natäxat,” yang inikut.

<sup>27</sup> Tiwänä Abrahamdä sipsip, towiyä gämän yang päkapu, Abimelekge imän, kontrak tahakumäläk. <sup>28</sup> Unetäkän Abrahamdä sipsip mätexu mängälä 7 päkapu inätä pekut.

<sup>29</sup> Pewänä Abimelekgä Abrahamu using inikut. “Sipsip mätexu mängälä 7-u uläkwäxu, inätä yäpuli dasingge peläk?” yang inikut.

<sup>30</sup> Iniwän “Yanggä gäpma unggwenu Abrahamdä kwayikut,’ yake, sipsip mätexu 7-u uläkwäxu näle kätaxune awäyo,” yang inikut.

<sup>31</sup> Äminu uläpätä Anätule umande wamu kitokngä yakumäläkge, kewu uwomu umanä Berseba<sup>†</sup> yang inikaying.

<sup>32</sup> Unin tahawät wenä tiwän, Abimelekät Fikol amäk äminäle kuhilä uläpä yangu hipdunä Filistia nanäle kewune kukumäläk. <sup>33</sup> Tixawän Abrahamu pa däkätu Berseba kwayike, Anätu Iwikge Yiwixak Täpäle tumuxu une yakut. <sup>34</sup> Tikengä Filistia nanäle kewune belakngä yiwikut.

## 22

### *Anätutä Abrahamde bänip yake kakut*

<sup>1</sup> Berseba yiwixawängän Anätutä Abrahamde bänip yake kakut. “Abraham,” yawän, Abrahamdä “We!” yang inikut.

<sup>2</sup> Tiwänä Anätutä using inikut. “Abraham, wawakga Aisaxu buläkän hikngä uläpä bänipda yangu anatät. Tiwändeyä täpi Moria kewu uwomune kuhon. Tiwänä nätä täwalu däkätu yäwa kakengä, täku undäkäne tänguwi kupän, Aisaxu ofa näle hawi ihikuyok,” yang inikut.

<sup>3</sup> Abrahamu kwepdätä gwäsi hikngä enake, hängäläpä donggi tängäne päko peke, puyä äminä täpälälä äwä wawakngä yang päke kukut. Ku däki ofa häwikge wehike päke, kewu Anätutä inikut womune kukut. <sup>4</sup> Axuxawän täpduxu gwenälä gwendu apän, kwayiwän enawänu, kep womu malätä kakut. <sup>5</sup> Kake puyä äminä uläpälalu using yänikut. “Gilu donggixät ane yiwixätngong. Tixawän Aisakät nitdäkän täku, Anätule sopäsopä puke, tumuk wamu inikengä, hipdunit apsim,” yang yänikut.

<sup>6</sup> Tikengä däki ofa hängenge päkulu, wawakngäle imän gwälamikut. Tiwänä inä däkixwäm äwä musuk yang päpän kukumäläk. <sup>7</sup> Äxuxäwik Aisakgä “Nan” yawän, nanätä “Ina?” yakut.

Tiwänä Aisakgä “Ngä, däkixät däkixwämälä awämäk. Tiwändeyä sipsip mätexu ina tänguke hahim?” yawän, <sup>8</sup> nanätä using inikut. “Anätutä inä äpme nimik,” yang inikut. Tiwän kukumäläk.

<sup>9</sup> Kuhika täwalu Anätutä inikutdäkäne kondoke, alta tahake, däki päko pekut. Peke wawakngä napdä wamäke, tako alta tängäne däki pekulune, enetängä tekut. <sup>10</sup> Teke musuk täke, wawakngäle guläk matäwikge tändäkngakut.

<sup>11</sup> Tiwändeyä Yawele ängelatä yekäwunetä using inikut. “Abraham, Abraham,” yawän, Abrahamdä “We! Nä ane,” yakut.

Tiwänä ängelatä using inikut. <sup>12</sup> “Wawakga malänguyo. Tike hängä täkngatu ile malahayo. Gä Anätule naxälake, wamnä gwälamikgaläk yangu anatät, inale wawakga täpätükänu uläpä Anätule imiläkge doxotnaläk,” yang inikut.

<sup>13</sup> Tiwänä Abrahamdä kwayiwän enawän tahakengu, sipsiwu wäwi gwendu songä gitnä tupätuhimune apän, komnäne tapiwän yiwixawän kakut. Kake, wawakngäle tangge ku täkapu, unggwenunin tänguke, häwän ihikukut. <sup>14</sup> Tiwän Abrahamdä kewu uwomu umanä “Yawetä äpme nimik,” yang inikut. Ile tiwän äpmasimkäyä “Yawele täwal däkäne äpme nimik” yang using yäkaying.

<sup>†</sup> 21:31: Hibrü wamune Berseba yangu yäpuli ‘wamu kitokngä yanggä gäpma’.

<sup>15</sup> Hipdu Yawele ängelatä yekäwunetä “Abraham” yake, using inikut. <sup>16</sup> “Abraham, Yawetä gäle using yak. ‘Wawakga täpätukän tiwändeyä doxotnaläkge, nina umande hiyäkände using yänggat.\*’ <sup>17</sup> Nätä bänip kwikwik gama, bapuka kuminamu yekäwune nanä äwä haluhalu yanggäne nanä yang bimä meyä hikngä äpme tike, iwalnä sipmäke, iwalnäle taunu towikngä däkngake, päke, yiwitning. <sup>18</sup> Gätä näle wam gwälamiläkge, bapukale tiwän, kantri kewune nanä undä bänip kwikwixu äpme päning,’ yang yak, Yawetän,” yang inikut.

<sup>19</sup> Tiwänä Abrahamu Aisak täpän, hipdu puyä äminäle kuwät, hipdunä Berseba kukin. Täku une yiwikut.

#### *Nahorde wawak*

<sup>20</sup> Womdu yiwixawänä, Abrahamu using inikin. “Ulapda Naholkät mängätinä Milka-xälu engangu andukngikumäläk. <sup>21</sup> Yakap täpä Us. Tiwänä ulapnä Bus, Kemuel, <sup>22</sup> Kesed, Haso, Pildas, Jidla, äwä Betuel yang dukngikut,” yang inikin. Kemuelu Aramde nanä. <sup>23</sup> Tiwänä Betuelu Rebekale nanä. Milka Naholde mängälu engangu using 8 dukngikut. <sup>24</sup> Tiwän puyä äminä mängätinäle tükulu umanä Reuma. Ile wawaxu umanä Teba, Gaham, Tahas, äwä Maka yang.

## 23

#### *Saratä kupän, Abrahamu kep uhikut*

<sup>1</sup> Sara krismasnä 127 yiwike kumgut. <sup>2</sup> Kenankätanu taunu womdu Hebron\*, uwom-une kupän, Abrahamu butayä natake, kwänäm tixäwik, gwäyäm yiwikut.

<sup>3</sup> Gwämyämde yiwikulunetä ku Hit nanä Hebron yiwixayingu using yänikut. <sup>4</sup> “Nä apuyiwit bä malä nanä. Ge kewu womduhimu tākembä namining, tiwän uhike mängätna une kwayiwit?” yang yänikut.

<sup>5</sup> Tiwän Hit nanätä yäkwäle using inikin. <sup>6</sup> “Abraham bulämbam täpä, gä nin bänäkänkätanu umanda käyä. Ge ninde mätmälu gwälam hikngä dākätu gika kake yawi, doxotnanim. Tiwän axungäk täpä mätmälu undäkäne kwayiyo,” yang inikin.

<sup>7</sup> Tiwän Abrahamu enake, “Ginde natäpa konggak,” yang natake, Hit nanä u yiwikinde kayine guläk puke,† <sup>8</sup> using yänikut. “Mängätna kwayiwitde täke natakengu, näle map päke, Efron Soharde wawaxu gindä tākembä inining? <sup>9</sup> Tiwän Makpela Hupgänangu Efronde kep kwayimune yiwixak dākäle moning namba naniwän, mätmätnale‡ uhiwit,” yang yänikut.

<sup>10</sup> Efronu Hit nanä uläpä notnäle bänäkänkätan yiwikutnä, notnä taunde yämä dākäne u päkapu yiwikinde kayine, Abrahamu using inikut. <sup>11</sup> “Bulämbam täpä, natäxayo. Notnambamde kayine using ganinanggenggat. Hupgänanggänu donggamit; tike kewu inä uwomkät gamit. Tiwän axungäk täpä kwayiyo,” yang inikut.

<sup>12</sup> Tiwän Abrahamu hipdu yot towixu u yiwikinde kayine guläk puke, <sup>13</sup> Efronu using inikut. “Gätä täke natakengu, moningge namba naniwi gama awäyo. Tiwän axungäk täpä une tewit,” yang inikut.

<sup>14</sup> Efrondä Abrahamu using inikut. <sup>15</sup> “Abraham bulämbam täpä, natäxayo. Moning namba kewu uwomdäne silwa meyänä 400 sekel§ usinggä uhinangäsä. Tiwändeyä nit bimäsäle moning namba undäkä bulämbamundo. Ge axungäk täpä täke kwayiwiläk,” yang inikut.

<sup>16</sup> Unin yawän natäpän take tiwän, Abrahamdä silwa Efrondä Hit nanäle kayine yakut using, bisnis ämindä uhikakindäkäne meyänä 400 sekeldä uhikut. <sup>17-18</sup> Uhiwän, Hit

\* 22:16: Äminu tupä nanä wamnä päpä kitokaningge natakengu, äminu bulämbam täpälapäle uman yake, “Ile umande yänggat,” yakakin. Tiwändeyä Anätutä inä wam täpän kitokawikge natakengu, äminu täpätule umande yänangäsändo, inale Anätu enen hikngä, tiwän ämimbamu ayapmikut. Ile tiwän, “Nina umande yänggat,” yang yaku. † 23:2: Hebronde umanu tākngatu Kiriät Arba. ‡ 23:7: Äminu uwomune nanä notnäle “Gäle natäpa konggak,” yäningge natakengu, ile kayine guläk pukakin. § 23:9: Äminu axupä, hupgänangune päko pekakin. § 23:15: Hibru wamune 400 sekel yangü 4.5 kilogram.

nanä taunde yämäne päkapu yiwikinde kayine, Efrondä kepnä Makpela nanä uwosimu Abrahamde imikut. Kep, hupgänang, äwä pa uwomune nanä yangu undä inäle imikut.  
<sup>19</sup> Imän mängätinä hupgänangu Makpela nanä undäkäne täku tekut. Makpelaxät Mamrexälu wäkngäsim wäkngäsim, tiwän Hebronkätan. Tiwänä Hebronu Kenankätan.  
<sup>20</sup> Hit nanätä kewu uwom äwä hupgänangu undäkä yangu mätmätnäle tupäkände inäle imikin.

## 24

### *Abrahamdä puyä äminä wawakngäle mängät ku kake täkapikge inikut*

<sup>1</sup> Abrahamdä inaka pahakulu, Yawetä bänip kwikwik yämän, nomängän tikin. Tixawän Abrahamu äminäläke hikngä damäsim tikut. <sup>2-4</sup> Puyä äminde kuhiläle yiwixäwik hängä täpänä daying yiwixak täpä using inikut. “Wawaknga Aisaxu mängätinä ane Kenan nanä mayangämiyo. Tike kantrinane ku, mängälä ninaxät nanä täpätu täkapu imiläkge natät. Ge kätakga bakanale kematde täxäwik, Anätu Yawe kepkät yekäpkät pahakut täpäle umande ‘Usingu äpme tahawit,’ yangu hiyäkände hikngä naniyo,” yang inikut.

<sup>5</sup> Tiwän puyä äminätä using inikut. “Ngä axu yäwa, mängälä täpätä ane apikge ämbitäwänu, dasing? Täkembä apu wawakga une täke kuwit?” yang inikut.

<sup>6</sup> Iniwän Abrahamdä using inikut. “Wawaknga uwomune mahikngä täke kuyo. <sup>7</sup> Yawe Anätu yekäwune nanä täpätä naniwän, kepna äwä kepnotna yang peke ane apa, hiyäkän wamu using nanikut. ‘Bapukambamde kewu awomu äpme yämit,’ yang nanikut. Ge itä ängelanä gämäxu äpme iningyäpiwän kuxawänä kuwi, mängälä uwomune nana täpätutä ‘Täke’ yangu äpme yawän, wawakngale täkapiläk. <sup>8</sup> Mängälä täpä gäxät ane apsimäläkge ämbitäwänu, hiyäkän wamu Anätule umande yäwiläkga meyä manggamiyok.\* Tike wawaknga une maläke kuyo,” yang inikut.

<sup>9</sup> Tiwänä puyä äminätä towikngä Abrahamde baki kematde katäkngätä täxäwik, “Wamu u yänggaläk using hikngä äpme tahawit yangu Anätule umande ganningat,” yang inikut.

### *Abrahamde puyä ämindä Rebeka kuke kakut*

<sup>10</sup> Abrahamde puyä äminätä hängä gwälamgwälamu Abrahamdäne päke, kamelu Abrahamdäne 10 päke kukut. Kuhika, kewu Mesopotemia kuke, taunu Nahor kundopgut.  
<sup>11</sup> Kewu alukwäxawän kundoke, yanggä gäpma, taun kwayimune yiwixak däkäne kuke, kamelu ile inälängän yäniwän puku yiwikin. Täpduxu usä womune, mängälätä yanggä uhiningge kukakinunin.

<sup>12</sup> Ge ile tiwän tumuk wamu using yakut. “O Yawe, gä towiknga Abrahamde Anätu. Abrahamu towiknga. Ge Abrahamde gwälam hikngä tahake, gatängamiyo. Tiwän puyä pahawa täke tiwik. <sup>13</sup> Nä yanggä gäpma andäkane yiwäxäwa, mängälä mätexu taunune nanä yanggä uhiningge aapukaying. <sup>14</sup> Ge mängälä täpätu apän, ‘Yanggälumändanetä yanggä uhike nami tängopa,’ yang iniwit. Iniwa mängälä uläpätä yäkwäle wamu ‘Tangop. Tiwän kameldalexäyä uhike yäma,’ yang yawänu, ‘Mängälä uläpä puyä ämindä Aisakge tuwänguläxunin,’ yang natäke, ‘Gätä towiknga Abrahamde gwälam hikngä alahaläk,’ yang natäpit,” yang inikut.

<sup>15</sup> Tumuk wamu ayäxawänggän, Rebeka yanggälumänä gwälamike apgut. Mängälä uläpä Betuelde yäpa. Tiwän Betuelu Nahorkät Milkaxätde wawak. Tiwän Nahoru Abrahamde notnä. <sup>16</sup> Rebeka nomnä däkä gwälam hikngä. Tiwän mängälä mätek. Wäwi täpätuxälu doyiwikumäläk. Rebeka yanggä gäpmane puku yanggälumänäne uhike, hipdu akopgut.

<sup>17</sup> Akopän Abrahamde puyä ämindä yupsäng ku using inikut. “Yanggä yanggälumändane täläxu täkembä nami tängopit?” yang inikut.

\* 24:8: wamu ... meyä manggamiyok. Äminu anätunäle umande hiyäkände hikngä yäkakinu, “Using hikngä tahawit. Tike usingu dolahawa kakengu, itä täke nuwik,” yang natäxäwik yäkakini.’

<sup>18</sup> Iniwän “Täke, bulämbam täpäna,” yang inike, yanggä anggwälamikulu yupsäng täkepuke imän tängopgut.

<sup>19</sup> Tiwän mängälä mätexu uläpätä using inikut. “Yanggä kameldalexäyä uhike yäma inä natäpning using tängopning,” yang inikut. <sup>20</sup> Inike yanggä yanggälumänune nanä kamelde gehanune yupsäng piwän yiwä, hipdu yanggä gäpmane ihapmäke täku uhipäkapu pingyäminggawän, kamelu undä tängopä, täke tikut.

<sup>21</sup> Tixawänu puyä äminu uläpä wamu doyake axupitang yiwikut. Yiwixäwik “Nätä natäke apulu, Yawetä äpmembä tahawän, nomänu tiwän kawit,” yang natäxäwik kang yiwikut.

<sup>22</sup> Tiwän kamelu tängopäyä, puyä ämindä nomtäpänäle goldä pahakinu gutonggu äwä kätahiwu goldä pahakinu gutongalä yangu yäkngänetä sikut. Nomtäpänäle goldä pahakinu unggutongu meyänä 5 grem. Tiwän kätahiwu goldä pahakinu unggutongalu meyänä 100 grem. Tiwän moningu inulunggä uhinangäsä. <sup>23</sup> Sikengä using inikut. “Täkembä naniwiläk? Ngä gä iminde yäpa? Nanggale yotkätanu awetnangäsä käyä? Tiwänä äminu näxät apumängu une täke bä petnim?” yang inikut.

<sup>24</sup> Iniwän “Nä Betuelde yäpa. Nana Betuelu Nahorkät Milkaxätde wawak,” yang inikut. <sup>25</sup> Inike unetäkänu using inikut. “Kameldale nakngä äwä awetnangäsä† yangu käyä. Tiwän yolu gindä petningge käyä,” yang inikut.

<sup>26</sup> Iniwän puyä äminu uläpätä Yawele sopäsopä puke, däme kepkätan täpu temäke, tumuk wamu using yakut. <sup>27</sup> “Yawe towiknga Abrahamde Anätu uläpäle uman tängenäkgat. Yawetä towikngale iwikge natäxäwik, gwälam hikngä tahanggak. Ile tahanggak usingän, näxäyä towikngale notnäle yolune hikngä nanitäkapuk,” yang yakut.

*Abrahamde puyä äminkät Rebekale mingänanäxätä wam yakin*

<sup>28</sup> Tiwän mängälä mätexu uläpätä ihapmäke, mingäle yolune ku hängä dasingga apän kakulu undä yänikut.

<sup>29-30</sup> Rebeka haminä täpätu käyä. Umanä Laban. Rebekatä apän, Labandä nomnäne nomtäpänäle tekut gutongkät kätahiwu kätakngäne pekut gutongatkät dayipgut. Tiwän Rebekatä “Äminu täpätutä using nanik,” yang yäniwän natäke, haminä Labanu äminu uläpäle yupsäng kukut. Kungu kamelnäxät yanggä gäpma däkäne inälängän yiwixäwä dayipgut. <sup>31</sup> Dayike äminu uläpä using inikut. “Gä Yawetä bänip kwikwik gaminggax-unin. Kepmänu inale yiwixaläk? Yotna aländäkngake, kameldä petnangäsä womkäyä aländäkngat. Ge api kukana,” yang inikut.

<sup>32</sup> Iniwän äminu uläpä, puyä ämin notnä, kamel yangu Labande yolune kukin. Kuwä hängäläpä kamelune päko pekinu päkepu pekin. Tiwän kamelde nakngä, gras yang yämike, äminu uläpaxät puyä ämin notnäxätä bälängä hälutningge yanggä päkapu yämikin. <sup>33</sup> Tikengä naxu päkapu yämä, äminu uläpätä using yakut. “Nä naxu yupsängu donäpit. Tike wamu natälunin gämäk danikengä näpit,” yang yakut.

Yawän Labandä “Täke niniwiläk,” yang inikut.

<sup>34</sup> Tiwän äminu uläpätä using yakut. “Nä Abrahamde puyä ämin. <sup>35</sup> Yawetä towiknga bänip kwikwik imän, hängänämbamgän tikut. Sipsip, towiyä gämän, silwa, gol, puyä äminu mängälä wäwi, kamel, donggi yang imikut. <sup>36</sup> Towikngale mängälu Sara äminäläke hikngä alikengä, engangä wäwi täpätu dukngikut. Tiwänä towiknga Abrahamdä hängä täpänä undä wawakngä uläpälekän imikut.

<sup>37-38</sup> “Tikengä wamu kitokngä hikngä täknga using nanikut. ‘Anätule umande “Usingu äpme tahawit,” yangu hiyäkände hikngä naniyo. Wawakngale mängälu ane Kenan nanä mayangämiyo. Tike nanale notnämbamde kuke, mängälä mätexu ninaxät nanä täpätu täkapu wawakngale imiyo,’ yang nanikut.

<sup>39</sup> “Naniwän using inikum. ‘Ngä axu yäwa, mängäla täpätä ane apikge ambitäwänu, dasing tahawit?’ yang iniwa, using nanikut.

† 24:25: Kamelde nakngä äwä awetnangäsä Wilu bulä päxäwik, kwätälä täpäläpä päkapu yolune pexakinunin. Tiwän kamelnä ulängäne pekakin. Tixawän nakngäle naxu tämbam salin bimä yämä näkakin.

<sup>40</sup> “Nä Yawele wam gwälaminggatde, itä ängelanä äpme iningyäpiwän, ixät kuhimäläk. Tiwän itä gatänggamän, mängälä kepnatna tiwän ninaxät nanä hikngä täpätu äpme takapu wawakngale imiläk. <sup>41</sup> Tike kepnatnale kuwi, axotnake mängälä täpätu donggamä kakengu, wamu Anätule umande hiyäkände hikngä u nanningaläk takngatä meyä donggamik,’ yang nanikut,” yang yänikut, Abrahamde puyä ämindän.

<sup>42</sup> Unetäkänu using yänikut. “Äpmanu yanggä gäpma däkäne apukengu, Yawe using init. ‘O Yawe, towiknga Abrahamde Anätu. Malätä hikngä apunggat. Ge nätä ahikngä natäke apulu, gätä gatängamiyo. Tiwän puyä pahawilu nomän tiwik. <sup>43</sup> Nä yanggä gäpma andäkane yiwixawit. Tixawän mängälä mätexu täpätutä yanggä uhiwikge apänu, “Yanggälumändanetä yanggä uhike nami tängopa,” yang iniwit. <sup>44</sup> Iniwa mängälä uläpätä yäkwäle wamu “Tängop. Tiwänä kameldalexäyä uhike yäma,” yang naniwänu, “Mängälä aläpä Yawetä towikngale wawakge tuwänguxunin,” yang natäpit,’ yang init.

<sup>45</sup> “Tumuk wamu bänipnane ayäxäwakän, Rebeka yanggälumänä gwälamike apuk. Apuke yanggä gäpmane puku yanggälumänäne uhiwän, using init. ‘Yanggä takembä nami tängopit?’ yang init.

<sup>46</sup> “Iniwa yanggä anggwälamixu yupsäng takepu namike, using nanik. ‘Tängop. Tiwän kameldalexäyä uhike yäma,’ yang nanik. Tiwän tängopa, kameldexäyä uhike yämän tängoying.

<sup>47</sup> “Tiwänä ‘Gä iminde yäpa?’ yang init.

“Iniwa ‘Nä Betuelde yäpa. Nana Betuelu Nahorkät Milkaxätde wawak,’ yang nanik.

“Naniwän, nomnäne nomtäpänäle tengämike, kätakngäne kätahiwu pengämüt. <sup>48</sup> Tikengä sopäsopä puke, dämäna kepkätan täpu temäke, Yawele tumuk tahat. Towiknga Abrahamde Anätu uläpäle uman yatängenat, inale itä towikngale daknotnäle yäpa nätä towikngale wawakge täku imitde nanitäkapuk,” yang yakut.

<sup>49</sup> Yänike using yänikut. “Ge gindä towikngale natäke, gwälam tahaningge natäkengu, täke nanining. Tike gwälamu dolahaningge natäkengu, ixäyä täke nanining. Tiwän nä dasingga tahawit yangu natäpit,” yang yänikut.

<sup>50</sup> Tiwänä Labankät Betuelkätdä yäkwäle wamu using inikumäläk. “Hängä aläknga Yawetä tahanggak. Ge nindä täke bä takendo yangu yänangäsändo. <sup>51</sup> Täke, täke täke kuwiläk. Yawetä natäk using, täku towikngale wawakge imi, mängätinäle täpik,” yang iniwät, <sup>52</sup> natäke Abrahamde puyä äminu uläpätä Yawele sopäsopä puke, dämä kepkätan täpu temgut.

<sup>53</sup> Tikengä hängä gol silwa yanggä pahakinu Rebe katä pahanangäsä äwä täwik yangu Abrahamde puyä ämindä yäkngänetä sike imikut. Imikengä bänip gwälängge haminäxät mingäxätde hängä moningu kopsä hikngätä uhikayingunin yämikut. <sup>54</sup> Tiwänä äminu uläpaxät notnä apginkälu naxu nake, kupilä unggwenune däpmanä une pekin.

Kwepdätä enake, äminu uläpätä using yakut. “Nä äpmanu towikngale takembä kunggawit?” yang yäniwän, <sup>55</sup> mängälä uläpäle haminkät mingäxättdä yäkwäle wamu using yakumäläk. “Mängälä täpä nihäxät yiwixätna, täpduxu 10 usä apuxuwänä kunong,” yang inikumäläk.

<sup>56</sup> Iniwät deyä using yänikut. “Nätä natäke apgumu, Yawetä gatängamän, puyä pahalu nomänu alik. Ge mananindäkngänong. Tewä tokwikngale kunggäwa,” yang yänikut.

<sup>57</sup> Yäniwän using inikumäläk. “Mängälä uläpä inina inä mapdä hikngä yäwik,” yang inike, <sup>58</sup> Rebeka yatäwambät apän “Äminu aläpaxälu äpmanu axuhimäläk?” yang iniwät, “Täke. Äpme kuhi,” yang yakut.

<sup>59</sup> Tiwänä Rebeka, mängälä Rebeka kang yiwixak täpä, äwä Abrahamde puyä äminä apgin yangu axuningge tahaxawä, <sup>60</sup> Rebeka wam gwälängu using imikin. “O Rebeka, gä engangu meyä hikgnäle apekngä däkngawiläk. Tiwän bapukambamdä enake, iwalnä sipmäke, yot gäpanggäpangu päning,” yang inikin.

*Aisakgä Rebeka mängätinäle takut*

<sup>61</sup> Iniwäyā Rebeka äwā mängälä puyä äminäle päpän pahangämikaying täkwäk yangu kamel tängäne päko yiwä, yolu uwomu teke, Abrahamde puyä äminätä gämäk kuxawän kukin. Abrahamde puyä äminu uläpä using tahake, Rebeka täke kukut.

<sup>62</sup> Aisaxu kewu Negep uwomune † päku yiwikutnä, Käluk Yiwäxäwik Nanduxak Töpäle Yanggä§ teke, hipdu apgut. <sup>63</sup> Gwendune tukwatde hikngä, songäxätan ku moyo tihikuhika,\*\* kwayiwän enawän tahakengu, kamelu apunggäwä kakut.

<sup>64</sup> Tixawän Rebekaxäyā kwayiwän enawänu, Aisaxu tupäkände kakut. Kakengu kamel tängänetä pälangepuke, <sup>65</sup> “Äminu ätuläpä nin nindupikge apunggaxu imin?” yang inikut, Abrahamde puyä äminun.

Iniwänu “Näle towiknga, Aisak,” yang inikut. Tiwän Rebeka täwikngä täke, nomnä omik umukut.

<sup>66</sup> Tiwänä Aisaxu puyä äminätä hängä dasinggä tahakulu, undä une inikut. <sup>67</sup> Tiwänä Aisakgä Rebeka mingä Sarale selyolune initäke koke, mängätnäle täkut. Täke Rebekale täke hikngä natäpgut. Mingätä kupänu butayä täkngane yiwikulu, Rebekatä apungä, Aisakge bäniwu tänguwän epgut.

## 25

### *Abrahamu engangu täkwäkguxäyā hipdu towikengä kumgut*

<sup>1</sup> Sara kupänä, Abrahamu mängätnä hipdu täpätuxäyā äläkut. Umanä Ketura. <sup>2</sup> Tiwän itä dukngikulu, wawakngä 6. Umanä Simran, Joksan, Medan, Midian, Isbak äwä Sua yang. <sup>3</sup> Joksandä täkake, wawakngä itä towikulu Seba Dedan yang. Tiwänä Dedandä täkake Asu, Letus, äwä Leum yang towikut. Tiwän unetä sakngälake Asu, Letus, äwä Leum yangge bapunä yaxäwik yiwikin. <sup>4</sup> Tixawänu Midianu, wawakngä 5 towikut. Umanä Epa, Eper, Hanok, Abida äwä Elda yang. Äminu aläkwäxu Abrahamde mängälu Ketulale ayinä.

<sup>5-6</sup> Abrahamu mängätnä Sarale mehene päkutde wawakge hängä bänip gwalängge doxungäxäwik uhike yämikut. Yämike Aisaxu inäkän yiwikge natäke yäningyäpiwän, uwomu teke, kewu gusitdä akonggak käwut päku yiwikin. Tiwänä hängänä undä wawakngä Aisakgekän pengämikut.

<sup>7</sup> Abrahamu krismanä unekänu 175 yiwikut. <sup>8</sup> Bänip kwikwixune krismasu naxälä yiwixäwik, äminäläke hikngä tikut. Tike kungäke, bapunä tupä kumgingde kukut.

<sup>9</sup> Tiwänä wawakngä Aisakät Ismaelkätdä nanäle guwu täku, hupgänangu Makpela nanä däkäne tekumäläk. Makpeläxät Mamrexälu wäkngasim wäkngasim. Tiwän hupgänangu undäkä Epronde kewune yiwixakut. Epronu Hit nanä, tiwän Soharde wawak. <sup>10</sup> Kep, hupgänangu undäkä yangu mängätnä Sara tewikge natäkengu, Abrahamdä Hit nanäle kätaxune tupä auhike, mängätnä Sara hupgänangu undäkäne tekut. Ge inä kupänkäyā, wawakngätä undäkänekän tekumäläk.

<sup>11</sup> Abrahamu kupänä, wawakngä Aisaxu Anätutä bänip kwikwik imixawän, Käluk Yiwixäwik Nanduxak Töpäle Yanggäle\* wäkngäsim yiwikut.

### *Ismaelde wawak täkwäk*

<sup>12</sup> Wamu aläknga Abrahamkät Hagarkätde wawaxu Ismaelde wam. Hagaru Isip nanä uläpä Sarale puyä äminde yiwikulunin. <sup>13</sup> Wawakngä Ismaelde wawakge umanu yakap täpänetä ku wasekngä täpäne using. Yakap täpä Nebaiot, ile mehene Kedar, ile mehene Adbel, ile mehene Mipsam, <sup>14</sup> ile mehene Misma, ile mehene Duma, ile mehene Masa, <sup>15</sup> ile mehene Hadad, ile mehene Tema, ile mehene Jetur, ile mehene Napis, tiwänä wäsekngä täpä Kedema.

<sup>16</sup> Ismaelde wawaxu 12 uläkwäxu yolu inäinä gäpanggäpang ku pahake yiwitäke kukin. Tikengä yolu unggäpanggäpang pahakinde kuhiläle inä yiwitäke kukin. Yolu u ku

† 24:62: Negep Gatäkgatäk wamu Yakap 12:9-de temginune känangge. § 24:62: Käluk Yiwäxäwik Nanduxak Töpäle Yanggä Yakap 16:14 une känangge. \*\* 24:63: moyo tihikuhika Wamu Hibrü wamune temginu aläknga yäpuli kätak hikngä donatäxaying. \* 25:11: Käluk Yiwäxäwik Nanduxak Töpäle Yanggä Yakap 16:14 une känangge.

pahake yiwikin wopwomu bapunä mahande alake yiwikindä yot umanu bapunä yakawu u yiwikinde uman yänikin.

<sup>17</sup> Ismaelu krismasnä 137 yiwike kumgut. Kungäke bapunä tupä kumginde kukut. <sup>18</sup> Tixawän bapunä mahande alakindä kewu Hawilaxät Surkätde bänäkängän päku yiwikin. Hawila Sur yangu Isipkät Asurkätde bänäkän yiwikumäläk, tiwän Isipde wäkngäsım. Ismaelde bapunätä Aisakge bapunä tokngä dayipä yäkwälexäyä usinggän pahawä yiwixakin.<sup>†</sup>

*Aisakgä Isoxät Jekopkät towikut*

<sup>19</sup> Wamu alakngä Abrahamde wawaxu Aisakge wam.

Abrahamdä wawakngä Aisak towimbän, <sup>20</sup> Aisaxu krismasnä 40 yiwikengä, mängätinä Rebeka täkut. Rebekale nanäle umanu Betuel. Tiwän haminäle umanu Laban. Betuel yänggwälu Aram nanä. Tiwän kewu Mesopotemia yiwixakin. Ge ile yäpa Aisakgä täkut.

<sup>21</sup> Täkutnä engang hongge yiwän, mängätinäle natäke, Aisakgä Yawe tumuk wam inikut. Iniwän Yawetä gatängämän, tängene kayä tikut. <sup>22</sup> Rebekale bäniwune engangu täpäyalatä yiwike, mingäle bänipkätan amgumälak. Tiwän “Usingu inaleka tinggak?” yake, Yawele yawänyak tahakut.

<sup>23</sup> Tahawänu Yawetä using inikut.

“Tängäkane engangu täpäyalä. Tiwän uläpäyalu kantri gäpangalä äpme upuke yiwisimäläk.

Tikengä gäpanggutä äpme kitokake, notnä yapmitning.

Tiwän payänä ulapnäle gepbine äpme yiwik,” yang inikut.

<sup>24</sup> Ge täpduxu engang dayike päkut gwenune wawakngä ukgatäp dayike päkut.

<sup>25</sup> Wawakngä yakap apgut täpäle guwu gämänä, tiwän dänggämnämbamgän. Tiwän umanä Iso yang inikin. <sup>26</sup> Tiwänä mahande apgulu payänäle bäläng tänggänggänuxäwik apän, umanä Jekop<sup>‡</sup> yang inikin. Aisaxu krismasnä 60 yiwixawän, mängätinä Rebekätä wawakngä uläpäyalu une dukngikut.

*Isotä ulapnä “Hängä nätä pängängäsä, gätä täke päpiläk” yang inikut*

<sup>27</sup> Tiwänä yiwitake kuhika, wawakngä uläpäyalu inulung täpäyat tike, Iso songäne tihikuxäwik, kälawu buläkän sipmäkakut. Tixawän Jekowu selyot däkändäkäne säkge yiwixakut. <sup>28</sup> Aisaxu kälaptuk näpikge täke hikngä nätäxakut. Ge wawakngä Isole ilakngä hikngä natängämikakut. Tixawänu Rebekatä Jekopde ilakngä hikngä natängämikakut.

<sup>29</sup> Gwendune Jekowu nak haxawän, Iso songänetä nakngäle hikngä tixawä apgut. <sup>30</sup> Apu Jekowu using inikut. “Nakngale hikngä tikaying. Ge gapek salinu gämänä uhanggaläxu notnä yupsäng nami nänggäwa,” yang inikut. (Ile tiwän Iso umanä täkngatu Idom<sup>§</sup> yang inikin.)

<sup>31</sup> Iniwän Jekopdä using inikut. “Gätä gämäk alakuläk. Ge nanitdä kupänu, ile hängäläpä meyä päpiläxunin. Tike gätä ‘Hängä wawakngä yakap täpätä päkayingu gätä täke päpiläk,’ yang naniwi, naxu äpme gamit,” yang inikut.

<sup>32</sup> Iniwän Isotä inikut. “Nä nakngale hikngä tiwä axumnanggenggat. Hängä uläk-wäkke inale natäpit?” yang inikut.

<sup>33</sup> Iniwän Jekopdä using inikut. “‘Anätule umande wamu hiyäkände hikngä yänggat’ yang naniwiyä gamit,” yang iniwän, Isotä “Hängä uläk-wäxu täke päpiläk,” yangu Anätule umande inikut.

<sup>34</sup> Iniwänä Jekopdä bret gapek salin yang imän naxäwik, yanggä tängopgut. Tikengä enake, teke kukut. Unin tahake, Iso wawaxu yakap täpätä pänangäsä hängä hapduke, ulapnätä päpikge inikut.

<sup>†</sup> 25:18: tokngä dayipgin Wamu aläknga yäpulinä kätak hikngä donatäxaying. <sup>‡</sup> 25:26: Hıbru wamune ‘Jekop’ yangu yäpuli ‘Bälängä tänggänggänukgak’. Hıbru nanätä “Äminu uläpä kem tahanggak” yänıngge natäkengı “Bälängä tänggänggänukgak,” yang yäkakin. <sup>§</sup> 25:30: Hıbru wamune ‘Idom’ äwä ‘gämänä’ yangu guläkgnä usäkän bimä.

## 26

*Aisakät Abimelekät*

<sup>1</sup> Kewu uwomkätanu gusit täpduk tiwän, naxu wenä hikngä tikut. Gusit täpduxu Abrahamdä yiwixawän tikut usinggän tikut. Tiwän Aisaxu kantri Filistiale kewune, taunu Gerar unggäpangune päku yiwikut. Täpduxu uwomune Fisilitia nanäle kingge Abimelekgä yiwikut.

<sup>2</sup> Tiwänä Yawetä apu Aisaxu using inikut. “Isiwu mawäpu yiwiyo. Tike kewu nätä ganiwit womune yiwiyo. <sup>3</sup>Täpduxu womduhimu kewu awomune yiwixayo. Tixawän nä gäxät gatäke yiwixäwik, bänip kwikwik gamit. Wamu nina umande Abrahamu kitokngä inikumde, gä bapuka mahande alatning yangge kewu awopwomu undä äpme damit <sup>4-5</sup>Abrahamdä wamu imikum, mämä wamna imikum yangu undä hikngä täwakut. Ge ile natäke, nätä pahawa, bapuka kuminamu yekäwune nanä bimä meyä hikngä tiwä, kewu awopwomu undä damit. Tiwän bapuka mahande alatningge tiwänu, kantri kewune nanä undä bänip kwikwik päning,” yang iniwän, <sup>6</sup>Asaixu Gerar yiwikut.

<sup>7</sup> Tiwän äminu uwomune nanätä Rebeka kake, “Mängälä aläpä däsäka?” yang iniwä, Asaixu using natäp gut. “Rebeka gwälam hikngä. Ge ‘mängätna’ yäwa, Rebekale tahakengu, wäwi ane nanätä änuwä kungäxäwa täningunin,” yang natäke, “Hamina,” yang yänikut.

<sup>8</sup> Tikengä Aisaxu uwomune belakngä womsim yiwikut. Ge gwendune Filistia nanäle kingu Abimelekgä winduane hapäpu kaxawänu, Aisakgä mängätinä Rebeka tänggäwän kakut.

<sup>9</sup> Kake Abimelekgä Aisaxu yatäwämbän apän, “Mängälä uläpä mängätäda tiwändeyä ‘Hamina’ yangu kemu inale yakuläk?” yang inikut.

Iniwän Aisakgä, “‘Rebekale tahake nutnäng,’ yake yakum,” yang inikut.

<sup>10</sup> Iniwän “Gä ninde usingu dasingge tahakuläk? Wäwi täpätutä mängätädxälü äyiwikin gämu, gätä tahake meyä nimim,” yang inikut.

<sup>11</sup> Tikengä Abimelekgä äminbamde mämä wamu using yatewän kukut. “Äminu täpätutä wäwi aläpä bä mängätinä meyä imänu, uläpä kupsäle tängutning,” yakut.

<sup>12</sup> Kewu uwomune Aisakgä nak puyä pahakut.\* Tiwän Yawetä bänip kwikwik imän, krismasu unggwenu naxu meyä hikngä alakin. <sup>13</sup> Tiwän Aisaxu hängänämbamgän tiwä, hängänä meyä tinggäwä, hängänämbämngän hikngä tikut. <sup>14</sup> Aisakge towiyä gämän, sipsip, äwä puyä ämin yangu meyä hikngä tiwä, äminu Filistia nanätä “Hängä uläpäläpä nihä pänangäsä,” yang natäke, Aisaxu mähe natängämikin. <sup>15</sup> Mähe natängämixäwik, yanggä gäpma undä nanä Abrahamde täpduxune puyä äminätä kwayikin däkändäkä, Filistia nanätä kepdä kwayipänguhikin.

<sup>16</sup> Tiwän Abimelekgä Aisaxu using inikut. “Gä kitokngäka inulung hikngä alik. Ge nipmake kunggayo,” yang inikut.

<sup>17</sup> Tiwän Aisaxu uwomu teke, Gerar Kupi päku selyotnä täpiké yiwikut. <sup>18</sup> Tikengä yanggä gäpma nanä Abrahamde täpduxune kwayikinä, Abrahamdä kungäxawän, Filistia nanätä kwayipänguhikinu, Aisakgä hipdu kwayipäpän täkawä, umänä inäinä nanätä yänikut using yänikut.

<sup>19</sup> Tiwänä kupi unggwenune Aisakge puyä ämindä kep kwayike, yanggä akondokayingu däkätu kakin. <sup>20</sup> Tiwändeyä äminu Gerar nanä kälap daying yiwixaying äwä äminu Aisakge kälap daying yiwixaying yanggä yanganike, Gerar nanätä “Yanggä gäpma undäkä nindäne,” yang yakin. Ge Aisakgä yanggä gäpma undäkä umänä Esek† yang inikut, inale ile tahake yanganikin.

<sup>21</sup> Tiwänä hipdu yanggä gäpma däkätu kwayiwä teyä ilexäyä äyanganikin. Tiwän umänä Sitna‡ yang inikut. <sup>22</sup> Tikengä uwomu teke päku womdune yiwiike, hipdu yanggä gäpma däkätu kwayiwä, undäkäle doyanganikin. Tiwän Aisakgä “Yawetä kewu

\* 26:12: Naxu tämbäm salin bimäle salinu mumbän kukin. † 26:20: Esek yangu yäpuli ayanganinying. ‡ 26:21: Sitna yangu yäpuli iwaliwal.



wangga womdu animinggakngä, engangu meyä dukngitna sakngälatning,” yake, umanä Rehobot<sup>§</sup> yang inikut.

<sup>23</sup> Tiwänä uwomunetä Berseba koptut. <sup>24</sup> Tiwän Yawetä kupilä unggwenune apu inikut. “Nä nangga Abrahamde Anätu. Manaxälayo, inale nä gäxät yiwixamäk. Puyä ämina Abrahamde tiwän, äpme bänip kwikwik gama, bapuka meyä yiwitning,” yawän, <sup>25</sup> Aisakgä alta tahake, Yawele tumuk inikut. Inikengä selyotnä une tapikut. Tiwän puyä äminätä yanggä gäpma däkätu une kwayikin.

<sup>26</sup> Tixawänu King Abimelek, Ahusat inä kingge natändetdet iminggaxu uläpä, äwä Fikol amäk äminäle kuhiläle yiwixaxu uläpä yangu Gerar teke, Aisakge apgin. <sup>27</sup> Apä Aisakgä “Näle mähe natake, nawämbä apgum. Tiwändeyä näle inale apukaying?” yang yänikut.

<sup>28</sup> Yäniwän, using yakin. “Yawe gäxat gatäke yiwimäläxu alänggämän hikngä kamäng. Ge using yamäng. Anätule umande hiyäkän wamu kitokngä yänim, nitkät, gäxälun. Kontrak tahana, <sup>29</sup> gindä ninu manhipnong. Nindäxäyä gä donggukumäng. Tike gäle täkekän tahake, bänip kwikwixune tena apguläk. Tiwän äpmanu Yawetä bänip kwikwik gaminggaxunin,” yang inikin.

<sup>30</sup> Tiwänä Aisakgä naxu meyä hängyämän, naxu naxäwik, wainkät tängopgin.

<sup>31</sup> Kwepdätä gwäsi hikngä, Abimelek Aisak yanggä “Amäxu dolahakahim” yangu Anätule umande yawät kitokakut. Tiwänä Aisakgä bänip kwikwixune pewän kukin.

<sup>32</sup> Täpduxu unggwenunekän, Aisaxu puyä äminätä apu yanggä gäpma kwayikindäne using inikin. “Gäpma kwayike yanggä axamäng,” yang iniwä, <sup>33</sup> umanä Siba yang inikut. Tiwän äpmasimkäyä taunu unggäpangu umanä Berseba.\*\*

#### *Aisakge wawaxu Iso mängätnä malä nanä päkut*

<sup>34</sup> Iso krismasnä 40 yiwixäwixu, mängälä Hit nanä täpäyalä päkut. Beerile yäpa Judit äwä Elonde yäpa Basemat yang päkut. <sup>35</sup> Mängälä uläpäyatde tahake, Aisakät Rebekaxälu tokngä natäp gumäläk.

## 27

#### *Wam gwalängu Isotä tänangäsä, Jekopdä kukäle täkut*

<sup>1</sup> Aisaxu äminäläke hikngä tiwän, kayi kupilakin. Tiwän, wawakngä yakap täpä Iso yatäwawakut. Yatäwambän apän, “Wawaknga,” yang iniwän, Isotä “Nan, nä äna an. Inale yänggaläk?” yang inikut.

<sup>2</sup> Tiwän Aisakgä “Natäpso. Nä äminäläke alit. Unggwenune kupit yangu donatät. <sup>3</sup> Ge kwälemdaxät käsimakaxälu päke, songäne ku, kälaptuk tängutäkapu namiyo. <sup>4</sup> Alänguke täkapungu, naxu kxälä hikngä nätä näpitde natäxat using häke, päkapu nami näpit. Tikengä wam gwaläng gamikengä, kupit,” yang inikut.

<sup>5</sup> Wamu Aisakgä wawakngä Iso inikulu Rebeka änatäng yiwixawän inikut. Ge Iso kälaptuk ku sipmäpäkapikge songäne kuhinggawänä, <sup>6</sup> Rebekatä wawakngä Jekowu using inikut. “Natäpso. Nanggatä notda Iso using inihiwän kat. <sup>7</sup> ‘Kälaptuk tänguke, naxu kxälä hikngä nätä näpitde häke, päkapu namiyo. Tiwän Yawele kayine wam gwaläng gämäk gamikengä kupit,’ yang inik,” yang inikut.

<sup>8</sup> Tikengä unetäkänu using inikut. “Wawaknga, kätak hikngä natake, wamu angganiwit using hikngä tahayo. <sup>9</sup> Meme dämänune ku, meme mätexu nomän hikngä gwenälä päkapu namiyo. Tiwän naxu kxälä hikngä nangatä näpikge natäxak using hikngä hängämit. <sup>10</sup> Tiwänä nangatä näpikge täku imiyo. Tiwän wam gwalängu gamikengä, kupik,” yang inikut.

<sup>11</sup> Iniwändeyä Jekopdä mingä Rebeka using inikut. “Notna Iso dänggämnämbamgän, tike nä usä wenä. <sup>12</sup> Nanatä gupna täpän tiwän, ‘Kem tahanggak,’ yake, wam gwaläng namikge pahawit deyä, wam wäyi namiyäk,” yang iniwän, <sup>13</sup> mingätä using inikut.

§ 26:22: Rehobot yangu yäpuli wanggä wom.

\*\* 26:33: Siba yangu yäpuli wamu kitokngä, tiwän Berseba yangu yäpuli wamu kitokngäle yanggä gäpma.

“Wawaknga, meyä using täknga apänu, nätä täke täpit. Gä manaxälayo. Tike wamu ungganinggat using hikngä täwayo. Meme ku päkapu namiyo,” yang inikut.

<sup>14</sup> Tiwänä Jekopdä ku päkapu mingäle imän, itä naxu käxälä hikngä Aisakgä näpikge natäxak using hikngä hakut. <sup>15</sup> Tikengä Rebekatä wawakngä yakap täpäle täwixu nomän hikngä kwämbälu yolune yiwikulu täke, wawakngä Jekopde pahangämikut. <sup>16</sup> Pahangämike, Jekopde kätak guläkngä yangu meme gup päke, wamäng umukut. <sup>17</sup> Tikengä naxu käxälänä käyä häkut äwä brelu häkut yangu Jekopde kätaxune pekut.

<sup>18</sup> Tiwän Jekopdä nanäle ku “Nan,” yang iniwän, nanätä “Wawaknga, apunggaläk. Gä imin?” yang inikut.

<sup>19</sup> Tiwän Jekopdä “Nä Iso, wawakga yakap täpänin,” yang inikut. “Wamu naniläxu awahat. Gwaxu ahake päkapulu enake nayo. Tikengä wam gwalängu namiläk,” yang inikut.

<sup>20</sup> Iniwän “Wawaknga, yupsäng hikngä sipmäläk,” yang iniwän, “Anätuka, Yawetä gatängamän sipmät,” yang inikut.

<sup>21</sup> Tiwänä Aisakgä using inikut. “Wawaknga, wäkngasim apso. Gä wawaknga Iso hikngämbä? Ge gupda tapa tiwik,” yang inikut.

<sup>22</sup> Tiwän Jekowu nanäle inälängän kuwän, nanätä kätakngä päke, “Guläkngä natäpa, Jekopde guläk tik. Tiwändeyä kätakngä päpa, Isole kätak tikaying,” yakut. <sup>23</sup> Jekopde kätaxu dänggämnämbamgänu payänä Isole kätak bimä tiwä, nanätä “Wawaknga aläpä Jekop,” yang doxatäpugut. Tixäwik wam gwalängu imikut. <sup>24</sup> Wam gwalängu doimixäwixu yawänyaxu hipdu using inikut. “Wawaknga Iso, gika hikngä?” yang iniwän, Jekopdä “Nä unin,” yang inikut.

<sup>25</sup> Tiwänä Aisakgä inikut. “Wawaknga, kälawu usipmäläxu käwutdu päkapu namiyo. Tiwän nake, wam gwalängu gamit,” yang yawän, päkapu imän nakut. Tixawän wainkät päkapän tängopgut. <sup>26</sup> Nakengä inikut. “Wawaknga, wäkngasim apu kis tahangamiyo,” yang iniwän, <sup>27</sup> Jekopdä apu kis tahangämikut.

Tixawän Aisakgä täwixu Jekopdä tahakutde kápäng natäxäwik, wam gwalängu using imikut.

“Hiyäkän. Wawakngale kápängu

kewu Yawetä bänip kwikwik imikut womde kápäng bimä tinggak.

<sup>28</sup> Anätutä kepda yekäpiot imän,

naxu meyä alatning.

Tämbäm salin bimä äwä wainu käluk yangu meyä hikngä gamik.

<sup>29</sup> Äminu kantri womduyine nanä puyä ämindale yiwitning.

Äminbamdä sopäsopä gäle puke, kuhilä kep däkäne päpu yamning.

Notdale bulämbam täpäle yiwi,

minggale äyinätä sopäsopä gäle puke, kuhilä kep däkäne päpu yamning.

Imin ämindäka tokngä däkä gaminingu, inäxäyä tokngä däkä päning.

Tike äminu bänip kwikwik gaminingu, inäxäyä bänip kwikwik päning,”

yang imikut, Aisakgä, wam gwalängun.

<sup>30</sup> Aisakgä wam gwalängu imipuluwänä, Jekowu nanä teke epuxukut. Tixawänu päyänä Iso kälapde kukulu apgut. <sup>31</sup> Täkapu ixäyä naxu käxälä hikngä nanäle tändäkn-gake päkapgut. Päkapuke nanä using inikut. “Nan, gwaxu asipmäke hake päkapunggalu enake nayo. Tikengä wam gwalängu namiläk,” yang inikut.

<sup>32</sup> Tiwän nanätä “Gä imin?” yang iniwän, “Nä Iso, wawakga yakap täpänin,” yang inikut.

<sup>33</sup> Iniwän natäke, Aisaxu äanaxäläxawän, kwätäläkwätälä duksäng yamuxawä, using inikut. “Kälawu imindä sipmäke päkapu namik? Gä ane doapuxawi nake, wam gwalängu äimit. Tiwän hiyäkände, hängä wam gwalängu imilu Anätutä pahawän bulä alawik,” yang inikut.

<sup>34</sup> Tiwänä Iso nanätä unin yawän natäke, butayä hikngä natäke, kwänämu bulämbam hikngä yangotikut. Yangotixäwik “Nana, näxäyä wam gwalängu änamiyo,” yang inikut.

<sup>35</sup> Iniwän nanätä “Wenä. Notdatä kem yake, wam gwalängu gäle gamitde natälu awäk,” yang inikut.

<sup>36</sup> Tiwän Isotä using yakut. “Umanä Jekop\* yang hiyäkände inikayingunin. Täpduxu gwenalä kem tahake, näle tängge yiwike, hängä nätäne päk. Nä wawaxu yakap täpänin, tiwändeyä kem tahake, wawaxu yakap täpä däkngakut. Ge hängä nätä pänangäsa, itä päpik. Ge äpmankäyā hipdu kem tahake, wam gwalängu nätäne itäkän päk. Nana, wam gwalängu tākngatu äleläkngä naminangge tinggaläk?” yang inikut.

<sup>37</sup> Iniwän Aisakgä wawakngä Iso using inikut. “Gäle bulämbam täpäle yiwän, notnāmbamkäyā ile puyä ämin dāknganingge ainit. Tiwän tämbam salin bimä wain yangu meyä päpikge wam gwalängu ile aimit. Ge wawaknga, gäle inaka gamit? Tākngatu wenä,” yang inikut.

<sup>38</sup> Iniwän Isotä using inikut. “Nana, wam gwalängu tākngatu käyā? Nälexäyā nam,” yang inike, kwänämu hipdu bulämbam tikut.

<sup>39</sup> Tiwän nanätä using inikut.

<sup>40</sup> “Kewu naxu meyä alakaying womune doyiwiläk.

Kewu yekäpiyot epukaying womune doyiwiläk.

Amäk tahakengä, naxu näpiläk.

Notdale puyä äminde yiwiläk.

Tiwändeyä mähe natäkengu, wamnä upukengä,

gika kitoxune yiwike, ile gepbine doyiwiläk,” yang inikut.

#### *Jekowu okngä Labande datäkukut*

<sup>41</sup> Nanätä wam gwalängu Jekopde imikutde, Isotä notnä mähemähe kakut. Kake bāniyāne using yakut. “Nandä kupikge däpi alinggak. Ge kupän gwäyäm yiwitdākngakengä, notna Jekowu älänguwa kupik,” yang yakut.

<sup>42</sup> Tiwänä wamu wawakngä yakap täpä Isotä yakulu iniwä natäke, Rebekatä wawakngä Jekowu yatāwāmbän apän, using inikut. “Notda Isotä gä kupsäle guwikge natäk. <sup>43</sup> Ge wamu angganiwit using pahayo. Yupsäng enake, hamina Labande Haran kunggayo. <sup>44</sup> Kuwi womduhimu ixät yiwixawät, notda bāniptoxu u natāxaxu bāniyā kwikawän, <sup>45</sup> gätä ile u pahaläkge bulāmdawik. Tiwän wamu tewa kuwänä apiläk. Tike notdatä guwän kupi, täpduxu inä gwenunekānu täpāyale natāpitde mähe,” yang inikut.

<sup>46</sup> Tikengä Rebekatä Aisaxu using inikut. “Mängälä Hit nanä Isotä päkulu uläpāyatde mähe hikngä natäke, käluk yiwitdexäyā mähe natāxat. Tiwän Jekopkäyā mängälä Hit nanä ane yiwixayingu täpātu täpänu, yiwikyiwiknga wäyi hikngä tiwixunin,” yang inikut.

## 28

<sup>1</sup> Tiwänä Aisakgä Jekowu yatāwāmbän apän, wam gwaläng imike, māmā wamu using inikut. “Mängälä Kenan nanä mahikngä tayo. <sup>2</sup> Tike Mesopotemia minggale nanä Betuelde yolune kunggayo. Ku okga Labande yäpa täpātu mängätale tayo. <sup>3</sup> Anātu Kitokngänä Käyā Täpätä bānip kwikwik gamän, engangga naxälä towimbi, sakngälake, kantrinä inätä täke yiwitnong. <sup>4</sup> Anätutä wam gwalängu Abrahamde imikulu, gä bapuka yangge damän, äminde kewu awom yiwixäläxu, gihäle täning. Kewu awomu Anätutä Abrahamde imikut. Ge unin täning,” yang inikut. <sup>5</sup> Inikengä Aisakgä Jekowu Labankät yiwisimäläkge Mesopotemia iningyāpiwän kukut. Labanu Aram nanä tiwän Betuelde wawak, tiwän Jekop, Iso yangge okngä.

#### *Isotä mängätnä täpātu hipdu tākut*

<sup>6</sup> Jekowu kuxawänä, Iso using inikin. “Nansätä Jekowu wam gwaläng imike, mängätnä Mesopotemia nanä täpātu täpikge iniwän kuk. Tiwän wam gwaläng imixāwik, māmā wamu ‘Mängälä Kenan nanä malayo,’ yang inik. <sup>7</sup> Tiwän Jekowu mingānanäle wam gwälamike, Mesopotemia axuk,” yang inikin, Ison.

\* 27:36: Gätakgätak wamu 25:26-une temginu kendeyo.

<sup>8</sup> Unin iniwä Isotä “Nanu mängälä Kenan nanäle mähe hikngä natäxakngä tinggak” yang natäpगत. <sup>9</sup> Tikengä Isotä ku, Abrahamde wawaxu Ismaelde yäpa Mahalatkäyä, mängätnäle täkut. Mahalalu Nebaiotde hamin.

*Jekopdä dambu tike, ängela dayipgut*

<sup>10</sup> Aisakgä Jekowu Mesopotemia kuwikge iniwän, Jekowu Berseba teke, Haran kuwikge kukut. <sup>11</sup> Kuhika, kewu womdune kundoke, gusilu awukukutde, une pewikge yiwikut. Tikengä petnä pewikge, huwu uwomune nanä gwendu täke, uwänenatnäle kuhiläne teke pekut. <sup>12</sup> Peke dambu tike kaxawänu, bäläng yayixu kewunetä gäkngälunekänu kwämbätdune, Anätule ängelatä epuxäwik kopä kakut.

<sup>13</sup> Tixawän Yawetä enetängä\* yiwike, using yakut. “Nä Yawe. Nä bapuka Abraham, nangga Aisak yangge Anätu. Nätä kewu awekgaläxu awomu, gikaxät bapukaxätde äpme damit. <sup>14</sup> Bapuka naxälä hikngä haluhalu bimä tining. Tixäwik uhike, gusitdä akonggak käwut, gusitdä pukunggak käwut, not käwut, äwä saut käwut yang päku yiwitning. Gäxät bapuxätde tiwän, yotyolu kewune nanä undä bänip kwikwik päning. <sup>15</sup> Natäpso. Nä gäxät yiwike, sawomuneka kuwiläxu, anggandung yiwit. Tikengä kewu awomune gä hipdu täkapit. Gä donggäpmakuwit. Tike hiyäkän wamu ängganit usingu äpme pahawit,” yang inikut.

<sup>16</sup> Tiwänä Jekowu petnä pekulu enake, using natäpगत. “Hiyäkände, Yawe ane yiwixak. Tiwändeya nä usingbä yangu donatät,” yake, <sup>17</sup> anaxälake, “Kewu awomu inätä hikngä. Awomu Anätule yot, gäkngätde yämä hikngä,” yakut.

<sup>18</sup> Kwepdätä gwäsi hikngä, huwu kupiläne uwänenatnäle kuhiläne tekut gwenu täke, mahande kaxäwik natäpningge däm täpän enawän, olip yanggätä huwu unggwenu pingyapmikut.† <sup>19</sup> Tikengä kewu uwomu umanä Betel‡ yang inikut. Tupä taunu ile wäkngäsım yiwixaxu unggäpangu Lus yang inikakin.

<sup>20</sup> Tikengä Jekopdä Anätule umande hiyäkän wamu using inikut. “Anätu, gä näxät yiwike, kahilu belakngä aläpä kuwilu, nandung yiwike, naxu änäpitde äwä täwixu äwahawitde yang namixawi, <sup>21</sup> nä meyä dowäke, nanale yolune hipdu apitnä kakengu, Yawe, Anätunale gätä yiwiläk. <sup>22</sup> Tiwän huwu däm tängenake texalu unggwenu yotdale yiwik. Tiwän hängäläpä gätä namiläxu, nätä upuke 9-u ninale pexäwik, 1-u gäle gamit,” yang yakut.

## 29

<sup>1</sup> Jekowu hipdu unetä enake kuhika, gusitdä akonggak käwut nanäle kewune kundopgut. <sup>2</sup> Kundokengu yanggä gäpma gwendu kakut. Sipsiwu yanggä unggwenunetä yämä tängokakin. Ge ile inälängänu sipsiwu täkwäkgu inätä pexawä, täkwäkgu inätä pexawä, täkwäkgu inätä pekgäwä dayipgut. Huwu yanggä unggwen tewä umukakulu kwälängä, tiwän meyä hikngä. <sup>3</sup> Ge sipsiwu undä unekän päkapukengä, huwu uhanu sipsip daying yiwixayinggä tekwämbä kuwän, sipsipde yanggä yämikakin. Tikengä hipdu tekwämbä apu umukakut.

<sup>4</sup> Jekopdä sipsip daying yiwixaying äminu using yänikut. “Not, ginu säne nanä?” yang yäniwän, “Ninu Haran nanä,” yang inikin.

<sup>5</sup> Iniwä “Nahorde bapunä Labanu axäxayingunin?” yang yäniwän, “Hii, axäxamän-gunin,” yang inikin.

<sup>6</sup> Iniwä “Labanu domalik?” yang yäniwän, using inikin. “Hii, domalik. Ätuxa. Yäpanä Reselu sipsip päke ane aapunggak,” yang inikin.

<sup>7</sup> Iniwä using yänikut. “Kanong. Gusilu dowukuk; bänäkängän yiwixak. Tiwän sipsiwu dämänäne päku penangäsä täpdukäyä dolik. Ge yanggänä yämike, hipdu päku pewä, nakngä näkänong,” yang yänikut.

\* 28:13: enetanga bä 'Jekopde inälängän' † 28:18: 'Olip' yangu pa uman. Hängä täpätu olip yanggätä pingyapmimbä, Anätule hängä hikngä däkngakakin. ‡ 28:19: Hibru wamune 'Betel' yangu yäpuli Anätule yot.

<sup>8</sup> Tiwändeyä using inikin. “U. Usingu tahanangäsändo. Tike sipsiwu undä päkapuke, hup hanu tekwämbä kuwänä, yanggä yäminim,” yang inikin.

<sup>9</sup> Tixawänu Reselu sipsip daying yiwixakutde, nanäle sipsip päke apundopgut. <sup>10</sup> Tiwän okngä Labande sipsip äwä yäpanä Resel yang dayike, Jekopdä ku, hup hanu yanggä gäpmale mawunetä tekwämbän kuwän, yanggä okngäle sipsipde yämikut.

<sup>11</sup> Yämikengä Reselu kis tahangämike, kwänämnä initikut. <sup>12</sup> Tike “Nä nanggale haminu Rebekale wawak,” yang iniwän, Reseldä ihapmäke, ku nanä inikut.

<sup>13</sup> Tiwän Labanu tälänä Jekopde yawän natäke, axäwikge ihapmäke kukut. Ku betake, kis tahangämike, yotnäne initäke kukut. Kuwän wamu undä Jekopdä natäpugulu inikut.

<sup>14</sup> Iniwän Labandä “Gä nina gup. Tiwän daknotna hikngä,” yang inikut.

### *Jekopdä Leaxät Reselkälu mängätnäle päkut*

Jekowu Labande yolone kuwän, yekäwu gwendu une yiwikumäläk. <sup>15</sup> Yiwihika Labandä using inikut. “Hiyäkän, Gä daknotna. Tiwändeyä puyä moyo dowahawiläk. Tike puyä pahaxawi, hängä inaka äpme gamit? Ge ‘Unin namiyo,’ yangu täke yäwiläk,” yang inikut.

<sup>16</sup> Labanu yäpanä täpälälä. Payänäle umanu Lea, tiwän ulapnäle umanu Resel. <sup>17</sup> Lea kayi gwälam.\* Tiwän Reselu nomnä gupnä yangu gwälam hikngä. <sup>18</sup> Tiwän Jekowu Reselde täke hikngä natäke, Labanu yäkwäle wamu using inikut. “Krismasu 7 puyä ane pahaxäwa apik. Tiwän yäpaka wasekngä täpä Reselu, mängätnäle namiyo,” yang inikut.

<sup>19</sup> Iniwän Labandä “Womdune nanäle doyämüt. Tike gäle täke. Ge näxät yiwisim,” yang inikut. <sup>20</sup> Tiwän Jekowu Resel täpikge Labande puyä krismasu 7 pahakut. Jekowu Reselde hikngä natäpugutde, krismasu 7-de natäpänu, täpduxu gwenaläkän däpi hikngä bimä tikut.

<sup>21</sup> Krismasu 7 gwenu apuxuwänä, Jekopdä Labanu using inikut. “Täpduxu namikuläxu awahat. Ge mängätna namiyo, tiwän täpit,” yang inikut.

<sup>22</sup> Iniwän Labandä naxu bulämbam hikngä gwen häke, äminu uwomune nanä undä yangyäwambän, apu nakin. <sup>23</sup> Tiwändeyä kupilä unggwenune, Labandä yäpanä Lea täkapu, Jekopde imän pekumäläk. <sup>24</sup> Mängälä täpätuxäyä, umanä Silpa, Labandä Leale puyä äminäle imikut.

<sup>25</sup> Kwepdätä tembänä enakengu, Lea kake, Jekopdä Labanu using ku inikut. “Gutongä uläknga näle inale tahakuläk? Puyäka Reselde natäke pahakum. Tiwändeyä kem yake, Lea namikuläk,” yang inikut.

<sup>26</sup> Iniwän Labandä yäkwäle wamu using inikut. “Ninu ane nanä, ulapnä gämäxu doyämikamangunin. Payänä gämäk yämikamangunin. <sup>27</sup> Lea täkuläkge, sande anggwen yiwitna puluwänä, ulapnä Reselkäyä gaminim. Tiwänä ile yäkwäle krismasu 7-u hipdu pahawiläk,” yang inikut, Labandän.

<sup>28</sup> Tiwän Jekopdä täke yawän, sande unggwenu yiwä puluwän, Labandä yäpanä Reselu mängätnäle imikut. <sup>29</sup> Imike Labandä Reseldexäyä mängälä täpätu umanä Bilha uläpä puyä äminäle yiwikge imikut. <sup>30</sup> Tiwän Jekowu Reselkät yiwike, Reselde täke hikngä natäpugut. Tike Leale using hikngä donatäpugut. Tikengä Labande puyä krismasu 7-u hipdu pahakut.

<sup>31</sup> Jekopdä ilakngäkänu Reselde tahakut usingu, Leale dolahawän kake, Yawetä Lea gatängämike tahawän, engangu dukngikut. Tixawänu Reselu engang hongge yiwikut.

<sup>32</sup> Lea tängene käyä tiwän, wawakngä täpätu dukngikut. Dukngike “Yawetä meyä pälu axak. Ge äpmanu Jekopdä näle täke natäpik,” yake, umanä Ruben† yang inikut.

<sup>33</sup> Tiwänä hipdu tängene käyä tiwän, wawakngä täpätuxät dukngikut. Dukngike “Jekopdä näle täke donatäkge Yawetä natäke, wawaknga aläpaxäyä namik,” yake, umanä Simeon‡ yang inikut.

\* 29:17: kayi gwälam Wamu aläknga yäpulinä kätäk hikngä donatäxaying. Täpätuyitä yäpulinä “kayi wäyi” yang natäxaying. † 29:32: Hibru wamune ‘Ruben’ äwä ‘meyä pälu axak’ yangu guläkngä usäkän bimä. ‡ 29:33: Hibru wamune ‘Simeon’ äwä ‘natäke’ yangu guläkngä usäkän bimä.

<sup>34</sup> Tiwänä hipdu tängene käyā tiwän, wawakngä täpätuxät dukngikut. Dukngike, “Wawakngilu täpāyalä täpātu dukngikgat. Ge Jekowu näxälu äpme gatäke yiwisim,” yake, umanä Livai<sup>§</sup> yang inikut.

<sup>35</sup> Tiwänä hipdu tängene käyā tiwän, wawakngä täpätuxät dukngikut. Dukngike, “Äpmanu Yawele uman yatängenawit,” yake, umanä Juda<sup>\*\*</sup> yang inikut. Tikengä täpduxu womsimu engangu hipdu dondukngikut.

## 30

<sup>1</sup> Reselu inäle natäpānu, engangu dukngitnangäsä dolikut. Tiwän “Ninaxäyā engangu andukngitnangäsä,” yake, payänā mähemähe kakut. Kake Jekowu using inikut. “Engang namiyo. Tike donamiläxu axupit!” yang inikut.

<sup>2</sup> Iniwän Jekopdä tokngä natäke, using inikut. “Nä Anätundo. Bänipda nätä umumba engangu dondukngiläk?” yang inikut.

<sup>3</sup> Iniwän Reseldä using inikut. “Puyä ämina Bilha äna an. Ixät peson, tiwän itä enganga äpme dukngiwik. Tiwän näxäyā engangge mingä däkngawit,” yang inikut. <sup>4</sup> Inikengä puyä äminä Jekopde imän, mängätinä däkngawän, ixät pekumäläk.

<sup>5</sup> Tiwän Bilha tängene käyā tiwän, wawakngä dukngikut. <sup>6</sup> Dukngike imän Reseldä using yakut. “Anätutä uhinggike nandupän, nä ämin nomän tiwän, tumuk wamu yäwa natäke, wawaknga namik,” yang yake, umanä Dan<sup>\*</sup> yang inikut.

<sup>7</sup> Tiwänä puyä äminä Bilha hipdu tängene käyā tiwän, wawakngä täpätuxät dukngikut. <sup>8</sup> Dukngike imän Reseldä using yakut. “Payanaxät amäxu bulämbam tahake, nätä yapmit,” yake, umanä Naptali<sup>†</sup> yang inikut.

<sup>9</sup> Lea inäle natäpānu, engangu hipdu dukngitnangäsä dolikut. Tiwän puyä äminä Silpa Jekopde imän, mängätinä däkngakut. <sup>10</sup> Tikengä Silpatä wawakngä dukngikut. <sup>11</sup> Dukngiwän kuläkake, Leatä “Näle usingu tinangäsändo teyā alinggak,” yake umanä Gad<sup>‡</sup> yang inikut.

<sup>12</sup> Tiwänä Leale puyä äminä wawakngä täpätuxät hipdu dukngikut. <sup>13</sup> Dukngiwän Leatä using yakut. “Axuläkänggat. Ge mängälä notnatä nandukengu ‘Axuläkänggax-unin,’ yang nanining,” yake, umanä Aser<sup>§</sup> yang inikut.

<sup>14</sup> Wit pänangäsä däändän tiwän, Rubendä songäne ku, songäsongä awäke napä tängäne käyā tikayingu kwämbätdule salin päke päkapu, mingä Leale imikut. Rubendä mingäle unin imän kake, Reseldä Lea using inikut. “Songäsongä salinu notnä tākembä namläk?” yang iniwändeyä, <sup>15</sup> payänätä using inikut. “Äpna aläkuläxunekän, songäsongä salinu wawakngatä namikäyā täpiläkge yänggaläk?” yang inikut.

Iniwän Reseldä using inikut. “Songäsongä salinu wawakngatä gamixu notnä namixawi, yäkwäle kupilä anggwenune pesimäläkge, Jekowu äpme gamit,” yang inikut.

<sup>16</sup> Tukwatde tiwän, Jekowu puyänetä apuxawän, Leatä ku using inikut. “Äpmanu gäxät yiwisim, inale gä songäsongä salinu wawakngatä namikgä auhit,” yang inikut. Ge kupilä unggwenune ixät pekumäläk.

<sup>17</sup> Tiwän Anätutä Leale natäke tahawän, tängene käyā tiwän, wawakngä 5 täpä dukngikut. <sup>18</sup> Dukngike using yakut. “Puyä ämina tupä apnale ima, ixät pekumäläkge, Anätutä ile natäke, yäkwäle wawaknga namik,” yang yake, umanä Isakar<sup>\*\*</sup> yang inikut.

§ 29:34: Hibru wamune ‘Livai’ äwä ‘gatäke’ yangu guläkngä usäkän bimä. \*\* 29:35: Hibru wamune ‘Juda’ äwä ‘yatängenawit’ yangu, guläkngä usäkän bimä. \* 30:6: Hibru wamune ‘Dan’ äwä ‘uhiknggike nandupän nä ämin nomän’ yangu, guläkngä usäkän bimä. † 30:8: Hibru wamune ‘Naptali’ äwä ‘amämäk’ yangu, guläkngä usäkän bimä. ‡ 30:11: Hibru wamune ‘Gad’ yangu yäpuli ‘tinangäsändo teyā alinggak.’ § 30:13: Hibru wamune ‘Aser’ yangu yäpuli ‘axuläkänggak’. \*\* 30:18: Hibru wamune ‘Isakar’ äwä ‘yäkwäle namik’ yangu, guläkngä usäkän bimä.

<sup>19</sup> Tikengä hipdu Lea tängene käyä tiwän, wawakngä 6 täpaxäyä dukngikut. <sup>20</sup> Dukngikengä using yakut. “Anätutä bänip gwalängge hängä gwälam hikngä naminggak. Ge äpmanu Jekopdä natäpänu axopit, inale wawakngilu 6 dukngikgat,” yang yake, umanä Sebulun<sup>††</sup> yang inikut.

<sup>21</sup> Tikengä womduhim yiwihikangu, yäpanä täpätu dukngikut. Dukngike umanä Daina yang inikut.

<sup>22</sup> Tiwänä Anätutä Reselde natake, gatängämike tahawän, engang alätnangäsä täke tikut. <sup>23</sup> Tiwänä tängene käyä tiwän, wawakngä dukngike, using yakut. “Anätutä mayäkngä nätäne täknga awahawän hopikaying. <sup>24</sup> Ge wawaknga täpätuxäyä anamikge natäxat,” yang yake, umanä Josep<sup>‡‡</sup> yang inikut.

#### *Jekowu hängänämbamgän tikut*

<sup>25</sup> Reseldä Josewu dukngiwänä, Jekopdä Labanu using inikut. “Nä kantrinane yotnane kunggäwitde natäxat. Ge yawi kunggäwa. <sup>26</sup> Mängätna enganga yangge natake, puyä awahanggamit. Ge nami, päke kunggäwa, inale puyä bulämbam hikngä pahalu, gika änanduläk,” yang inikut.

<sup>27</sup> Iniwän Labandä yäkwäle wamu using inikut. “Nä ilakngä nanduxaläkngä kakengu, manäpmake kuyo. Gäle tiwän, Yawetä bänip kwikwixu namixu, tuwängune apä andayitapmät. Ge maxuyo. <sup>28</sup> Tike inaleka natakekengu, täke yäwiläk, tiwän inä using gamit,” yang inikut.

<sup>29</sup> Iniwän Jekopdä using inikut. “Puyä bulämbam hikngä pahaxäwik, kälapda daying yiwixäwa, nomängän yiwiyingu, gika änanduläk. <sup>30</sup> Nä ane doapuxäwa, kälapda mätekngä yiwikin. Tiwändeyä nätä ane apuke, kälapda sänesäneka päke tihikuxäwa, Yawetä bänip kwikwik gamixawän, kälapda meyä hikngä asakngälak. Ge äpmanu nä hängäläpä nihä yänggwätsimdäne daying yiwitnangäsä,” yang inikut.

<sup>31</sup> Iniwän Labandä “Hängä ina bimä gamit?” yang inikut.

Iniwän Jekopdä yäkwäle using inikut. “Nä hängä täpätu manamiyo. Tike gätä täke yawi, hipdu sipsipda daying yiwitake kuwit. <sup>32</sup> Tewi nätä ku kälapda undä dayixäwik, sipsip mätexu dänggämnä kupilä äwä sipsip meme yangu dänggämnä tolokngä käyä yang dayike päke, ninale pewit. Puyä hipdu gäle u pahawitde bimä unin päpit. <sup>33</sup> Hiyäkände yatnä kakengu, mahande yupsäng katapiläk. Puyä pahakumde hängä u namiläxunin dayipiläkge apukengu, u namiläkätanu meme tolokngä wenä gwendu bä sipsip mätexu dänggämnä kwaxu gwendu kakengu, ‘Kukäle täkut,’ yang natäpso,” yang inikut.

<sup>34</sup> Iniwän Labandä “Täke. U yänggaläk using tahahim,” yang inikut.

<sup>35</sup> Inike teyä, täpduxu inä unggwenunekän, Labandä meme wäwi tolokngä käyä, äwä meme mängälä tolokngä käyä, äwä sipsip mätexu dänggämnä kupilä yangu undä Jekopdä inäle päpikge yakutdeyä päke, wawakngätä daying yiwitningge yänikut. <sup>36</sup> Tikengä unin päke, Jekowu une teke, kewu womdune kuxawä, täpduxu gwenalä gwendu apuxuwän, undan yiwikin. Tixawän sipsiwu notnä Labandäne peke kukinu, Jekopdä daying yiwikut.

<sup>37</sup> Tixäwik Jekopdä pa gupnä kupilä däkätuyile kätaxu käluk matake, gupnä matäwän amixawä, päpän enaxawä, gupnä käwutdu using pekut. Tiwän awäpän enakinu bäniyä kwak yiwikin. <sup>38</sup> Tiwän pa uläpäläpä memetä yanggä tängokayingune apuke dayipningge yake, gehanune wäkngasim päkapu pekut, inale meme yanggä tängopningge apuxäwixu, wäwitä mängälä une yäwäxakin. <sup>39</sup> Ge meme mängälä, meme wäwitä pa uläpäläpäle inälängän yäwäxakinde, mätekngä pexakinu tolokngä käyä.

<sup>40</sup> Tiwän sipsip äwa meme yangu dayixäwik uhinggike, sipsiwu inätä peke, meme inätä petäke kukut. Tikengä meme dänggämnä kupilä äwä meme tolokngä käyä yangu

†† 30:20: Hibru wamune ‘Sebulun’ äwä ‘nandupän kopik’ yangu, guläkngä usäkän bimä. ‡‡ 30:24: Hibru wamune ‘Josep’ äwä ‘pahawän hopiying’ yangu, guläkngä usäkän bimä. Tiwän täkngatu ‘Josep’ äwä ‘täpätuxäyä äpme namik’ yangu guläkngä usäkän bimä.

uläkwäkke nomune sipsiwu pexawän, une tahakakin. Jekopdä meme sipsip yangu using pahanggawän, meyä hikngä sakngälakakut. Tiwän kälawu inäle dayike pewän, inätä yiwä, Labande kälawu dayike, inätä pewän yiwikin.

<sup>41</sup> Kälawu kitokngänä käyätä tahaxawä, Jekopdä pa uläpäläpä kälapde kayi tängän päkapu, gehanune wäkngasim pexawän, pa uläpäläpäle inälängän tahakakin. Ge engangä tolokngä käyä pexakin. <sup>42</sup> Tiwän kälawu kitokngänä wenätä tahaxawä, pa uläpäläpä ile kayi tängänu dowexakut. Ge engangä tolokngä wenä pexakin. Ge engangä kitokngänä wenä u pexakinu Labandäne, tiwän kälawu kitokngänä käyä Jekopdäne. <sup>43</sup> Jekowu using pahanggawän, memenä sipsipnä yangu meyä tiwän, puyä äminä, kamelnä, äwä dongginä yangkäyä äwänggawän, hängänämbamgän hikngä tikut.

## 31

### *Jekopdä Laban teke datäkukut*

<sup>1</sup> Labande wawakgä Jekopde using yakin. “Naninde hängäläpä undä hikngä Jekopdä päke pahawän, hängänämbamgän hikngä alik,” yang yäxawä, Jekowu natäpğut. <sup>2</sup> Natäke Jekopdä kaxawänu Labanu tupä ilakngäkän pahakut usingu, dolahawän kakut.

<sup>3</sup> Tiwänä Yawetä Jekowu using inikut. “Awomu teke enake, hipdu notdambamde nanggale kewune kuyo. Tiwän nä gäxät kuhim,” yang inikut.

<sup>4</sup> Tiwänä Jekopdä Reselkät Leaxälu sipsipnä näkaying womune apät dayipikge natäke, wam täknga tewän kuwän, une apğumäläk. <sup>5</sup> Une kuwät dayike, Jekopdä using yänikut. “Nansä tupä näle täke natäpğut deyä, äpmanu kawa, näle usingu donatak. Tiwändeyä nanale Anätu näxät yiwixamäk. <sup>6</sup> Nansäle puyä pahake, kitokngäna mumba kuwä, gihä anandumäläk. <sup>7</sup> Tiwändeyä nansätä ‘Hängä usingusingu äpme gamit,’ yangu kem nanike, ayakulune hikngä donamikulu, täpduxu meyä. Tiwändeyä Anätutä dolewän tahawän malit. <sup>8</sup> Nansätä ‘Kälawu tolokngä käyä gäle gamit,’ yang naniwänu, mätekngä tolokngä käyäkän pekin. Tiwän ‘Kälawu guläkngä kwaxu gäle,’ yang naniwänu, mätekngä inä usäkän pekin. <sup>9</sup> Using tahake, nansäle kälawu Anätutä päxawik, nälekän namikut.

<sup>10</sup> “Kälawu wawitä mängälä yäwäxaying täpduxune peke, dambu täkngatu using kakum. Meme mängälä, wäwi tolokngä käyätäkän yäwakin. <sup>11</sup> Tixawän Anätule ängelatä dambu tängänekänu using yakut. ‘Jekop,’ yawän, ‘We!’ yäwa, using nanikut. <sup>12</sup> Dayixäyo. Meme mängälä, wäwi tolokngä käyä gwenggwendäkän yäwäxaying. Nätä using tahaningge tahat, inale wäyi täkngaläknga Labandä gäle u pahanggaxu andayit. <sup>13</sup> Nä Anätu, gäle Betel apğum täpänin. Uwomune huwu gwendu däm tängenake, olip yanggätä huwu unggwenu pingyapmike, näle gepbine yiwiläkge hiyäkän wam yakuläk. Ge kewu awomu teke, kewu alakuläk womune hipdu kuyo,’ yang nanikut,” yang yänikut.

<sup>14</sup> Yäniwän Reselkät Leaxätdä using inikumäläk. “Nanitdä hängä täpätu nitde hikngä niminangäsändo, <sup>15</sup> inale itä nindupänu, nilu malä nanä tinggaxunin. Nilu moningge pewän uhiwi, moningu u päkulu undä amumbän kukin. <sup>16</sup> Hängä täpä undä nanitde kätaxune Anätutä päkulu, nit äwä engangit yangge hängä. Ge Anätutä dasingga ganikulu using tahayo,” yang inikumäläk.

<sup>17</sup> Tiwän Jekowu tändäkngake, mängätnä engangä yangu päko kamel tängäne peke, <sup>18</sup> kälapnä äminsak, hängänä Mesopotemia päkut yangu undä yäning yäpiwän kuxawä, nanä Aisakge, Kenan kuningge kukin.

<sup>19</sup> Labanu sipsip dänggäm matäwikge kuxawän, Labandä ‘anätuna’ yake ämindäkän kwätäluke yotnä pexakut täpäläpä, Reseldä kukäle päkut. <sup>20</sup> Jekopdä Laban Aram nanä uläpä axanghopike, “Using kukamäng” yangu doinixawik, <sup>21</sup> hängä täpänä undä wepdäkän päke, Labanu teke, datäkuhika, ku Yanggä Yupretis Dupi yayike, Gileadkätanu täwalnä käyä womune kuningge kukin.

### *Labandä Jekop täwakut*



<sup>22</sup> Tápduxu gwenalä gwendu apuxuwän, “Jekowu using datäkukut,” yang iniwä natake, <sup>23</sup> Labandä notnämbam yapäpän, Jekowu täwäläke kukin. Kuxawä täpduxu 7 apuxuxawän, kungu Gileadkätanu täwalnä käyä uwomune kakin. <sup>24</sup> Tiwän kupiläne Labanu petnä peke, dambu tike kaxawän, Anätutä apu using inikut. “Yäko. ‘Jekowu tokngä wamu mainiyo,” yang inikut.

<sup>25</sup> Jekopdä selyotnä Gileadkätanu täwalnä käyä uwomune täpikutnä kake, Labande notnämbamkäyä uwomunekän päkapu, selyotnä tapike yiwikin. <sup>26</sup> Tiwän kwepdätä Labandä ku, Jekowu using inikut. “Amäk ämindä amäk tahake, iwalnä kalabusde päke kukaying usingu, yäpana inale nandunghopike päkapguläk? <sup>27</sup> Wepdäkänu inale datängapguläk? Ananikuläk gämu, gita hikwak yang päke tayike kuläkake, galak wamu ganinayä apim. <sup>28</sup> Yäpana bapuna yangu kisu dolahangyämike, galak wamu doyanixäwa, päke apguläk. Wäyi täknga tahakuläk. <sup>29</sup> Nätä meyä täknga andaminangäsä. Tiwändeyä kupiläne nanggale Anätutä using nanik. “Yäko. Jekowu tokngä wamu mainiyo,” yang nanik. <sup>30</sup> ‘Nanäle yolune kuwikge alahambänipdake kukut’, yangu anatät. Tike teyä anätuna kukäle inale päkapguläk?” yang inikut.

<sup>31</sup> Iniwän Jekopdä yäkwäle wamu using inikut. “‘Yäpanä inäle päyäk,’ yake naxälake, päke apgum. <sup>32</sup> Tike anätuka uläpäläpä imindäka päkutnä kakengu, uläpä axupik. Ge hängä gätäne näle hängä täpaxätan yiwixawä kakengu, notnitde kayine gikale päyo,” yang inikut. “Reseldä Labande anätu uläpäläpä awakut,” yangu donatäxäwik yakut.

<sup>33</sup> Tiwänä Labandä Jekopde selyot, Leale selyot, äwä mängälä puyä äminu uläpätde selyot yangune ko dengwäsike, yäwambän malikin. Tiwän Reselde selyolune kopgut. <sup>34-35</sup> Nanä Reselde selyolune doxoxawän, Reselu pilo kamel tängäne teke puku yiwixakulu, yotnäne täko tekutnä, anätu uläpäläpä ile kematkätan peke, ulängäne puku yiwikut. Ge nanätä ko yäwambänu, Reseldä nanä using inikut. “Bulämbam täpäna, tokngä manatängamiyo. Nä yekäp iwat titde, kayikane däm hikngä enatnangäsändo,” yang inike, ulängäne puku yiwixawän, yäwambän maliwä, teke epuxukut.

<sup>36</sup> Tiwänä Jekowu tokngä natake, Labanu using inikut. “Ngä nä mämä wamu dasä täknganin upukum? Ngä wäyi ina tahakumde näwäläkapguläk? <sup>37</sup> Gätä näle hängäläpä undä hikngä dengwäsike dayiläk. Tikengu, gäle hängä täpätu undanu, ina bima kake täläk? Using kakengu, ane gäxät nanä äwä näxät nanä yangge bänäkän täkapu teng. Tiwän itä yanguhinggixut.

<sup>38</sup> “Nä gäxälu krismasu 20 yiwikumäk. U yiwikumkätanu sipsiwu mängälä meyä dowäke, engangä täkekän pekin. Memexäyä usäkän. Tiwän gäle sipsiwu wäwi gwendu donäpa tikut. <sup>39</sup> Kälapda kälap tukgä sipginu, gäle dowäkapu tahawa dayipguläk. Tike ninane nanä päke ile tangge pekum. Tike kälapda kwakäpäne bä kupiläne päkindexäyä, usinggän yäxawi, tangäle gamikum. <sup>40</sup> Using yiwikum. Kwakäpäne gusilu pälangä hikngä nahikakin. Tixawän kupiläne kwäman hikngä tixawä gäkäxäwik, petna dowekakum. <sup>41</sup> Krismasu 20 gäxät yiwikumäxu using hikngä tahaxäwik yiwikum. Yäpaka päpitde, puyäka krismasu 14 pahanggamikum. Tikengä sipsip meme yang päpitde, krismasu 6 pahanggamikum. Tiwändeyä ‘Unin pahawi, usingusingu ämpe gamit,’ yang nanikuläxu, ayakuläxune donamikuläxu täpduxu meyä. <sup>42</sup> Bapuna Abraham äwä nana Aisak yangge Anätu, Aisakgä äanaxäläkakulu Anätu uläpä, näxälu doyiwxamäk gämu, gätä hängä täpätu donamixäwik, moyo anäwambi kuwam. Tiwändeyä tokngämbamu u päke, puyä kitokngä u pahakakumu, Anätutä andayipgut. Ge kupiläne ile tiwän, Anätutä ganinggämätak,” yang inikut, Jekopdän.

#### *Jekopkät Labankätäda kontrak tahakumäläk*

<sup>43</sup> Tiwän Labandä Jekowu yäkwäle wamu using inikut. “Mängälä aläpäyalu, näle yäpa. Tiwän engangu aläkwäxu näle bapuna. Tiwän sipsip meme yangkäyä nätäne. Hängä andayixäläxu, undä nätänekän. Tiwändeyä yäpana, bapuna yangge, dasingga alahawa teyä, näxälu doyiwitnimnä tinggak. <sup>44</sup> Using tiwänu kontrak tahahim. Ge mahande ile natake, ‘Wamu kitokngä using yakumäk,’ yangu anatäpsim,” yang inikut.

<sup>45</sup> Tiwän Jekopdä huwu gwendu täke, däm täpän enakut. <sup>46</sup> Tiwän, notnä hup päkapningge yänikut. Yäniwän huwu päkapu unekändäkä pekin. Peke une yiwiki, naxu unekän nakin. <sup>47</sup> Huwu unekändäkä u pekinu, Labandä umanä Jegar Sahaduta yang iniwän, Jekopdä Galet yang inikut.\*

<sup>48</sup> Labandä “Huwu aläkwäxunin dayixäwik, ‘Labankät Jekopkätdä wamu kitokngä yakumäläkgäne’ yang natäpna kuwik,” yang yakut. Ile tiwän umanä Galet yang inikin. <sup>49</sup> Umanä täkngatuxäyä Mispä† yang inikin, inale Labandä using yakut. “Nilu nihänihä yiwisim tiwändeyä dasingga pahahimu, Yawetä äpme ninduxäwik. <sup>50</sup> Gä yäpana päke päku, kätaxu dondaying yiwiläk, bä mängätä käluk täpambä täpiläkge natäpiläk. Tike ‘Kepämindä donanduying,’ yang natäpiläk. Tiwändeyä Anätutä anidupik,” yang inikut.

<sup>51</sup> Tikengä unetäkänu using inikut. “Dayipso. Huwu däm yiwixak gwen äwä huwu nit bänäkängän pelu aläkwäk yang dayipso. <sup>52</sup> Huwu anggwen äwä huwu aläkwäk yangu, wamu kitokngä yäkämäk täkngale tuwängge yiwitning. Nätä huwu aläkwäxu doyapmike, ku tahawa maliwiläk. Tiwän gätäxäyä usinggän. Huwu aläkwäxu doyapmike, apu tahawi maliwit. <sup>53</sup> Abrahamde Anätu, Nahorde änätu, äwä ile nanäle anätu yanggäyä gäxat näxälu uhinggitning,”‡ yang inikut.

Tiwänä Jekowu wamu kitokngä Anätu nanä Aisakgä naxälakakulu uläpäle umande yakut. <sup>54</sup> Yake täwalu undäkäne kälap tänguke, käwutdu Anätule ofa tahake, käwutdu häke, notnämbamu yangyävambän apä nakin. Tikengä täpduxu unggwenune däpmunä täwalu undäkäne pekin.

<sup>55</sup> Tiwän kwepdätä gwäsi hikngä enake, Labandä yäpanä bapunä yangu kis tahangyämike, galak wam yänikengä, äminu unuxät kukinu hipdu päpän, yotnäle kukin.

## 32

### *Jekowu Iso kawikge tändäkngakut*

<sup>1</sup> Labanu yotnäle kuxawänu, Jekopkäyä äenake kukut. Kahit täpäne kuhikangu, Anätule ängela dayipgut. <sup>2</sup> Dayike “Kewu awomu Anätule ämindä yotde äpmandähimdekän päkapu yiwixaying,” yang yake, kewu uwomu umanä Mahanaim\* yang inikut.

<sup>3</sup> Tikengä Jekopdä puyä äminä kantri Idomkätanu kewu Seir uwomune ku, payänä Iso yawä natäpikge yänikut. <sup>4</sup> Using yänikut. “Bulämbam täpäna Iso wamu using ininong. ‘Puyä ämindä Jekopdä using yak. Labankät yiwihika aapunggat. <sup>5</sup> Nä towiyä gämäna, donggina, sipsipna, memena äwä puyä ämina yangu käyä. Ge bulämbam täpäna, wamu aläknga gäle tewa apunggak, inale gätä bänip gwaläng natängamiläkge natät, yang ninik, tiwän apumäng,” yang ininong, Ison,” yang yänikut. Yänike yäning yäpiwän kukin.

<sup>6</sup> Ku inike, Jekopde hipdu apgin. Apu using inikin. “Payäka Iso axu inikumäng. Tiwän änggandupikge, äminu 400 päpän ixät using apäyak.” yang inikin.

<sup>7</sup> Tiwän äanaxälake, meyä hikngä päxäwikgän, äminu ixät kukin, sipsipnä, memenä, towiyä gämänä äwä kamelnä yang upuke, täkwäkgu inätä päku peke, täkwäkgu xäyä inätä päku pekut, <sup>8</sup> inale using natäp gut. “Isotä apu yakap täkwäk sipänu, mahan yiwitning täkwäxu andatäkuwä, dosipik,” yang natäp gut.

<sup>9</sup> Tikengä tumuk wamu using yakut. “O Anätu bapuna Abraham äwä nana Aisak yanggäne, O Yawe, gätä using nanikuläk. ‘Kantrika alakuläk womune kuwi, nätä gatänggama, täkekän yiwiläk,’ yang nanikuläk. <sup>10</sup> Nä puyä ämindä, tiwän umana wenä. Tiwändeyä gätä näle iwikge natäxäwik, gwälam hikngä tahanggaläxunin. Yanggä Jodan Dupi tupä yayike apgumkätanu, hängäna wenä; hiputnatäkän hanggike yayike apgum.

\* 31:47: Aram wamune, ‘Jegar Sahaduta’ yangu yäpuli ‘huwu aläkwäxu mahande dayixäwik natäpna kuwikge.’ ‘Galet’ yangkäyä yäpuli uläknganinggän, tiwändeyä Jekopdä Hibru wamune inikut. † 31:49: Hibru wamune ‘Mispä’ äwä ‘andayixak’ yangu guläkngä usäkän bimä. ‡ 31:53: Abrahamde Anätu, Nahorde anätu yangu buläkän täpä, bä inäinä yangu kätak hikngä donatäxamäng. Abraham, Nahor yangge nanä Tera anätunä meyä ile tumuk yänikut. Josua 24:2 kendetnangäsä. Ile tiwän ‘Anätunätä äpme uhinggitning,’ yang temgumäng. \* 32:2: Hibru wamune ‘Mahanaim’ yangu yäpuli yolu gäpangälä, tiwän äpmandehimdekän.

Tiwändeyä äpmanu hangäna meyä hikngä tiwän, inäinä pet; täkwäkgu inätä peke, täkwäkgu inätä pet. <sup>11</sup> Ge gatängamiyo. Gatängamike, payäna Isole kätaxune maleyo. 'Itä apu mängätna, enganga, äwä nina yangu undä nihipän kumnäm,' yake naxäläkgat. <sup>12</sup> Wamu using nanikuläk. 'Nätä äpme pahawa täkekän yiwiläk. Tikengä bapuka pahawa, meyä hikngä haluhalu bimä tiwä, kendetnangäsä doliwik,' yang nanikuläk. Ge gatängamiyo, tiwän Isotä donihipik," yang inikut.

<sup>13</sup> Inike, kupilä unggwenune, une yiwikut. Une yiwixäwik, kälawu gwenduyi bänip gwalängge payänäle imikge tuwängukut. <sup>14</sup> Using tuwängukut. Meme mängälä 200, meme wäwi 20, sipsiwu mängälä 200, sipsiwu wäwi 20, <sup>15</sup> kamelu engangä käy 30xät engangäxät, towiyä gämänu mängälä 40, towiyä gämänu wäwi 10, donggi mängälä 20, äwä donggi wäwi 10 yang imikge tuwängukut. <sup>16</sup> Kälap tuwängukengu, inäinä upuke, puyä äminu täpätu täpätule kätaxune pekut. Peke puyä äminä using yänikut. "Gindä gämäk kunong. Axunanggengu, unekän hikngä maxunong. Täkwäkgutä gämäk kuwä, bänäkänu wangga äyiwiyok. Tiwänä täkwäkgu une. Tiwän une kuningkäy, usinggän," yang yänikut.

<sup>17</sup> Tikengä puyä äminä yakap kuwikge täpä using inikut. "Axuwi payäna Isotä ganduke, 'Gä towikga imin? Kälawu imindäne yäwäxawi apukaying? Tiwän säne päke kunggaläk?' yang bä ganiwän kayo. <sup>18</sup> Tiwänu using iniyo. 'Kälawu aläkwäxu puyä äminda Jekopdäne. Itä bulämbam täpänä Isole yake namän, bänip gwalängge gamikge päkapunggat. Tixäwixu inä Jekowu äpmäxälä apänak,' yang iniyo," yang inikut.

<sup>19</sup> Tikengä puyä äminä kälawu yakap täpäle mehene päke kuwikge täpä, äwä uläpäle mehene päke kuwikge täpä, äwä une päke kuning ämin yangu usinggän yänikut. "Iso kakengu, <sup>20</sup> wamu undaninggat usinggän ininong. Tikengu using ininong. 'Puyä äminda inä Jekopkäy mahaninkätan apänak,' yang ininong," yang yänikut, Jekopdän, inale using natäpgut. "Hängä bänip gwalängge imitde pewa kuwä kakengu, bänip kwikwixu äpmembä natängamik. Ge nina kuwa nandukengu, äläkuläkawik," yang natäke, <sup>21</sup> hängäläpä gämäk pewän päke kuxawä, kupilä unggwenu Jekowu yolu äpmandekän tahake yiwikut womune inäkän yiwikut.

<sup>22</sup> Kupilä unggwenunekänu Jekopdä mängät täpäyatnä, mängälä puyä äminäle yiwixamäläxu uläpäyat, äwä wawakngä 11-u uläkwäk yang päpän, Yanggä Jabok Dupi ayayikaying womune yayike, käwutdu yänipäko pekut. <sup>23</sup> Päko peke ako, hängä täpänäxäyä yawän, puyä äminä kukindä päke, atusikäwut päko pekin. <sup>24</sup> Tixawänu Jekowu käwutdu inäkän yiwikut.

### *Jekopkät Anätuxät amgumäläk*

Tixawän äminu täpätutä apän, "Imindäka betake, kewune täpän pimapan?" yake usinggän pahaxawät, axwakawikge tikut. <sup>25</sup> Using betäxäwik, äminu uläpätä kawänu, Jekowu yapmitnangäsä doliwän, yemiyiwilune tepän, golängä wakäwakälune dekut. <sup>26</sup> Tiwän äminu uläpätä Jekowu "Tewi kunggäwa. Axwakäwikge alinggak," yang iniwändeyä, Jekopdä "Wam gwaläng gämäk namiyä, tewa kuwiläk," yang inikut.

<sup>27</sup> Tiwän äminu uläpätä "Ngä gä umanda imin?" yang iniwän, "Nä umana Jekop," yang inikut.

<sup>28</sup> Iniwänu äminu uläpätä using inikut. "Gä umanda Jekop yangu dongganikaning. Tike umanda käluk täkgna Israel yang ganikaning, inale gä ämin äwä Anätu yangu amäke yapmiläk†" yang inikut.

<sup>29</sup> Iniwän Jekopdä "Äwä gäle umanu täkembä naniwiläk?" yang iniwän, uläpätä "Umana ganiwitde inale hikngä yänggaläk?" yang inike, wam gwaläng imikut.

<sup>30</sup> Tiwän Jekopdä "Anätule nomu axake teyä doxungwät," yake, kewu uwomu umanä Peniel‡ yang inikut.

† 32:28: Hibrü wamune 'Israel' yangu yäpuli Anätuxät amänggaxunin. ‡ 32:30: Hibrü wamune 'Peniel' yangu yäpuli Anätule nom.

<sup>31</sup> Gusitdä akoxawänu, golängä andekutde, Peniel teke kukulu, amandotäke kukut.  
<sup>32</sup> Jekopde yemiwiwilune tepän, golängä wakäwakälune dekutde, Israel nanä äpmande-  
 himkäyä, kälap hakengu, hikngwämu goläng wakäwakälune nanä donäkayingunin.

## 33

*Jekopdä payänä Iso kuke kakut*

<sup>1</sup> Jekowu Peniel teke kuhika, kwayiwän enawänu, Iso äminä 400 päpän apunggäwä dayipgut. Dayike engangä upuke pekut. Leale engangu inä Leaxät peke, Reselde engangu inä Reselkät peke, puyä äminä uläpätatde engangkäyä usinggän pahakut. <sup>2</sup> Puyä äminä uläpätatkät engangäxät gämäk pewän yiwä, ile mehene Leaxät engangäxät pewän yiwä, wäseknä Reselkät wawakngä Josepkät pekut. <sup>3</sup> Tikengä inä Jekopdä gämäk täku Isole kayine kuhilä kep däkäxätan täpu temgut. Tikengä usinggän pahanggäwän, 7 tikut.

<sup>4</sup> Tixawän Isotä ihapmäke, apu Jekowu betake, kis tahangämike, kwänämnä initiwän, kwänämnä une tikumäläk. <sup>5</sup> Tiwäl matäwän, Isotä hilakengu, mängälä engangä yang yiwikinä dayike, Isotä “Äminu aläkwäk yiwiyingu imindäne?” yang inikut.

Iniwän Jekopdä “Näle engang aläkwäxun, Anätutä puyä ämindale näle bänip gwaläng natake namikulunin,” yang inikut.

<sup>6</sup> Tiwän puyä äminä uläpätatkät engangäxätdä Isotä yiwikulune hikngä päku sopä-sopä puke, kuhilä kep däkäxätan täpu yamgin. <sup>7</sup> Tiwän ile mehene Lea engangä yanggä päku, sopäsopä puke, kuhilä kep däkäxätan täpu yamgin. Tiwän wäseknä Josepkät mingä Reselkätdä päku, usinggän pahakumäläk.

<sup>8</sup> Tiwänä Isotä Jekowu using inikut. “Kälawu uläkwäxu dasingge päkapuläknä dayit?” yang iniwän, Jekopdä using inikut. “Bulämbam täpäna, gätä ilakngä hikngä nandupiläkge, gäle tiwän päkaput,” yang inikut.

<sup>9</sup> Tiwändeyä Isotä “Notna, nä usä käyä. Ge u gikale,” yang inikut.

<sup>10</sup> Iniwändeyä Jekopdä yäkwäle wamu using inikut. “Bulämbam täpäna, usingu mayäyo. Gätä ilakngä nanduläknä kakengu, hängäläpä bänip gwalängge gamilu äwayo. Nätä nomda gandulu, Anätule nomune bima kat, inale gätä näle bänip kwikwik nataläk.

<sup>11</sup> Anätutä bänip gwaläng natängamike namikut. Tiwän nä hängänambangän hikngä tikut. Ge hängäläpä bänip gwalängge päkapulu awäyo,” yake kitokänggawän, Isotä “Hii, täke,” yang inikut.

<sup>12</sup> Unetäkänu using inikut. “Nä ginkät kunim,” yang iniwändeyä, <sup>13</sup> Jekopdä using inikut. “Bulämbam täpäna, enganga kälapna yangu andayiläk. Enganga yupsängu kitokake kunangäsändo. Tiwän sipsip towiyä gämän yangkäyä usäkän. Engangä mämnä näkayingu yupsängu kunangäsändo. Äyävämä ihapmäke, täpduxu gwendunekänu malä hikngä kuhikangu, kälawu undä axumning. <sup>14</sup> Ge bulämbam täpäna, gätä gämäk kunggayo. Tixawänä puyä äminda kälapkät engangkätdä wepdä älukukaying using kuxawä, apuhikangä, bulämbam täpänale, Seir uwomune apundopnim,” yang inikut.

<sup>15</sup> Tiwänä Isotä using inikut. “Gäxät apningge äminu näxät apumängu täpätuyi yäniwa yiwixakut,” yang iniwändeyä, Jekopdä “Usingu inale tahawiläk? Gätä nä ilakngä nandupiläkgekän natät,” yang inikut.

<sup>16</sup> Tiwänä täpduxu inä unggwenunekän, Iso hipdu täpän täkwämbän, Seirle kukut.

<sup>17</sup> Tiwändeyä Jekowu Iso doläwaläke kukut. Tike Sukot kukut. Täku yotnä tahake, kälapnäle gepmä pahakut. Ile tiwän kewu uwomu umanä Sukot\* yang inikaying.

<sup>18</sup> Jekopdä Mesopotemia teke apgulu, meyä dowäxäwik apuhika, kewu Kenan uwomune taunu Sekem apundopgut. Täkapu selyotnä taunde wäkngäsım tapikut. <sup>19</sup> Tikengä kewu selyotnä tapikulu uwomde, moningu 100 silwa, Sekemde nanä Hamor yänggwätde yämikut. <sup>20</sup> Kewu uwomune alta Anätule tahake, umanä El-Elohe-Israel† yang inikut.

\* 33:17: Hıbru wamune, ‘Sukot’ yangu yäpuli gepmä. † 33:20: Hıbru wamune ‘El-Elohe-Israel’ yangu yäpuli Anätu, Israelde Anätu.

## 34

*Jekopde wawakgä Dainale tahake, äminu sipgin*

<sup>1</sup> Gwendune Jekopkät Leaxätde yäpa Daina mängälä kewu uwomune nanä dayipikge kukut. <sup>2</sup> Hamoru, Hiwi nanä uläpä kewu uwomune nanäle kuhiläle yiwixakut. Ile wawaxu Sekem. Uläpätä Daina kambutake, tänggängänuke tahawän malikut. <sup>3</sup> Tiwän Dainale natänggämätake, wamu ilakngäkän inikut. <sup>4</sup> Tikengä Sekemdä nanä Hamoru using inikut. “Mängälä aläpä näle yängamiyo. Tiwän mängätnale täpit,” yang inikut.

<sup>5</sup> Jekopde wawaxu kälawu äminsak daying yiwitningge songäne päku yiwikin. Tixawän Jekowu “Sekemdä yäpaka Daina tahawän malikut,” yawä natäpगत. Tikengu wamu täkngatu doyakut. Tike wawakngäle yiwixakut.

<sup>6</sup> Tixawän Hamor äwä wawakngä Sekem yangu Jekopkät wam yäningge, taun teke, Jekopde kukumäläk.

<sup>7</sup> “Hängä womdu using tahakin,” yangu yawä natäkengä, Jekopde wawaxu kewu uwom kuku teke, hipdu yolune apgin. Sekemdä Daina tänggängänuke tahawän malikulu, Israel\* yänggwätde kayine gutongä hikngä. Hängä dolahanangäsa täknga tahakut. Ge haminätä haminäle butayä natäke, Sekemde tokngä hikngä natäxäwik apgin.

<sup>8</sup> Ge yolune apä, Hamordä Jekowu using inikut. “Wawaknga Sekemu yäpakale hikngä natäxak. Täkebä mängätnäle imining? <sup>9</sup> Tiwän mängälä ninkätan nanä damixätna, yäkwäle nimining? <sup>10</sup> Tiwän ninkät gatäke using yiwitnim. Kewu sawomuneka yiwitningge natäkengu, gihä kake, kewu uwomune yiwitnong. Tixäwik kewu awomkätanu täkekän tihikuning. Tixäwik kewu nindäne womduyi täke päning,” yang inikut.

<sup>11</sup> Tiwänä Sekemdä Dainale nanä äwä häminä yangu using yänikut. “Gindä wamu u yäwilu ‘Täke’ yaningä kakengu, inaleka naniningu äpme damit. <sup>12</sup> Mängälä uläpäle moningu dasingdasingga damitde natäkengu, täke tuwängutning. Hängä gwälamu dasäka damitde natakengu, täke yäning, tiwänu äpme damit. Inale mängälä uläpä ahikngä naminingge natäxat,” yang yänikut.

<sup>13</sup> Haminä tahawän malikutde natäke, Jekopde wawakgä Sekemkät nanä Hamorkälu yäkwäle wamu kem yäniningge natäke, using yakin. <sup>14</sup> “Using dolahanim. Hamininu gupnä domatäkin äminde yäminangäsändo. Using tahakengu, mäyäkngä hikngä natäpnimunin. <sup>15</sup> Tike hängä täkngatukän alahangäsän. Nindä gupnin matäkumäng usinggän, ginkäyä wäwi undä gupsä matänong. Tiwänä ‘Täke,’ yangu daninim. <sup>16</sup> Tikengä mängälä mätexu damixätna, yäkwälexäyä nimining. Tiwän ninkät ginkälu u äminuninggän däknake yiwitnim. <sup>17</sup> Tike gupsä matäningge ‘Täke’ yangu doyawä, hamininu äläke kunim,” yang yänikin.

<sup>18</sup> Tiwän Hamorkät Sekemkätä natäpälü, wamu uläknga täke tikut. <sup>19</sup> Tiwän wäwi mätexu uläpä Jekopde yäpale hikngä natäpगतde, wamu yänikin using yupsäng pahakut. Äminu taunune nanätä kawä, äminu Hamorde yolune yiwixayingkätanu, Sekemu bulämbam täpä tikakut. <sup>20</sup> Ge Hamorkät wawakngä Sekemkät taun yiwixaying notnä wam yänihimäläkge, taunde yämä däkäne kukumäläk.

<sup>21</sup> Ku using yänikumäläk. “Äminu uläkwäxu notnin däknäningge tahakaying. Kewu awomu inulung. Ge täke pena, ane tihikuxäwik yiwitning. Tixawän mängälä itäne nanä päxätna, yäkwäle nindäne päning. <sup>22</sup> Tiwändeyä using niniying. ‘Nindä gupnin matäkumäng usinggän, ginkäyä wäwi undä gupsä matänong. Using tahawäyä, ninkät ginkälu u äminuninggän däknake yiwitnim,’ yang niniying. <sup>23</sup> Ge using tahakengä, ile kälap äwä hängäläpä itäne yangu, ninkäyä towikngä däknanim. Ge ‘Täke’ yangu yänina. Tiwän ixät ninkät yiwitnim,” yang yänikumäläk.

<sup>24</sup> Yawät äminu undä yämä däkäne yiwikin ‘Täke’ yake, wäwi taunune nanä undä gupnä matäkin.

\* 34:7: Jekopde umanu käluk täknga Israel.

<sup>25</sup> Täpduxu 3 gwendä apän, wäwi undä tokngä däkä päke, ‘Ämindä ämbänihipning?’ yangu donatake yiwixawä, Jekopde wawaxu, haminä Dainale natäke, Simeonkät, Livaixätdä sänggwanä päke, taunune ko, wäwi undä sipät kumgin. <sup>26</sup> Hamor, wawakngä Sekem yangkäyä sänggwatä matäwät kungäxawät, ko Daina Sekemde yolunetä täke, epuxukumäläk.

<sup>27</sup> Tiwänä Jekopde wawakgä using natäpgin. “Sekemdä hamininde gutongä tāknga taunu anggäpangune tahakut,” yake, ko äminu axumginä dayike, taunune nanäle hängäläpä undä päkin. <sup>28</sup> Sipsipnä, memenä, towiyä gämänä, dongginä äwä hängä undä taunune yiwikin, äwä songäne yiwikin yang päkin. <sup>29</sup> Tixäwik hängä nomän täpäläpä, mängälä, engang, äwä hängä yotkätan yiwikinunin yangu undä päkin.

<sup>30</sup> Tiwänä Jekopdä wawakngä Simeonkät Livaixälu using yänikut. “Gitdä meyä tāknga namikamäläk. Peres nanä, Kenan nanä yangu kewu awomune yiwixayinggä nandupä, nä wäyi ämin tinanggenggak. Ninu äminu meyändo. Undätä anihipningge yanggatake apungu, ninu undä nihipä kumnimunin,” yang yänikut.

<sup>31</sup> Tiwän yäkwäle using inikumäläk. “Haminilu Sekemdä kukäle täke tihikukulu täke?” yang inikumäläk.

## 35

### *Jekowu hipdu Betel kukut*

<sup>1</sup> Anätutä Jekowu using inikut. “Gä payäka Iso teke datäkuxawi, nä Anätu Betel apuke gandupgum. Ge awomu teke, une päko yiwixäwik, alta gwendu näle tahayo,” yang inikut.

<sup>2</sup> Tiwänä Jekopdä inäxät nana äwä ixät yiwixaying yangu undä using yänikut. “Hängä womdune nanätä ‘anätunin’ yake, ämindäkän kwätälukinä päkinu uläpäläpä amumbä kunong. Tiwän gutongä tākngaläknga teke, käluk däkgake, u tahananngge tuwängge, täwiksä käluk pahanong. <sup>3</sup> Tiwänä Betel kopnim. Ko alta Anätule tahawit. Sänesäneka tihikukumune, meyä päkum gwenggwenune yangu Anätu näxät tihikuxäwik, gatängamikut,” yang yänikut.

<sup>4</sup> Ge hängä womdune nanätä “anätunin” yake ämindäkän kwätälukinä päkinu uläpäläpä äwä mäläkäpä mäläkngäne pekin yangu undä, Jekopde imikin. Imä, Jekopdä pa kupäha bimä Sekemde wäkngäsim yiwixaxu undäkäle kematde kwayipekut.

<sup>5</sup> Tikengä kewu uwomu teke kukin. Kuxawä Anätutä pahawän, äminbamu yotyolu uwomune nanä naxäla hikngä natäke, doxu yäwakin. <sup>6</sup> Tixawän Jekop äwä äminu undä ixät kukin yangu kuhika, taunu Lus kondopgin. Lus taunu unggäpangu Kenankätan yiwikut. Äpmanu unggäpangu Betel yang inikaying. <sup>7</sup> Lus taun kondoke, Jekopdä alta gwenu tahake, kewu uwomu umanä El-Betel\*, yang inikut, inale payänä teke datäkuxawänu, Anätu uwomune apän kakut.

<sup>8</sup> Tiwänä Jekopde mingä Rebekale puyä äminu Debora une kupän, pa kupäha bimä Betelde amusikäwut yiwixak däkäne kwayikin. Kwayike pa undäkä umanä “Alon-Bakut” † yang inikin.

### *Anätutä Jekopde wam gwalängu hipdu imikut*

<sup>9</sup> Jekowu Mesopotemia teke apänä, Anätutä hipdu apu, wam gwalängu using imikut. <sup>10</sup> “Gä umanda Jekop. Tiwändeyä äpmanu Jekop yangu dongganikaning. Tike Israel yang ganikaning,” yang inikut. Using yake, umanä Israel yang inikut.

<sup>11</sup> Tikengä unetäkänu using inikut. “Nä Anätu Kitokngäna Käyä Täpä. Nätä äpme tahawa, gäle bapuka meyä sakngälake, kantri inäinä päke yiwitning. Tixäwik bapuka täpätuyi kingge yiwitning. <sup>12</sup> Tixawän kewu Abrahamkät Aisakätde yämitde yänikumu, gäle äpme gamit. Tikengä bapukalexäyä uwomuningänu äpme yämit,” yang inikut.

<sup>13</sup> Inike, Jekowu wam inikulu uwomune yiwixawän, teke kukut.

\* 35:7: Hibru wamune ‘El’ yangu yäpuli Anätu. Tiwän ‘Betel’ yangu yäpuli Anätule yot. † 35:8: Alon-Bakut yangu yäpuli pa kwänäm tikin däkanin.

<sup>14</sup> Tiwän kewu Anätutä wam inikulu uwomune, Jekopdä huwu belakngä gwendu täke, mahande kaxäwik natäpningge, däm täpän enakut. Täpän enawän, huwu unggwenu ofale wain yanggätä pingyapmike, olip yanggätäxäyä hipdu pingyapmikut. <sup>15</sup> Kewu Anätutä wam inikulu uwomu, Jekopdä umanä Betel yang inikut.

#### *Reselu Bensamin dukngixäwik kumgut*

<sup>16</sup> Tiwänä Betel teke kuhika, taunu Eprat kuningge kukin. Kuxäwik Reselu engang kake täpikge tahawän malixawän, tokngä däkä päkut. <sup>17</sup> Tinggawän mängälä anggatängämikge yiwixak täpätä using inikut. “Manaxälayo. Wawakga täpätu dukngikgaläk,” yang inikut. <sup>18</sup> Tiwän Reselu axupikge tixäwik, mepme wäseknä pexäwik, umanä Benoni yang inikut. Tiwändeyä nanätä umanä Bensamin yang inikut. ‡

<sup>19</sup> Reselu axupän, Epratde kahit kwayimune kwayikin. (Eprat yangu Betlehemde umanu tupä nanä täknganin.) <sup>20</sup> Tiwän Reselde mätmälune, Jekopdä huwu gwendu däm täpän enakut. Huwu unggwenu Reselde mätmade tuwängge äpmankäyä ayiwixak.

<sup>21</sup> Israelu § hipdu kuhika, Migdal-Eder ku yapmike täku, selyotnä tapike, une yiwikut. <sup>22</sup> Kewu uwomune yiwihika, Rubendä nanäle puyä äminu mängälä Bilha uläpaxät kopän yiwikumäläk. Tiwänä Israelu yawä natäpugut.

#### *Jekopde wawak*

Jekopde wawaxu unekänu 12. <sup>23</sup> Leale wawaxu Ruben, Simeon, Livai, Juda, Isakar, äwä Sebulun yang. Jekopde wawaxu yakap täpä Ruben. <sup>24</sup> Tiwän Reselde wawaxu Josepkät Bensaminkät. <sup>25</sup> Tiwän Bilha, Reselde puyä äminde yiwikut täpäle wawaxu Dankät Naptalixät. <sup>26</sup> Tiwän Silpa, Leale puyä äminde yiwikut täpäle wawaxu Gatkät Aserkät. Wawaxu aläkwäxu undä, Jekopdäne, Jekowu Mesopotemia yiwixäwik towikulunin.

#### *Jekopde nanä Aisakgä kumgut*

<sup>27</sup> Jekowu nanä Aisakge Mamre kukut, Abrahamkät Aisakät tupä yiwikumäläk womune. Mamre Kiriati Arba taunde wäkngäsim. (Kiriati Arba yangu taunu Hebronde umanu tupä nanä täknganin.) <sup>28</sup> Aisaxu krismanä 180 yiwikut. <sup>29</sup> Äminäläke hikngä tikengä kungäke, bapunä tupä kungäke päku yiwixakinunekän kukut. Tiwän wawakngä Isoxät Jekopkätde kwayikumäläk.

## 36

#### *Isole bapunä*

<sup>1</sup> Wamu aläknga Isole bapunätäne. Isole umanu täkngatu Idom. <sup>2</sup> Iso mängätnä Kenan nanä päkut. Täpätu umanä Ada, Hit nanä Elonde yäpa. Tiwän täpätu umanä Oholibama, Anale yäpa tiwän Hiwi nanä Sibeonde bapunä. <sup>3</sup> Tikengä Basemat, Ismaelde yäpa, tiwän Nebaiotde haminu mahandeyä täkut.

<sup>4</sup> Adale wawaxu Elipas. Tiwän Basematde wawaxu Ruel. <sup>5</sup> Tiwänä Oholibamale wawaxu Jeus, Jalam, äwä Kora yang. Wawakngä uläkwäxu, Isotä Kenan yiwixäwik towikulunin.

<sup>6</sup> Isotä mängätnä, wawakngä, yäpanä, äwä ixät yiwixaying ämin, kälapnä äminsak, äwä hängäläpä Kenan kep womune yiwixäwik päkulunin yangu undä päke, notnä Jekowu teke, kewu malä womdune päku yiwikut. <sup>7</sup> Isoxät Jekopkätde kälawu äminsaxu meyä hikngä tinggäwä, kewu itä yiwikumäläxu uwomu, songäsongä kälawu undätänetä nänangäsä dolikut. Tiwän kewu uwomunekänu yiwitnangäsä dolikut. <sup>8</sup> Tinggäwän Iso bä Idomu hängänä undä päke, Seirkätanu täwalnä käyä womune päku yiwikut.

#### *Isole bapunä kewu Seir yiwikindäne*

<sup>9</sup> Wamu aläknga Isole bapunä kewu Seirkätanu täwalnä käyä uwomune alakin täkwäkgäne. Äminu uläkwäxu äpmanu Idom nanä yang yänikaying. <sup>10-13</sup> Isole mängälü

‡ 35:18: Benoni yangu yäpuli wawaknga meyä namik. Tiwän Bensamin yangu yäpuli wawaknga aläpä bänipna.

§ 35:21: Israel yangu Jekopde umanu käluk täknganin.

Adatä wawakngä Elipas dukngikut. Tiwänä Elifasde wawaxu Teman, Omar, Sepo, Gatam äwä Kenas yang. Elipasdä mängätnä täpätuxäyä hipdu täkut. Umanä Timna. Tiwän itä Amalek dukngikut.

Isole mängälu Basematdä wawakngä Ruel dukngikut. Tiwänä Ruelde wawaxu Nahat, Sera, Sama äwä Misa yang.

<sup>14</sup> Isole mängälu Oholibama, Anale yäpa, tiwän Sibeonde bapunä uläpätä wawakngä dukngikulu Jeus, Jalam, äwä Kora yang.

<sup>15-16</sup> Isole bapunä täpätuyi yakap äminde Idom yiwikinde wam. Elipasu Isole wawaxu yakap täpänin. Wawaxu itä towimbän, yakap äminde yiwikinu umanä Teman, Omar, Sepo, Kenas, Kora, Gatam, äwä Amalek, yang. Äminu aläkwäxu Isole mängälu Adale ayinä.

<sup>17</sup> Isole wawaxu täpätu Ruel. Ile wawaxu yakap äminde Idom yiwikinu umanä Nahat, Sera, Sama, äwä Misa yang. Äminu aläkwäxu Isole mängälu Basematde ayinä.

<sup>18</sup> Isole mängälu Oholibamale wawaxu yakap äminde yiwikinu umanä Jeus, Jalam, äwä Kora yang. Oholibama Anale yäpa. <sup>19</sup> Äminu aläkwäxu, Iso bä Idomde bapunä inäinäne yakap äminde yiwikin äminunin.

#### *Seirle Bapunä*

<sup>20</sup> Äminu kewu uwomune yakap yiwikinu, Seir Hor nanä uläpäle bapunä. Seirde wawaxu Lotan, Sobal, Sibeon, Ana, <sup>21</sup> Dison, Eser, äwä Disan yang. Seirde wawaxu uläkwäxu Idomkätanu inä bapunäle yakap äminde yiwikin.

<sup>22</sup> Lotande wawaxu Horixät Hemamkät. (Lotande haminu Timna.)

<sup>23</sup> Sobalde wawaxu Alwan, Mahanat, Ebal, Sepo, äwä Onan yang.

<sup>24</sup> Sibeonde wawaxu Aixät Anaxat. Ana uläpätä nanäle donggi songäsongä näningge päke kuke, yanggä tokngä akokayingu däkätu kakut.

<sup>25</sup> Anale wawaxu Dison, tiwän yäpanä Oholibama.

<sup>26</sup> Disonde wawaxu Hemdan, Esban, Itran, äwä Keran yang.

<sup>27</sup> Eserde wawaxu Bilhan, Sawan, äwä Akan yang.

<sup>28</sup> Disande wawaxu Uskät Arankät.

<sup>29-30</sup> Ge Hor nanä uläpäle wawaxu Seirkätanu bapunä inäinäne yakap äminde yiwikinu, Lotan, Sobal, Sibeon, Ana, Dison, Eser, äwä Disan yang.

#### *Kingu Seir bä Idom nanä daying yiwikinde uman*

<sup>31</sup> Israel nanä kingge doyiwikin gwenggwenkätanu, Idom nanäle kingge yiwikinu umanä using. <sup>32</sup> Bela Beorde wawakgä Idomde kingge yiwikut. Taunäle umanu Dinhaba.

<sup>33</sup> Yiwihika Belatä kungäxawänu, kingge Jobap Serale wawakgä yiwikut. Sera taunu Bosra nanä.

<sup>34</sup> Jobapdä kungäxawänu, kingge Husamu Teman nanä uläpätä yiwikut.

<sup>35</sup> Ge Husamdä kungäxawänu, kingge Hadat Bedatde wawakgä yiwikut. Hadalu Midian nanä Moap ku sipgut täpänin. Taunäle umanu Awit.

<sup>36</sup> Ge Hadatdä kungäxawänu, kingge Samla, Masareka nanä uläpätä yiwikut.

<sup>37</sup> Ge Samlatä kungäxawänu, kingge Saul, taunu Rehobot nanä uläpätä yiwikut. Taun Rehobolu yanggä dupine inälängän.

<sup>38</sup> Ge Sauldä kungäxawänu, kingge Balhanan, Akborde wawakgä yiwikut.

<sup>39</sup> Balhananu, Akborde wawakgä kungäxawänu, kingge Hadardä däkngake taunu Pau yiwikut. Hadarde mängälu umanä Mehetabel. Mehetabelu Matretde yäpa. Matrelu Mesahapde yäpa.

#### *Isole bapunä kuhiläle yiwikinde uman*

<sup>40-43</sup> Isole bapunä sakngälake, kewu Idomkätanu inäinä päke yiwikin. Bapunä inäinä yakap äminde yiwikinu umanä using: Timna, Alwa, Jetet, Oholibama, Ela, Pinon, Kenas, Teman, Mapsa, Makdiel äwä Iram yang. Äpmanu äminu Idom nanä yang yänikayingu, Isole bapunä.



## 37

*Notnä täkwäkgä Josepde mähe natäpgin*

<sup>1</sup> Jekowu kewu nanätä yiwikulune Kenan yiwikut.

<sup>2</sup> Jekopde wawakge wam. Josewu krismasnä 17 using tixawän, Josepkät notnä täkwäkguxät nanäle sipsip daying yiwikin. Notnä uläkwäxu nanäle mängälu Bilha, Silpa yangge wawak. Tixawik notnätä gutongä dasingga pahawä dayipgulu, nanä apu inikut.

<sup>3</sup> Israelu\* äminälake alikengä, Josewu une towikutde, ile bänip gwaläng hikngä natäxäwik, täwixu gwälam hikngä kwämbätdu tahake imikut. Tike notnäle using hikngä donatäp gut. <sup>4</sup> Nanätä Josepdekän bänip gwaläng hikngä natäpän kake, notnätä Josewu mähemähe kaxäwik, wamu kätaxu doinikakin.

<sup>5</sup> Gwendune Josepdä dambu täkngatu tike enake, notnä yäniwän natake, mähemähe hikngä une kakin. <sup>6</sup> “Dambu täkngatu using tit,” yake using yänikut. <sup>7</sup> “Ninu undä puyä tängätune wit† matäke wamähikanayä, nätä wamät tupä däm enake yiwän, gindä wamäyinggä apu, nätäne tupä yiwitapä gwahawän, sopäsopä puke, däme kepkätan päpu yamäying,” yang yänikut.

<sup>8</sup> Tiwänä payänätä inikin. “Gä ninde yakapde yiwike, nindung yiwiläk?” yake, dambu ulike yänikutde, mähemähe hikngä kakin.

<sup>9</sup> Josewu dambu täkngatuxäyä hipdu tike, payänä using yänikut. “Äpmanu dambu täkngatu kaxäwa, gusit, yekäp äwä kuminamu täkwäkgu 11 yanggä näle sopäsopä puke, däme kepkätan päpu yamäying,” yang yänikut.

<sup>10</sup> Tiwänä nanätä natake, “Ina dambu tiläk?” yake ininggämätake, “Mingga, nä äwä notda yanggä gäle apuke, sopäsopä puke, dämäninu kepkätan päpu yannim?” yang inikut. <sup>11</sup> Tiwän payänä täkwäxu tokngä natäpgin. Tiwändeyä nanä dambu uläknga iwikge natäng yiwikut.

*Josewu notnätä äminde yämixäwik, moning päkin*

<sup>12</sup> Josepde payänä taunu Sekem uwomde wäkngäsim päku yiwixäwik, nanäle sipsip daying yiwikin. <sup>13</sup> Tixawän Israeldä Josewu using inikut. “Payäka sipsiwu Sekem daying yiwiyak. Ge une kuyo,” yawän, Josepdä “Hii, äpme kuwit,” yang inikut.

<sup>14</sup> Tiwän nanätä “Kuke dayipso. Payäka äwä sipsip yangu nomängänbä yiwiyak. Tikengä apu naniwiläk,” yake ining yäpiwän, Hebron Kupi teke Sekem kukut.

<sup>15</sup> Une ku payänä yäwahikunggawän, äminu täpätutä kake, “Gä ina yäwaxaläk?” yang inikut.

<sup>16</sup> Iniwän Josepdä “Nä payäna sipsiwu, säneka daying yiwiyak yake yäwaxat. Ge gätä andayiläkngä kakengu, täkembä naniwiläk?” yang inikut.

<sup>17</sup> Iniwän “Dotande kuningge yawäxakumnä, ane yiwikinu aleke, une kukin,” yang inikut. Iniwän Josewu payänä yäwatake ku, taunu Dotan uwomde wäkngäsim kuke dayipgut.

<sup>18</sup> Payänätä yiwikinune doxundoxawän, malä kuwän kake, kupsäle tängutningge wepdä wamu using yakin. <sup>19</sup> “Dambukän tinggaxu ane täpä aapunggak. <sup>20</sup> Ge tänguke, gäpma hopä yanggätä yiwikge kwayikinu däkätune mutna pukuwik. Tiwän ‘Kälaptukgä tänguke nakin,’ yang ku yänim. Tiwänä dambunä tikulu bulä ämbä alawä känim?” yang yakin.

<sup>21</sup> Unin yawä, payänä Rubendä anggatängämikge natake, “U! Kupsäle hikngä dolängutnim,” yang yänikut. <sup>22</sup> Unetäkänu using yänikut. “Dolängutna kupik. Dolänguke tokngä däkaxäyä doiminim. Tike gäpma kewu moyo womune yiwäxayingu andäkaxätan mutna pukuwik. Tiwän tokngä däkaxäyä doiminim,” yang yänikut. U yänikulu Josep gatängämike, nanäle täke kuwikge natake yänikut.

<sup>23</sup> Ge Josewu inälängän apänu, alänggänggänuke, täwikngä gwälam hikngä uxwämbät tahakulu äläpä dopgut. <sup>24</sup> Tiwän täke täku gäpma undäkaxätan mumbä pukukut. Gäpma undäkä yanggänä wenä.

\* 37:3: Israeldé u manu tupä nänä Jekop. † 37:7: Wilu rais bimä.

<sup>25</sup> Tikengä päku nakngä nake kaxawä, Ismael nanä äminu täkwäkgu Giliatkätandä apgin. Pa inuxu käpängänä käyä kamelu meyä gwenalune Isip päke kuningge päkapgin.

<sup>26</sup> Tiwän Judatä notnä täkwäxu using yänikut. “Ina gwaläng pänimde uläpninu tängut täkohopinim? <sup>27</sup> Undanä. Ismaelde bapunäle yäna, moning nimixäwik täxut, inale ulapninu uläpä daknotnin, tiwän nan notnin. Ge dolängutnim,” yang yänikut.

<sup>28</sup> Tixawänu Midian nanä une hikngä apä dayike, Josewu gäpmanetä tuliwä akopgut. Tiwän 20 sekel silwale yawä, Ismaelde bapunätä uhike, Isipde täke kukin.

<sup>29</sup> Täke kuxawäyä, Rubenu gäpma däkäne apu, Josewu wenä kake, butayä hikngä natäke, inä täwik wehikut. <sup>30</sup> Tikengä apu notnä using yänikut. “Josewu wenä xat. Ngä nanu dasing täknganin ku iniwit?” yang yänikut. <sup>31</sup> Yawän meme gwendu guläkngä matäwä, daxu apä, Josepde täwixu daxune täpä mahakut.

<sup>32</sup> Tikengä täwixu täpä mahakulu uxwämbälu nanäle täku imike, using inikin. “Täwixu axwämbät kake tämängu kätak kayo. Wawakgatänembä?” yang inikin.

<sup>33</sup> Iniwä täwixu uxwämbälunin kake “O, wawakngale täwik tinggak. Kälaptukgä alänguke yahandekke nakin,” yakut. <sup>34</sup> Yake Jekowu inä täwik wehike, täwixu butayä täkngatäne pahake, wawakngäle butayä natäxäwik, gwayamu belakngä yiwikut.

<sup>35</sup> Tinggawän wawak yäpanä undä apu “Wamwambä inina, butayä täknga natäxu bulämdawik,” yake, wamwam inikin.

Tiwändeyä “Dombulämdawit. Tike butayä natähika, ninaxäyä kungäke, axumgin amindä yiwäxayingune wawakngale kuwit,” yaxäwik, Jekowu wawakngäle kwänämu iwikge tikut.

<sup>36</sup> Tixawänu Midian nanätä Josewu Isip täke kukin. Täke kuwä, Potipatä uhikut. Potipa kingge kulä tahakaying äminde kuhiläle yiwäxakut.

## 38

### *Judaxät Temaxätdäne wam*

<sup>1</sup> Täpduxu uwomkätanu Juda\* notnä peke, Adulam pukuwän, une nanä wäwi täpätu umanä Hira, ixät yiwikumäläk. <sup>2</sup> Une yiwihika, Kenan mängälu täpätu kake täkut. Mängälä uläpäle nanä umanä Sua. Juda mängätnäxät yiwät, <sup>3</sup> tängene käyä tikut. Tiwän wäwi täpä dukngikut. Dukngiwän umanä Er yang inikumäläk. <sup>4</sup> Tiwän hipdu tängene käyä tiwän, wäwi täpä dukngike, umanä Onan yang inikut. <sup>5</sup> Tikengä wäwi täpätuxäyä Kesip yiwixäwik, dukngike, umanä Sela yang inikut.

<sup>6</sup> Judatä wawakngä yakap täpä inulung tiwän, mängälä täpätu yangämikut. Mängälä uläpäle umanu Tema. <sup>7</sup> Tiwändeyä Judale wawaxu yakap täpä Yawele kayine gutongä hikngä pahakut. Pahawän Yawetä kupsäle tängukut.

<sup>8</sup> Tiwänä Judatä wawakngä mahan täpä Onanu using inikut. “Payäkale natäke, kombätäda pahangäming. Tiwän wawaxu yakap täpä payäkale nomde dukngiwik,” yang inikut.

<sup>9</sup> Using iniwändeyä, Onanu “Engangu towimbilu ninanendo,” yang natäpgut. “Ge payänale kombätkät yiwixäwixu, engang aläyäk,” yake, yanggänä kewune moyo pexawän kukin. <sup>10</sup> Unin pahawän, Yawetä kawän, gutongä hikngä tikut. Tiwän ixäyä kupsäle tängukut.

<sup>11</sup> Tiwänä Judatä “Wawaknga Selaxäyä Tema täke kumsäk,” yang natäke, ayinä Tema kemu using inikut. “Ayina, nangga minggale yolune päku yiwixayo. Tikengu wäwi käluxu täpätuyi mawäyo. Tixawän wawaknga Sela inulung täpä tikengä täpik” yang iniwän, Tema nanä mingäle kuwän yiwikin.

<sup>12</sup> Belakngä womdu yiwihikangä, Judale mängälu Suale yäpa axumgut. Kupän Juda mängätnäle gwäyäm yiwikdäkngake, notnä Hira Adulam nanä uläpaxät Timna koptumäläk. Timnä uwomune Judale puyä äminu sipsip dänggäm matäxawä koptumäläk

\* 38:1: Juda uläpä Jekopde wawaxu täpätu.

<sup>13</sup> Tixawänu Tema using inikin. “Bapuka sipsipnäle dänggäm matäwikge Timna kopänak,” yang inikin.

<sup>14</sup> Tiwän natake, kombätde täwixu pahanggaxu päpeke, täwixu kwämbätduhimdä kuhiläne wapän, nomnä epu umukut. Tikengä taunu Enaimde yämä däkäne kahilu Timnale kokaying täpäne täku puku yiwikut. Tema using natäpgut. “Sela inulung täpä alik. Nä itä täpä, engangu dukngitnangäsä. Tiwändeyä näle wamu doyak,” yang natäpgut.

<sup>15</sup> Tixawän Judatä apu, nomnä umukulunin kake, “Mängälä aläpä yumdekän täke tihikukayingunimbä?” yang natäpgut. <sup>16</sup> Tikengä “Bapunambä?” yangu donatäxäwik, Tematä yiwikulune kuke, “Täkembä yiwisim?” yang inikut.

Iniwän “Uyiwikengu, ina namiläk?” yang inikut.

<sup>17</sup> Tiwän Judatä “Meme mäteknga gwendu äpme gamit,” yang inikut.

Iniwän Tematä “Hängäka täpätu äpmasimdekän äpme nami tengyiwixawa, meme mätexu namixäwikngä täpiläk?” yang inikut.

<sup>18</sup> Tiwänä Judatä “Ina hängä gamit?” yang inikut.

Tiwän Tematä “Hängä umanda tuwängge matäkinä guläkgane mapi epunggaxu uläpä,<sup>†</sup> napnä bulak namike, hipudaxäyä namiyo,” yang inikut. Iniwän hängä inä natäpgut using uläpäyalu imänä yiwikumäläk. U yiwikumäläk gwende engang muhip päkut.

<sup>19</sup> Judaxälu yiwikengä, Tema täku, täwixu nomnä umukulu uxwämbälu utdoteke, kombät täwikngä hipdu tahakut.

<sup>20</sup> Tixawänu Juda meme mätexu gwendu mängälä uläpäle imixäwik, hängä täpänä hipdu päpikge natake, notnä Adulam nanä täpäle imän, täke kukut. Täke kuke teyä mängälä uläpä aläwämbän malikut. <sup>21</sup> Tiwän Hiratä wäwi taunune yiwäxayingu using yänikut. “Mängälä yumdekän täke tihikukayingu, Enaimde kahit täpäne yiwikulu sändanda?” yawän, “Andanu mängälä using bimä tihikunggaxu täpätu wenä,” yang inikin.

<sup>22</sup> Tiwän hipdunä apu, Juda using inikut. “Axu tawämba maliwän, wäwi taunune yiwixayinunin yäniwa, ‘Andanu mängälä using tahanggaxu wenä,’ yang naniying,” yang inikut.

<sup>23</sup> Iniwän Judatä using inikut. “Yahikukata ninimitnäng. Ge undanä. Hängäläpä nätäne päkulu, undanä peke yiwixäwik. ‘Wamu inikum using meme mätexu ambä imit,’ yake gama, täke ku tawämbi malik. Ge using kakengu, undanä,” yang inikut.

<sup>24</sup> Yekawu gwenälä gwendu using yiwikengä, apu Juda using inikin. “Ayika Tema yumdekän täke tihikukinä, tängene käyä alik,” yang iniwä, Judatä using yakut. “Kepmän tulitakepu däkine hawä ihikuyok,” yang yänikut.

<sup>25</sup> Yawän tängutningge kepmän täke epuxuwä, Tematä bapunäle hängäläpä yämike, wamu using tewän kukut. “Nä hängä aläpäyatde towikngätä engang muhiwu namikut,” yake, unetäkänu using yakut. “Guläkngäne mapä epunggak äwä hiput yangu imindäneka? Ge kätak dayipso,” yang yäniwän, ku inikin.

<sup>26</sup> Iniwä Judatä hängä uläpäyalunin dayike, using yakut. “Gutongä nätä tahakum. Tike Tema gutongänä wenä, inale nätä kem inike, wawaknga Selale doimikum,” yawän, Tema dolängukin. Tiwänä hipdu doyiwikumäläk.

<sup>27</sup> Täpduxu engang kake täpikge natäpgut gwenune, “Ukgtäp tinggak,” yang natäpgin. <sup>28</sup> Andayike päkut gwenune engangu täpätu kätakngä tewän epgut. Tiwän mängälä anggatängämikge yiwikut täpätä kake, “Andä gämäk apunggak,” yake, trelu gämänä täkngahimdä kätakngäne wamgut. <sup>29</sup> Tiwändeyä kätakngä hipdu tuliwän koxawänu, notnä täpätä gämäk apgut. Tiwän mängälä uläpätä kake “Waxang! Gätä gämäk kitokake

<sup>†</sup> 38:18: Äminu uwomune nanätä using tahakakin. “Wamu aläknga nätä temänggat,” yakengu, hängä umanäle tuwängge matäkakin täpäläpä täke, pepane täpu tepä, tuwängä däkä une alakakin. Ge undäkänin kakengu, itä temäk yangu une natäxakin.”

apunggaläk?” yawän, umanä Peres yang inikin. <sup>30</sup> Tiwänä notnä trelu kätakngäne wamgut täpä mahande apgut. Tiwän umanä Sera yang inikin.

## 39

### *Josepkät Potipale mängätkätdäne wam*

<sup>1</sup> Josewu Ismaelde bapunätä Isip täke pukukin. Tiwän Isipde kingge kulanä äminde kuhiläle yiwäxaxu Potipa uläpätä Ismaelde bapunäle kätaxune uhikut.

<sup>2</sup> Josewu Yawetä gatängämixawän, puyä towikngäle yolune pahaxawänu, nomängän tikin. <sup>3</sup> Potipatä kaxawänu, Yawe Josepkät yiwixäwik gatängämixawän, puyä nomängän pahakut. <sup>4</sup> Tiwän Potipatä Josewu ilakngä hikngä kake, gatäkgatäkgäle tuwänguke, puyä äminä äwä hängälapanä yangge kuhiläle yiwikge inikut.

<sup>5</sup> Täpduxu Potipatä Josepde puyä imikut gwenunetä, Yawetä Josepde natäke, Potipale hängäläpä bänip kwikwik yämikut. Potipale hängäläpä yolune nanä awä puyäne nanä yangu undä bänip kwikwik yämikut. <sup>6</sup> Tiwän hängä täpänä undä Josepdä daying yiwikge inikengu, Potipa dasingga donatäpgut. Tike teyä “Naxu gätä hangamiyo,” yangu doinikut.

Josewu tänge täpä, nomnä yangu ilakngä hikngä yiwikut. <sup>7</sup> Womsim yiwihikangä, Potipale mängätdä Josep kambutake, “Ai, api pekata,” yang inikut.

<sup>8</sup> Iniwän Josepdä “U. Usingu dolahawit,” yake using inikut. “Natäpso. Kuhitnale yiwixakgä nandupän, nä ämin nomän, tiwän hängänä nätä undä daying yiwitde nanikut. Tikengä hängä täpänäle meyä dowänggaxunin. <sup>9</sup> Yolu anggwende kuhiläle yiwitde näkän tuwängukut. Tikengu “Hängä täkekän päke pahayo,” yake teyä, gäle usingu donanikut, inale gä mängätnä. Anätule kayine gutongä hikngä uläknga, dasing tahawitde yanggaläk?” yang inikut.

<sup>10</sup> Tiwändeyä mängälä uläpätä kwep äpman iniinilikut. Tiwän Josewu ‘Täke,’ yangu doyake, ile wäkngasimkäyä doxukut.

<sup>11</sup> Gwendune puyä äminu okopi doxoxawä, Josewu puyä pahawikge kopgut. <sup>12</sup> Tiwän Potipale mängätdä apu, täwikngäne tänggänggänuke, “Api pekata,” yang inikut. Inike, täwikngäkän täxawän, Josewu epu datäkukut.

<sup>13</sup> Täwikngäkän täxawän epu datäkuwän kakengä, <sup>14</sup> puyä äminä une pahakayingu yang yawämbän apä, kem wamu using yänikut. “Täwixu axwämbälu känong. Potipatä Hibru nanä ane täpä takapu tekutdä tängänane wahike, mayakngä tāknga nimikge tahawän, yangot. <sup>15</sup> Anggatängaminingge yangopa natäke, täwikgnä nätä yiwilune teke, epu datäkuk,” yang yänikut, kemun.

<sup>16</sup> Yake Josepde täwixu teng yiwixawän, ayä une apän, <sup>17</sup> using inikut. “Puyä äminu Hibru nanä täpä takapu tekuläkgä mayäkngä namikge tahak. <sup>18</sup> Tiwändeyä anggatängaminingge yangopa, täwikngä nätä yiwilune teke, epu datäkuk,” yang inikut.

<sup>19</sup> “Puyä ämindatä näle using tahak,” yang iniwän, ayä tokngä hikngä natäpgut. <sup>20</sup> Natäke, Potipatä Josewu kalabus yolu kingge puyä ämindä gutongä pahawä pexaying gwenune täku tekut.

Tiwändeyä Josewu kalabusune yiwixawänu, <sup>21</sup> Yawe ixät gatäke yiwixäwik, ile nomän hikngä tahakut. Yawetä pahawän, kalabus ämin daying yiwixak täpätä Josewu ilakngä kakut. <sup>22</sup> Kake Josewu kalabus äminde kuhiläle tuwängukut. Tiwän kalabuskätanu inaka pahakinu, itä yäxawän pahakin. <sup>23</sup> Yawe Josepkät yiwike gatängämixawän, kalabuskätanu ina puyäka pahakulu nomängän tikin. Tiwän kalabus daying yiwixak täpätä puyä Josepde imikengu, meyä dowäkut.

## 40

### *Josepdä dambu tikindäne yäpulinä yakut*

<sup>1</sup> Josewu kalabusune yiwixawängän, täpduxu gwendune Isipde kingge wain pahake iminggak täpä äwä bret hängäminggak täpä yangu kingge kayine gutongä pahakumäläk.

<sup>2</sup> Pahawät, Isipde kingu uläpäyatde tokngä hikngä natäpgut. <sup>3</sup> Tikengä kalabus yolu

Josepdä yiwixak gwenunekän päku, kalabus daying yiwixaying äminde kuhiläle yolune pekin. <sup>4</sup> Tiwän kuhiläle yiwixak täpätä Josepde imän, daying yiwikut.

Kalabusune belakngä womdu yiwihikangä, <sup>5</sup> wain pahakakut täpä äwa bret hakakut täpä yangu dambu täpduxu inä unggwenunekän inäinä tikumäläk. Dambu ulikumäläxu yäpulinä inäinä.

<sup>6</sup> Kwepdätä tembänä Josepdä apungu, anatänatälike yiwixawät dayipgut. <sup>7</sup> Dayike “Gilu inale natänatälikamäläk?” yang yänikut.

<sup>8</sup> Yäniwän, “Nilu dambu inäinä dayimäk. Tiwändeyä dambu ulimäkge yäpuli nini-nangäsä äminu wenä,” yang inikumäläk.

Tiwän Josepdä “Dambule yäpuli Anätutäkän yäminggaxunin. Ge dambuhä undan yähon,” yang yänikut.

<sup>9</sup> Tiwän kingge wain pahakakut täpätä Josewu using inikut. “Dambu tängäne wainu täkngatu kat. <sup>10</sup> Wainu uläknga kätakngä täkngayalä täkngatu. Tiwän gwäkgwäkngäne salinä yupsänggän alaxäwik galaying. <sup>11</sup> Tiwän kingge käwu nätä tätnä, unggalayingunin päke sasapa, kingge käwune pukuwä, inäle imit,” yang inikut.

<sup>12</sup> Tiwän Josepdä “Dambu uläknga yäpuli using,” yake using inikut. “Katakngä täkngayalä täkngatu dayiläxu täpduxu gwenalä gwendu. <sup>13</sup> Täpduxu gwenalä gwendu yiwikengu, gä kalabusde yiwiläxu, kinggä yawän epuxuwiläk. Tiwän puyä yakap pahakakuläk täknga hipdu äpme gamän, wainu pahaxäwik, kingge imiläk.

<sup>14</sup> “Gäle using tahawän kakengu, gätä näle butayä natäpso. Natake, kingu ainiyo. Tiwän kalabusunetä napmämbän epuxuwit. <sup>15</sup> Nä Hibrule kewunetä ämindäkän nanitäkagpin. Ngä anexäyä gutongä täkngatu dolahakum. Tiwändeyä kalabusde yumdekän takapu napmambä yiwixat,” yang inikut, Josepdän.

<sup>16</sup> Wain pahakakut täpäle dambu yawän natake, Josepdä yäpuli nomän hikngä iniwän kake, bret hakakut täpäxäyä Josewu using inikut. “Näxäyä dambu täkngatu using tit. Baskelu bretnänäxäyä gwenalä gwendu kuhitnane gwäpit. <sup>17</sup> Enetängä gwenune brelu inäinä kingge pät. Tiwändeyä anggwäpilune kwäwitdä apu päku naying,” yang yakut.

<sup>18</sup> Yawänä Josepdä natake “Dambu uläknga tiläxu yäpuli using. Baskelu gwenalä gwendu dayiläxu täpduxu gwenalä gwendu. <sup>19</sup> Täpduxu 3 gwenune kinggä yawän, kalabusunetä epuxuwi, guläkga pahandäkngake, däki täpäne täko mapä wukuwi, kwäwitdä gupda näning,” yang inikut.

<sup>20</sup> Täpduxu 3 unggwenu kinggä alakutde täpduk. Ge kinggä naxu puyä äminäle kuhiläle inulung hängyämikut. Tikengä wain pahakakut täpä äwä bret hakakut täpä yangu kalabusunetä pewän epuxuke, puyä äminu uläkwäkge kayine kukumäläk. <sup>21</sup> Tiwän wain pahakakut täpä puyä tupä pahakakut using imän, kingge käwu hipdunä täke imikut. <sup>22</sup> Tiwänu bret hakakut täpä kinggä yawän, puyä äminätä täku, däki däkäne mapä pukukut. Hängä ulikulu inä dambu tike yawät, Josepdä yänikut using tikut.

<sup>23</sup> Tiwändeyä wain pahakakut täpä puyänä hipdu takengu, Josepdä iniwän kakutde bulämnä hikngä natäpगत.

## 41

### *Josepdä kingge dambu yäpuli yakut*

<sup>1</sup> Krismasu gwenalä apuxuwänä, Isipde kingu dambu täkngatu using tikut. Yanggä Nail Dupine yiwike kaxawän, <sup>2</sup> towiyä gämänu 7 bulämbam, tiwän tänge ilakngäkän gwenggwenu yanggäxätandä akoxuke, songäsongä une nanä naxäwik yiwikin. <sup>3</sup> Tixawän towiyä gämänu tänge wenäxäyä 7 yanggäxätandä akoxuke, tänge käyä gwenggwendä yiwikinunekän päkapu yiwikin. <sup>4</sup> Tikengä tänge käyä gwenggwenu, tänge wenä uläkwäkge apu yähake napulukin. Tiwän kingu unin kake naxälake enakut.

<sup>5</sup> Tikengä hipdu peke, dambu täkngatuxäyä using tikut. Wilu dupitunetäkän bulä inulungu 7 alake galakin. <sup>6</sup> Tiwän dupituxäyä bulä 7 alawä, gusitdä akonggakätandä wawuwawungu tokngä täkngatutä apu ihiwän, bulä mätekngä hikngä tikin. <sup>7</sup> Alake, wilu

bulä inulung alakinu, mätekngä alakindä guläk päkin. Tiwän kingu unin kake naxälake enake teyä, dambu tikutnä kakut.

<sup>8</sup> Tembänä enake, dambu ulikutde natänatalikut. Tikengä dambu natake yäpuli yäkaying äminunin äwä natändetdet ämin yang undä yawän apä, dambu tikulu yänikut. Tiwändeyä u yiwikinu täpätutä dambu ulikutde yäpuli donatake initapgin.

<sup>9</sup> Tiwänä kingge wain pahanggak täpätä kingu using inikut. “King, gutongä tahakumu\* using ganiwit. <sup>10</sup> Gätä näxät bret pahanggak täpaxätde tokngä natake, kalabus daying yiwixayingge kuhiläle yolune kalabusde nipmakuläk. <sup>11</sup> Kupilä gwendune dambu inäinä tikumäk. Ulikumäxu yäpulinä inäinä. <sup>12</sup> King kang yiwixayingge kuhiläle puyä äminu wawakdäkä Hibru nanä täpätuxät yiwikumäng. Ngä dambu tikumäxunin inita natake, yäpuli inäinä ninikut. <sup>13</sup> Tiwän hängä itä ninikut using hikngä tikin. Nä puyäna hipdu namixäwik, bret hakakut täpä tänguwä kumgut,” yang inikut.

<sup>14</sup> Iniwän kinggä puyä äminä yäniwän, Josewu kalabusune yiwikulu yupsäng takapgin. Takapä kuhit dänggämnä äwä gen dänggämnä yang matake, täwixu käluk pahake, kingge kukut.

<sup>15</sup> Tiwänä kinggä Josewu using inikut. “Dambu takngatu titnä yäniwa, äminu täpätutäkänkäyä yäpuli donanik. Tike gäle using yaying. ‘Dambu iniwä natäkengu, yäpuli nomängän yänggaxunin,’ yang naniying,” yang inikut.

<sup>16</sup> Iniwän Josepdä kingu using inikut. “King, hängä uläknga nätä dolahanggalunin. Tike gätä nataläxu, Anätutä äpme ganiwik,” yang inikut.

<sup>17</sup> Iniwän kinggä Josewu inikut. “Dambu tängäne using kat. Yanggä Nail Dupile kwayimune yiwike kaxawa, <sup>18</sup> towiyä gämänu 7 bulämbam, tiwän tänge ilakngäkän gwenggwenu yanggäxätandä akoxuke, songäsongä une nanä naxäwik yiwiying. <sup>19</sup> Tiwän ile mähene towiyä gämänu 7 tänge wenä, tiwän wäyi hikngä gwenggwenkäyä yanggäxätandä akoxuying. Isipde kewune towiyä gämänu usä bimä gwendunekänkäyä dohikngä dayipgum. <sup>20</sup> Akoxuke tänge wenä unggwengwendä apu, tänge käyä yakap akoxuyingu yahake napuluying. <sup>21</sup> Tiwändeyä ämindä dayikengu, ‘Usingbä naying’ yangu natäpnangäsändo, inale tänge wenä. Tiwän yakap yiwiying usinggän yiwiying. Tiwän unin dayike enat.

<sup>22</sup> “Tikengä hipdu peke, dambu takngatuxäyä using tit. Wilu dupitunetäkän bulä inulungu 7 alake galaying. <sup>23</sup> Tiwän hipdu 7 alawä, gusitdä yähawän, mätekngä hikngä tiying. <sup>24</sup> Tike ako wilu inulung alayingu, mätekngä alayinggä guläk päying. Tiwän unin dayike enakengä, dambu natake yäpuli yäkaying äminunin yäniwa, täpätutäkänkäyä yäpuli donanik,” yang inikut.

<sup>25</sup> Tiwänä Josepdä kingu using inikut. “Dambu tiläxu usäkän, tiwän yäpuli takngatukän. Anätutä dasingga tahawikge natäxu, unin tahawän kaläk. <sup>26</sup> Towiyä gämänu nomänu 7 dayiläxu krismasu 7. Tiwän wilu bulä nomänu 7 dayiläkäyä krismasu 7. Dambu uläkngayalu usäkän, tiwän yäpuli buläkän. Naxu meyä äpme alaxawä, krismasu 7 apik.

<sup>27</sup> “Tiwän ile mähene towiyä gämänu tänge wenä, tiwän wäyi hikngä 7-u dayixawi akoyingkäyä, krismasu 7. Tiwän wilu gusitdä yähawän bulä 7-u wäyi alayingkäyä krismasu 7. Yäpulinä krismasu 7 nakge äpme dapmäke yiwitning.

<sup>28</sup> “Ayat usinggän Anätutä dasingga tahawikge natäxu, unin tahawän kaläk. <sup>29</sup> Isipkätanu naxu meyä hikngä alaxawä, krismasu 7 apik. <sup>30</sup> Tiwänä ile mähene nakge dapmäke yiwixawä, krismasu 7 apik. Apän Isipkätanu naxu meyä hikngä yakap alatningge äpme bulämduaning, inale naxu wenä hikngä tixawän, kep gomü wäyi tiwik. <sup>31</sup> Naxu wenä hikngä tiwän, naxu yakap alawä meyä näning gwenggwende äpme bulämduaning. <sup>32</sup> Anätutä dambu uläkngayat gamixu, yäpulinä buläkän usingge gamik. Inä Anätutä ‘Using hikngä tahawit,’ yangu anatäkengä gamik. U natäk using hikngä tinanggenggak.

\* 41:9: Gutongä u tahakulu kingu Josepde tupä ininangäsä teyä doyakut.

<sup>33</sup> “Ge äpmanu äminu natändetdetnä kayä, tiwän natändetdet wam yänggaxu täpätu tuwänguyo. Tiwän Isip kewu awomu itä kang yiwik. <sup>34</sup> Ile gepbine yiwitningge äminu täkwäkguxäyä tuwänguyo. Tiwän itä yiwike yäxawä, puyä pahaningune nanä undä, naxu 5 päningune nanä aupuke, 4 inäle pexäwik, 1-u puyä äminu uläkwäkke yämixawä pening. <sup>35</sup> Krismasu naxu nomän alatning gwenggwenune nanä, wilu kingge umande päke, nak yolu taunune nanä gwenggwenune mahande näningge peke daying yiwitning. <sup>36</sup> Naxu uläkwäxu mähande Isip nanätä takgä yiwixäwik päke näningge pening. Ge kantri awomu nakge dondapning,” yang yänikut, Josepdän.

<sup>37</sup> Josepdä wamu uläknganin yawän, kingkät puyä äminäxätdä natäpä, nomän tikut. <sup>38</sup> Tiwän kinggä puyä äminä using yänikut. “Anätule wawungu äminu aläpäle tängäne yiwixak bimä käyä? Ngä uläpä tuwängutnim,” yang yänikut.

<sup>39</sup> Tikengä kinggä Josewu using inikut. “Wamu uläknga yaläxu, Anätutä gäle gamän yänggaläk. Tiwän natändetdet äminu gä bimä täpätu wenä. <sup>40</sup> Ge gä kantrinale kuhiläle yiwiläk. Tiwän äminu undä gäle wam gwälamike yiwitning. Tiwändeyä nä king. Ile tiwän, näle kematde yiwiläk,” yang inikut.

#### *Josewu kinggä Isipde bulämbam täpäle yiwikge tuwängukut*

<sup>41</sup> Kinggä Josewu using inikut. “Nätä gä bulämbam täpäle tuwänguwa, Isip kewu undä awomunin kang yiwiläk,” yang inikut. <sup>42</sup> Inike ringu tuwängge matäkinä kinggä kätängäne täpän pukukulu utdoke, Josepde kätaxune täpän pukungämikut. Tiwänä hipdu täwixu kwikwikngätä bupginu belakngä kwämbätdu imän tahakut. Imän tahawänä, uhixu täkngatu goldä tahakinu Josepde guläxune mapän pukukut. <sup>43</sup> Tiwän kinggä Josewu äminbamde yakap täpäle tuwänguwän yiwikutde, kalisu kwämbätdu† imän, une päko yiwike kukut. Kuxawän kingge puyä äminätä yakap kuxäwik, “Kundäkngake yapmitnong,” yang yakin. Kinggä Josepde using pahakut. Tiwän Isipde bulämbam täpäle yiwikut.

<sup>44</sup> Tiwän kinggä Josewu using inikut. “Nä king. Tiwändeyä using yänggat. Isipkätanu inaka yumdekänu dowahaning. Tike gätä ‘Using pahanong,’ yang yäxawikänä, pahaning,” yang inike, <sup>45</sup> Josewu umanä käluk täknga Sapanet-Panea yang inikut. Tikengä Onda prisu‡ umanä Potipela, tiwän yäpanä umanä Asenat uläpä, kinggä Josepde imän, mängätnäle täkut. Tikengä Isipde kewu undä tihikuke kakut.

<sup>46</sup> Josewu krismanä 30 using yiwixawän, Isipde kinggä puyä bulämbam däkä yawän täkut. Täke kingu teke, Isipde kewu undä tihikuke kakut. <sup>47</sup> “Krismasu 7 naxu meyä alatning,” yakut using, krismasu unggwenggwenu naxu meyä hikngä alakin. <sup>48</sup> Isipkätanu naxu meyä alakin gwenggwenune Josepdä yawän, naxu undä taunu yiwixayingune äpmele inäinä petäke kukin. Naxu puyä taun kwayimune pahakinunin päxäwik, päku yämixawä, nak yolu taunune nanä gwenggwenune petäke kukin. <sup>49</sup> Wilu duksäng päkapu pexawä, meyä hikngä haluhalu yanggä gwenune nanä bimä tikut. Tinggawän axendekinu kendetnangasändo tiwän, undan tekin.

<sup>50</sup> Krismasu nakge dapningge gwenggwenu doapuxawän, Josepde mängälu Asenat, Onda prisu Potipelale yäpatä wawakngä täpäyalä dukngikut. <sup>51</sup> Tiwän Josepdä “Anätutä gatängamän, meyä apgin äwä yotna nanä yangge ambulämdat,” yake, engangä yakap täpä umanä Manase yang inikut. <sup>52</sup> Tikengä wawakngä maha täpä “Äminde kewune meyä bulak yiwit deyä, Anätutä tahawän, engangu towikggat,” yake, umanä Epraim yang inikut.

<sup>53</sup> Naxu meyä alakinu äalaxawäkän, krismasu 7 apuxuwän pulukut. <sup>54</sup> Josepdä “Krismasu 7 nakge dapning” yakut using, krismasu yakap gwenu une apän, kepkewu sänesäneka yiwihikukayingu nakge undä dapgin. Tiwändeyä Isipkätanu naxu käyä tikut. <sup>55</sup> Yiwihikangä Isip nanäxäyä nakge dapmäke, ku kingu nakngäle inikin. Tiwän kinggä

† 41:43: Täpduxu uwomune kalisu hosdä tulipäke tihikukakin. ‡ 41:45: Onu miti yolu gwendule uman. Miti yolu unggwenune Isip nanätä tumuxu gusitde yäkakin.

using yänikut. “Josepde kuwä, itä dasingga pahaningge daniwänu, using pahanong,” yang yänikut.

<sup>56</sup> Nakgäne täknga, kantri Isiwu undä gwen dapgin. Tiwänä Josepdä yolu wit pekin gwenggwenu yämä siwän, Isip nanätä apu, naxu moninggä uhikin, inale Isipkätanu naxu wenä hikngä tikut. <sup>57</sup> Kewu undä gwen naxu wenä hikngä tiwän, Isipgän apu, wilu Josepde tängäne moninggä uhikin.

## 42

### *Josepde payänä täkwäxu Isip kukin*

<sup>1</sup> “Isipkätanu wilu käyä,” yawä natake, Jekopdä wawakngä yänikut. “Ginu ina nänimde nakge wamu doyake yiwixaying? <sup>2</sup> Isipkätanu wilu käyä yawäxakum. Ge une puku uhike päkakopnong. Tiwän unin nakengu, doxumnim,” yang yänikut.

<sup>3</sup> Tiwän Josepde payänä 10 täkwäkgäkän wit uhiningge Isip pukukin. <sup>4</sup> Tiwändeyä Josepde ulawu Bensaminu “Täke kuwä tängutnäng,” yake, nanätä äinindäkngakut. <sup>5</sup> Äminu nakge dapmäke, wit uhiningge kuxawä, Israelde wawakäyä pukukin, inale Kenankätankäyä naxu wenä tikut.

<sup>6</sup> Isip kepkätanu Josewu kuhiläle yiwixawän, äminbamdä wilu ile tängäne apu uhixäwik, päke kukin. Tixawän payänäxäyä wit päningge apuke, Josepde nomune sopäsopä puke, däme päpu, kewune yamgin. <sup>7</sup> Axuwä Josepdä dayikengu, “Payäna,” yangu anatäp gut. Tike teyä “Womdune nanä yäning,” yake, “Ginu sänetä apukaying?” yangu kitokngäkän yänikut.

Tiwän “Ninu Kenandä nak uhinimde apumäng,” yang inikin.

<sup>8</sup> Josepdä dayike, “Payäna,” yangu anatäpän deyä, payänä täkwäkgä “Äminu aläpä, Josepbä,” yangu donatäp gin. <sup>9</sup> Tixawänu dambu yakap tike dayipgut täkngale une natäpän kukut. Tiwän “Ginu amäk tahanangge wepdä apuke nindutapningge apuying. ‘Isipde yolu womduyi dämänu wenämbä,’ yang yake katapningge apuying,” yang yänikut.

<sup>10</sup> Yäniwän, payänätä “O bulämbam täpänin, usinggendo. Tike nak uhinimde apumäng. <sup>11</sup> Ninu täpätule wawakngän. Tiwän wamu hiyäkängän yäkamängunin. Ninu wepdä apuke dandutapnimde doapumäng,” yang inikin.

<sup>12</sup> Iniwä Josepdä “Ginu kem yäkaying. ‘Isipde yolu womduyi dämänu wenämbä,’ yang yake katapningge apuying,” yang yänikut.\*

<sup>13</sup> Tiwänä yäkwäle wamu using inikin. “Ninu Kenan yiwixamängunin. Tiwän ninu täpätule wawakngän. Nanindä ulapninu täpäläxät towikut. Tiwän ninu unekänu 12. Tiwändeyä ulapninu täpätu wenä. Tike wasekngä täpä naninkät yiwixawät apgumäng,” yang inikin.

<sup>14</sup> Tiwän Josepdä using yänikut. “Ginu wepdä apuke, nindutapningge apuying yangu andanit. <sup>15</sup> Hiyäkändembä yäkayingge using tahake dandupit. Ane yiwixawäkän, ulapsä wasekngä täpä apik. Tike doapänu, kingu käluk yiwixakge umande, wamu kitokngä yänggat. Yolu awomu doleke kuning. <sup>16</sup> Ginu undä kalabusune pexawä, täpätutäkän ku ulapsä täkapsok. Tiwänä wamu hiyäkände yaying yangu natäpit. Tike wenä tiwänu, kingu käluk yiwixakge umande yänggat. Ginu wepdä apuke, nindutapningge apuying yang natäpit,” yang yänikut. <sup>17</sup> Yake kalabus yolune päku pewän yiwixawä, täpduxu gwenalä gwendu tukwake kwakakut.

<sup>18</sup> Täpduxu 3 gwenune Josepdä using yänikut. “Nä Anätule anaxaläkgalunin. Ge nätä daniwit using tahakengu, doxumning. <sup>19</sup> Ginu hiyäkändekän yäkayingä kakengu, notsä täpätu kalabus yolune tewä yiwixawän, täkwäkgutäkän wilu yotsäle päke kunong, inale notsäbamu takgä yiwayak. <sup>20</sup> Tiwändeyä ulapsa wasekngä uläpähimu aläkapä

\* 42:12: Josepdä payänä wamu kitokngä hikngä yänikulu, “‘Ulapnin pahana malikutde, meyä aläknga apunggak,’ yang natäkengu, bäniyä äpmebä täpä täkwämbik?” yang natake yänikut.



kayot. Tikengä wamu hiyäkände yakinä tinggak yangu natäke, doyäwa dahipning,” yang yäniwän, “Uyänggaläk usingu äpme tahanim,” yang inikin.

<sup>21</sup> Tikengä inäkänu using yiwikyakin. “Ulapnin tahana malikutde, äpmanu meyä nihä päkamäng. Kwänämkat tixäwik ‘Manutnong,’ yang yakwakäxawängän, tahana malikut. Itä päkut bimä, meyä nihä päkamäng,” yang yakin.

<sup>22</sup> Yawä Rubendä yänikut. “Nätä dasing danikum? ‘Josewu dolahana maliwik,’ yangu andanixawayä tahawäxakum. Unin tängutna kumgutde, ile yäkwäle täknga Anätutä meyä unin niminggak,” yang yänikut.

<sup>23</sup> Josewu Isip wam yäxawän, puyä äminä täpätutä Hibru wamune päpän täkwaxawä, yänikut. Tiwän “Nihä wamu u yamängu dombä natäk,” yang natäpgin. Tiwändeyä wamu yakinu Josewu anatäpgin. <sup>24</sup> Unin yawä natäke, Josewu kepmän täpu kwänämnä tiwän täkawänä, hipdu ako wamu yänikut. Tikengä puyä äminä yäniwän, Simion tänggänggänuke, bälängä äwä kätakngä yangu, notnä axang yiwixawäkän, napdä wamgin.

<sup>25</sup> Tikengä Josepdä puyä äminä wepdäkän using yänikut. “Wit äwä naxu kahitde näningge yang inäinä kekngälukyäminong. Tikengä moningä inä päkapginu, wit kekngälutningunekän inäinä kekngälukyäminong,” yang yäniwän, inä u yänikut using kekngälukyämikin.

<sup>26</sup> Tiwäna yäkngä donggi päkapu pekinune päko peke, päke kukin. <sup>27</sup> Axuxawä tukwawän, awetningge yiwikin womune, notnä täpätutä dongginäle nak imikge yäkngäxätan sikengu, moningä hipdu yäkngäxätan kekngälukinä kakut. <sup>28</sup> Kake “Mäte kanong. Nä moninga hipdu yäkngäxätan kekngäluyingä tinggak,” yang yänikut.

Yäniwän meyä hikngä natäxäwik, kwätälä yamuxawä, kawäkawän tahake, “Anätutä awomu dasingge tahanggak?” yang yakin.

<sup>29</sup> Tikengä ko nanä Jekowu Kenan yiwixawän, hängä Isip kuwä, dasingga pahakinu undä inikin. <sup>30</sup> Using inikin. “Isip kewu uwomde kuhiläle yiwixak täpätä ‘Ginu amäk tahanangge wepdä apuke nindutapningge apuying,’ yang ninike, kitokngäkän ninikut.

<sup>31</sup> Tiwän nindä using inikumäng. ‘Ninu wamu hiyäkängän yäkamängunin. Wepdä apuke dandutapnimde doapumäng. <sup>32</sup> Ninu Kenan yiwixamängunin. Tiwän ninu täpätule wawagän. Nanindä ulapninu täpälaxät towikut. Tiwän ninu unekänu 12. Tiwändeyä ulapninu täpätu wenä. Tike wasekngä täpä naninkät yiwixawät, teke apgumäng,’ yang inikumäng.

<sup>33</sup> “Tiwän kuhiläle yiwixak täpätä using ninikut. ‘Using tahawäyä, ginu hiyäkängän yäkaying äminunin yang natäpit. Notsä täpätu ane tewä yiwixawän, täkwäkgutäkän wilu yotsäle päke kunong, inale notsäbamu takgä yiwayak. <sup>34</sup> Tiwändeyä ulapsä wasekngä uläpähimu aläkapnong. Tiwän kawit. Kakengä ginu wepdä apuke nindutapningge doapuying, tike wamu hiyäkängän yäkaying äminunin, yang natäpit. Tikengä notsä ane yiwik täpä hipdu damit. Tiwän Isip kewu awomune täkekän tihikuning,’ yang ninikut,” yang inikin, nanän, Jekowun.

<sup>35</sup> Naxu päkinunin wälixäwixu, moningä wit uhiningge päke kukinu hipdu yäk-mätekngäne inäinä kekngälukyämikinä dayipgin. Unin dayikengu, wawakngäxät nanäxät naxälakin. <sup>36</sup> Tiwän nanätä using yänikut. “Gindä pahawä, enganga täpälätä hikngä hopikamäläk. Josewu hopikutnä äwä Simionkäyä hopinggak. Tiwän Bensaminikäyä täke kuningge yäkaying? Gindä tahaxäwik, meyä däkä namikaying,” yang yänikut.

<sup>37</sup> Yäniwän Rubendä nanä using inikut. “Bensaminu kätakngane teyo. Tiwän täke kuke, hipdu täkapit. Tike doläkapa kakengu, nina wawaxu uläpälalu yäkwäle täke sipi kumsimäläk,” yang inikut.

<sup>38</sup> Iniwän nanätä using yakut. “Reseldä dukngikulu wawaknga uläpä ginkälu dowukuning, inale payänä axumgut, tiwän aläpähimdäkän yiwixak. Tiwän nä äminäläke alit. Ge axuxawä, kahit täpäne meyä täkngatu ile apänu, nä butayä täknga naminingunin. Tiwän nä butayä uläkngatä nuwän kupilunin,” yang yänikut.

## 43

*Josepde notnä hipdunä Isip kukin*

<sup>1</sup> Kenan kepkatānu naxu wenä hikngä tikut. <sup>2</sup> Tiwän wilu Isipdä päkakopginu änānggāwā puluwän, Jekopdä wawakngä using yänikut. “Hipdu puku, naxu uhike päkakopnong,” yang yänikut.

<sup>3</sup> Tiwänä Judatä nanä using inikut. “Äminu bulāmbamu uläpätä yäko wamu using ninikut. ‘Ulapsä doläkapningä kakengu, ginde nomu dohikngä dandupit,’ yang ninikut. <sup>4</sup> Ge gätä täke yawi, ulapninkät pukukengu, naxu äpme uhike päkakopnim. <sup>5</sup> Tike ‘Ulapsä mäläke pukunong,’ yawi, ninu dowukunim, inale ‘Ulapsä doläkapningä kakengu, ginde nomu dohikngä dandupit,’ yang ninikut,” yang inikut, nanän.

<sup>6</sup> Tiwänä Israeldä using yänikut. “Äminu bulāmbamu uläpätä ‘Ulapninu täpätu käyā’ yangu inale inikin? Using inikinde, meyä täknga namikaying,” yang yänikut.

<sup>7</sup> Yäniwänä wawakngätä using inikin. “Äminu uläpätä nihäle äwä ninkät nanäle ninikwayikut. ‘Nansä undan yiwixak?’ yake, ‘Äwä notsä täpätu käyā?’ yang ninikwayikut. Tiwän ‘“Ulapsä aläkepnong,” yang niniyäk,’ yangu donatäxäwik, yäkwäle wamu ‘Hii, käyā,’ yang inikumäng,” yang yakin.

<sup>8</sup> Tiwänä Judatä nanä using inikut. “Iniwi, näle apän, yupsäng pukuna. Ge nak päkakopna nake, nin, gika, äwä wawakdäkänin yangu doxumnim. <sup>9</sup> Wamu kitokngä using yänggat. Bensaminu nina äpme kang yiwit. Nätä ane gäle doläkapukengu, gutongä nätä gäle tahawit. Ge gutongä u tahawit täkngale, meyä täknga täke namiläk. Tiwän yiwikyiwiknga yiwilune, nina iwikge äpme päng yiwit. <sup>10</sup> Gätä ‘Täke,’ yawi tupä pukukumäng gämu, awukuke akoke, hipduxäyā awukuke akopnam,” yang inikut, Judatän.

<sup>11</sup> Tiwänä Israeldä using yänikut. “Using tiwänu, using tahanong. Hängä gwälamg-wälamu kewu awomune nanä yäksäne keknälukke pänong. Ge bänip gwalängge, äminu uläpäle unin imining. Pa inuxu kápängä gwälam, ingutbandäne yanggäyi, äwä pa salinu anäkayingu kutan bimä unin yang pänong. <sup>12</sup> Tikengä, moningu yakap päke kuwä ambäwäpahoke kengalutdamä päkapginkät, käluk päningkät unekän peke, <sup>13</sup> ulapsäxät täpä päke, äminu uläpäle yupsäng pukunong. <sup>14</sup> Anätu Kitokngänä Käyā Täpätä tahawän, äminu uläpätä ginde butayä natäke pewän, Simionkät Bensaminkälu päkapnong. Dasingga? Wawaknga wenä tiwänu, undanä. Butayä täkngane yiwixawit,” yang yakut.

<sup>15</sup> Tiwänä Israelde wawaxu moning, bänip gwalängge hängä, äwä Bensamin yang päke, Isip pukukin. Päpu, Josepde kayine yiwikin. <sup>16</sup> Tiwän Josepdä Bensamin kake, puyä äminäle kuhitde yiwixak täpä using inikut. “Äminu aläkwäxu yotnane yänipäku peyo. Tikengä kälawu gwendu tänguke hanggayo. Ge nätä kepmä wom apa, naxu ixät nänim,” yang inikut.

<sup>17</sup> Tiwänä Josepdä inikut using, äminu uläkwäxu Josepde yolune yänipäke kukut. <sup>18</sup> Josepde yolune päke kuxawän naxälaxäwik, using natäpgin. “Yakap apna, moningu yäknginune keknäluknimä päke kukumängge natäke tahanggak. Ge anihpämäke, puyä äminäle päke pewän pahaxätna, dongginin päpikge tahanggak,” yang yaxäwik naxälakin.

<sup>19</sup> Tikengä Josepde yolune yämä däkäne täku, puyä äminäle kuhiläle yiwixak täpä using inikin. <sup>20</sup> “O, hiyäkän hikngä, bulāmbam täpä. Yakawu ninu naxu ane uhinimde epgumäng. <sup>21</sup> Ngä axuxätna tukwawän awetnimde yiwikumäng womune yäkngin sikengu, moningu inä awäkumäng usinggän inäinä yäknginde mawune dayipgumäng. Ge hipdunin päkapukamäng. <sup>22</sup> Moningu kälukäyā nak uhinimde awämäng. Tiwändeyä moningu äminu uläpätä hikngä kengäluknimik yangu donatapgumäng,” yang inikin.

<sup>23</sup> Yawä “Täke un. Manaxälatnong, inale moningsä awäkum. Tiwändeyä Anätuhä, nansäle Anätutä hikngä hängä gwälamu yäksäne damikutnä tiwänak,” yang yänikut. Tikengä Simionu yawän, ku notnäle täkapgin.

<sup>24</sup> Tiwän Josepde yolune päke koke, yanggä bälängä hälutningge yämike, dongginäle naxu yämikut. <sup>25</sup> Tiwän naxu une näning yang yawän kakinde, bänip gwalängge päkinu, Josepde kepmä wom apän iminingge tändäkngakin.

<sup>26</sup> Tiwänä Josewu yolune apän, hängäläpä tändäkngakinu imike, sopäsopä puke, dämepä päpü päpü yamgin. <sup>27</sup> Tiwänä Josepdä using yänikut. “Ginu iwalu dolike apuying? Nansä äminäläke yawäxakumu uläpä dasing? Täkekän yiwänak?” yang yäniwän <sup>28</sup> yäkwäle wamu using inikin. “Naninu gäle gepbine yiwixak täpä täkekän yiwänak,” yang inike, “Äminu aläpä bulämbam täpä,” yang natake, sopäsopä hipdu puke, dämepä päpü yamgin.

<sup>29</sup> Tiwän dayitake kukengä, inä mingäle wawaxu Bensamin kake, using yänikut. “Ulapsä wasekngä täpä yawäxakumu, unin an?” yang yänikengä, Bensaminu using inikut. “Wawaknga, Anätutä gäle gwälam hikngä tahaxawän yiwitake kuyo,” yang inikut.

<sup>30</sup> Ulapnä Bensamin kawän, butayä hikngä tiwän, yupsäng hikngä peke, epu täku, yotnä inä yiwixakatan kohopike, kwänämnä tikut. <sup>31</sup> Tikyiwihikangä, kayi yanggänä yanggätä pahawän kuwä, apu dolikut wälä däknake, puyä äminä “Naxu sixut,” yang yänikut.

<sup>32</sup> Tiwänä sike, Josepde gwenu inätä imike, notnä täkwäke inätä yämike, Isip nanä Josepde yolune nakayingu inätä sikyämikin. Isip nanätä naxu Hibrü nanäxät näningge mähe hikngä natäxakin. Ge unekänu nänangäsändo. Ile tiwän inäinä sikyämikin. <sup>33</sup> Notnä uläkwäxu alakin using, yakap täpänetä ku wasekngä täpäne yäxawä, yiwitake kukin. Yiwitake kuwä, “Krismaninu ämbä natäxak?” yake, kawäkawän tahakin. <sup>34</sup> Naxu sikyämikinu, päyänä täkwäke inäinä yämikin. Tike teyä Bensaminde sikin gwenu, äminu 5-dä nänangäsä gwen sikin. Naxu naxälä näxäwik, wainkäyä naxälä tängopgin\*. Tixäwik Josepkät kuläkake yiwikin.

## 44

### *Josepde käwu ahopikut*

<sup>1</sup> Naxu napä puluwänä, Josepdä puyä äminäle kuhitde yiwixak täpä wepdäkän using inikut. “Naxu yäkngäne meyä kekngälukyämi dopäyä, moningäxäyä yäk mawu inäinäne kekngälukyämiyo. <sup>2</sup> Tikengä silwa kápna ulapnä wasekngä täpäle yäk mawune moningu wit uhiwikge päkapgutkät kekngälukngämiyo,” yawän, inä Josepdä yakut using tahakut.

<sup>3</sup> Kwepdätä tembänä hikngä gusilu akoxawän, Josepde puyä ämindä yäning yäpiwä, dongginä päke kukin. <sup>4</sup> Taun teke kuwä, belakngä dolixawän, Josepdä puyä äminä inikut. “Äminu uläkwäxu yupsäng yäwaläke ku pänggänggänuke, using yäniyo. ‘Nindä ginde nomän tahana teyä, gindä ninde wäyü hikngä täknga inale hikngä tahaying? Bulämbam täpänale käwu kukäle inale täying? <sup>5</sup> Käwu unggomune tängoxäwik, natändetdelu wepdä yiwixayingkäyä unggomune päxäwik yatapmänggaxunin. Ginu wäyü hikngä tahaying,’ yang yäniyo,” yang inikut.

<sup>6</sup> Tiwän ku pänggänggänuke, wamu Josepdä yakut using yänikut. <sup>7</sup> Tiwänä using yakin. “O bulämbam täpä, dasingge hikngä natake nininggaläk? Ninu hiyäkän hikngä yäkamäng. Usingu dohikngä tahamäng. <sup>8</sup> Moningu yäknginune dayipgumängu, Kenandä hipdu äwäkapna dayipguläk. Ge ‘Silva bä gol kukäle päying,’ yang inale natake nininggaläk? <sup>9</sup> Ninu apumängu äminu täpätutä täkngä kakengu, täke tänguwä kungäxawän, äwä ninu dolämängu puyä ämin moyoyikale yiwitnim,” yang inikin.

<sup>10</sup> “Täke un. U yäkaying using tiwik. Imindäka täkngä kakengu, uläpä näle puyä ämin moyoyi däknaxawän, ginu täkwäkgu meyä dowäning,” yang yänikut. <sup>11</sup> Yang yäniwän, yäkngä inäinä kewune yupsäng päkepu peke sikin. <sup>12</sup> Sixawä Josepde puyä ämindä dayitake kukut. Payänäle yäxunetä dayitake kuhikangu, káp gomu Bensaminde

\* 43:34: Naxu bulämbam hängakakin gwengwenune wainkäyä alängokakin.

yäxune kakut. <sup>13</sup> Tiwän unin kake, meyä hikngä natäke, inä täwik wehekin. Tikengä yäkngä donggi tängäne päko peke, hipdu taunde kukin.

<sup>14</sup> Josewu yotnäne yiwixawän, Judaxät notnä täkwäkalu “Asing tahana, ninde butayä äpmembä natäpik,” yake okopi päko, Josepde kayine pimakin.

<sup>15</sup> Tiwänä Josepdä using yänikut. “Ginu kápna kukäle inale täying? ‘Natändetdelu wepdä yiwixayingunin yatäpmänggaxunin,’ yangu donatäke tahaying?” yang yänikut.

<sup>16</sup> Yäniwän, Judatä yäkwäle wamu using inikut. “O bulämbam täpänin, ‘Gutongä dolahamäng,’ yangu dasing ganinim? Anätutä wäyininu aläpän tapmäk. Nin äwä káp täkngä kaying täpä yangu undä puyä ämin moyoyika däknganim,” yang inikut.

<sup>17</sup> Tiwänä Josepdä using yakut. “Usingu dohikngä pewa pahaning. Kápna kukäle täk täpätäkän näle puyä ämin moyoyi däkngake yiwixawän, ginu nansäle bänip kwikwik täkngane kunong,” yang yänikut.

#### *Judatä ulapnä gatängämikge yakut*

<sup>18</sup> Tiwän Judatä täku, Josepdä yiwikulune inälängän yiwike, using inikut. “O bulämbam täpänin, wamu täkembä ganiwit? Kingkät gäxälu bulämbam täpäyat. Usäkän. Tike nä puyä ämindatä yäwa, tokngä manatängamiyo. <sup>19</sup> Tupä ninu using ninikuläk. ‘Ginu nansä ayiwänak? Tiwän notsä täpätu käyä?’ yang niniwi, <sup>20</sup> nindä using ganikumäng. ‘Hii, naninu äminäläke alikengä, ulapninu wasekngä täpä towikut. Ngä undan yiwälak. Mingätä wäwi täpäyaläkän dukngikut. Dukngikutnä payänä axumgut. Tixawän wawakngä wasekngä täpätäkän yiwixak. Uläpä naninde bänip,’ yang ganikumäng.

<sup>21</sup> “Tiwän gätä using ninikuläk. ‘Aläkepnong tiwän käwit,’ yang niniwi, <sup>22</sup> nindä using ganikumäng, o bulämbam täpänin. ‘Wawakdäkä uläpä nanä teke epnangäsändo, inale aleke epänu, nanä axupixunin,’ yang ganikumäng.

<sup>23</sup> “Tiwändeyä gätä puyä äminda using ninikuläk. ‘Ulapsä wasekngä täpä doläkepä, ginde nomu hipdu dondandupit,’ yang ninikuläk. <sup>24</sup> Tiwänä naninde hipdu kokengu, wamu uninikuläk usinggän inikumäng.

<sup>25</sup> “Tiwänä nandä using yakut. ‘Hipdu puku naxu uhinong,’ yang niniwän, <sup>26</sup> nindä using yakumäng. ‘Ninu dowukunim, inale ulapninu wasekngä täpaxälu dowukuna, äminu uläpätä ninde nomu dohikngä nindupikge yakut. Tike ulapninu aapänu, täke äpme pukunim,’ yang inikumäng.

<sup>27</sup> “Tiwänä nanindä using ninikut. ‘Ginu anatäxaying. Mängätatä wawakngä täpäyaläkän hikngä dukngikut. <sup>28</sup> Täpätu ahopikut. Tiwän nä doxakum. Dasingga? Kälap tukgämbä tänguke yahandekin? <sup>29</sup> Tiwän äpmanu aläpaxäyä aläke kunggäwä, kahit bänäkängän meyä päpänu, gindä näle butayä bulämbam hikngä naminingunin. Nä äminäläke alit. Ge nä butayä uläkngatä nuwän kupilunin,’ yang ninikut.

<sup>30-31</sup> “Bulämbam täpä, nana wawakdäkä aläpä näxälu doxuta kakengu, axupixunin, inale wawakdäkä aläpä nandäne bäniyä hikngä. Naninu äminäläke hikngä damänsimu alik. Ge wawakdäkä aläpä ninkälu hipdu doxuna, nindä naninde butayä bulämbam hikngä iminimunin, tiwänu axupixunin. <sup>32</sup> Tiwänä unetäkänu, nätä wamu kitokngä hikngä täkngatu nanu using inikum. ‘Bensaminu nina äpme kang yiwit. Ge doläkapukengu, täpduk täpduxu yiwilu, meyä uläknga ninalekän yiwik,’ yang inikum.

<sup>33</sup> “Ge using kakengu, nä Bensaminde tangge täkembä gäle puyä ämin moyoyikale ane yiwixawa, wawakdäkä aläpä payänä täkwäkät hipdu kopning? <sup>34</sup> Tike wawakdäkä aläpä doxuwänu, nä nanale hipdu doxuwit, inale meyä nanale apik täknga kawitde mähe natäxat,” yang inikut, Judatän.

#### *Josepdä inäle yatapgut*

<sup>1</sup> Josewu butayä hikngä natäke, kwänäm titnangäsä hikngä tikin. Tiwän puyä äminä Isip nanä “Ginu undä hikngä yolu anggweni teke epuxunong,” yang yänikut. Inale puyä äminä une yiwixawä, notnä “Nä Josep,” yang yäniwikge donatäp gut. Tike

inäkän yiwixawäyä yäniwikge natäput. <sup>2</sup> Ge puyä äminu teke epuxawäyä, Josewu kwänämu bulämbam hikngä yangotixawän, Isip nanä nataxawä, kingge yolune yiwäxaying äminkäyä “Josewu using tik,” yang ku yawä natäpgin.

<sup>3</sup> Tixawänä Josepdä notnä täkwäxu “Nä Josep. Nana undan ayiwänak?” yang yänikut. Tiwänä notnä täkwäxu anaxälake, yäkwäle wamu doinikin.

<sup>4</sup> Tiwänä Josepdä notnä using yänikut. “Ane inälängän hikngä apnong,” yawän, apgin. Tiwänä using yänikut. “Nä notsä Josep, tupä gindä Isip nanäle yämä uhikinunin. <sup>5</sup> Tiwändeyä äpmanu näle u tahakinde, bänipsäxätanu meyä mawänong. Bä tokngä täkngatu gihäle manatäpnong. Inale Anätutä ämin gatangyämikge natake tewän, nätä gämäxu apgum. <sup>6</sup> Nak takgä yiwixätna, krismasu gwenalä apuxunggak. Tiwän nak puyä dowahake dowäke, krismasu 5-käyä äpme yiwitnim. <sup>7</sup> Anätutä kahitnä inätä hikngä täkngatune gatängdamän, gindä yiwike, bapuha mahande sakngälawikge natake tewän, nätä gämäxu apgum.

<sup>8</sup> “Nä yolu awomune gindä dolahawä apgum. Tike Anätutä tewän apgum. Tiwänä Anätutä napmämbän, Isipde kingge natändetdet inixäwik, kingge yolune yiwixaying äminunin dayingyiwäxäwik, Isipde kuhiläle yiwixat.

<sup>9</sup> Ge ginu yupsäng ko, nana using ininong. ‘Nä Josep dika wawakgä wamu aläknga tewa apunggak. Anätutä tahawän Isip kewu awomde bulämbam täpäle yiwixat. Ge mayiwiyo. Tike näle yupsäng hikngä epsu. <sup>10</sup> Päkepu nina wäkngasim, distrik Gosenu kewu uwomune yiwiläk. Ge wawakga, bapuka, towiyä gämända, sipsipda, hängä täpäka yangu ane päkepu peke yiwiläk. <sup>11</sup> Äminbamu undä nakge dapmäxawä, krismasu 5 apixunin. Ge ane epnong. Tiwän nätä dandung yiwit. Tike dondanduyiwa, ginu undä nakge dapnäng,’ yak wawakga Josepdän,’ yang ininong.

<sup>12</sup> “Nä Josepdä daninggat. Ginu undä nä nandukengu, anatäpnangäsä. Bensamin, gä ulapna hikngä. Gäxäyä näle anatäpnangäsä. <sup>13</sup> Ge ko nana ahikngä ininong. ‘Josewu kantili Isipkätanu, umanä bulämbam hikngä,’ yang inike, hängä ane inaka dayiyinggexät inike, yupsäng täkepnong,” yang yänikut.

<sup>14</sup> Yänikengä Bensaminu täku betake, kwänämu initikut. Tiwän yäkwälexäyä Bensa-mindä betaxäwik initikut. <sup>15</sup> Tiwän Josepdä notnä undä yänitixäwik, kis pahangyämikitäke kukut. Tiwänä notnä wamu une inikin.

<sup>16</sup> Tiwänä “Josepde notnä aapuying,” yangu kingge yolune yatäke kuwä natake, king äwä puyä äminäle kuhiläle yiwixaying yanggä täke hikngä natäpgin. <sup>17</sup> Tiwänä kinggä Josewu using inikut. “Notda using yäniyo. ‘Wilu donggihäne päko peke, Kenande hipdu kunong. <sup>18</sup> Ku nansä, gihäxät nanä yangu undä ane näle päkapnong. Tiwän Isipde kewu nomän hikngä womdu dama, une yiwitning. Yiwike pahawä, naxu nomängän alaxawä päke näning,’ yang yäniyo.”

<sup>19</sup> “Yänike unetäkänu using tahananngge yäniyo. ‘Engangsä, mängätsä, nansä yang päkapningge, kalbimä bulämbamu Isip nanätäne gwenduyi päke kunong. <sup>20</sup> Hängä täpähäle manatäpnong, inale hängä Isip nanä gwälamgwälamu äpme damit,’ yang yäniyo,” yang inikut, kinggän.

<sup>21</sup> Tiwänä Israelde wawaxu using tahakin. Kinggä yakut using, Josepdä notnäle kal bimä bulämbamu gwenduyi yämike, naxu kahitde näninggexät yämikut. <sup>22</sup> Unetäkänu täwik käluxu notnäle kwämbätdu kwämbätdu yämikut. Tikengä Bensaminde täwik käluxu 5 äwä moningu 300 silwa yang imikut. <sup>23</sup> Tike nanäle päku iminingge using pekut: Hängä gwälamgwälamu Isip nanä donggi 10-une päko peke, donggixät inäle pengämikut. Tikengä wit, bret, äwä naxu kahitde näpikge yangu donggi mängälä 10-une päko peke, donggixät inäle pengämikut. <sup>24</sup> Pengämike notnä yäning yäpiwän kuningge tahaxawä, using yänikut. “Kahit täpäne täkungu, mayanganinong,” yang yänikut.

<sup>25</sup> Tiwänä notnä täkwäxu Isip teke, nanä Jekopde Kenan kopgin. <sup>26</sup> Ko nanä using inikin. “Josewu doxumgut. Ayiwäxak. Tiwän unetäkänu äpmanu Isipde kuhiläle yiwäxak,” yang inikin. Unin yawä, hatnäxäwik, “Hiyäkän yäkaying,” yangu donatäp gut.

<sup>27</sup> Tiwän wamu Josepdä u yänikulu undä inikin. Tiwänä kalbimä bulämbamu Josepdä yämikut gwengwenunin dayike, nanäle bäniwu tangäne yiwikut.

<sup>28</sup> Tikengä using yakut. “Hiyäkände hikngä. Wawaknga Josewu ayiwäxak. Ge pukuke kakengä kupit,” yang yakut.

## 46

### *Jekowu Isip kukut*

<sup>1</sup> Tiwän Israelu hängä täpänä undä päke, yotnä teke kukut. Kuhikangä Berseba kundopgut. Une kundoke, nanäle Anätunäle kälawu sipmäke hawän yähäkukin.

<sup>2</sup> Tiwän kupiläne Anätutä tahawän, dambu bimä tikut. Tixawän Anätutä “Jekop, Jekop” yang iniwän, Israeldä “We! Nä ane,” yang inikut.

<sup>3</sup> Iniwän Anätutä using yakut. “Nä Anätu. Bapukale Anätu, nä unin. Gä Isip kuwiläkge manaxälayo. Isipkätanu nätä äpme pahawa, gäle bapuka sakngälawän, kantri inulung hikngä dakngawän yiwitning. <sup>4</sup> Isiwu gäxät pukunimunin. Tikengä hipdu Kenanu päkakopit. Gä Josepkät yiwixäwik kupiyä, itä kwayiwik. Ge Isip kuwiläkge, manaxälayo,” yang inikut, Anätutän.

<sup>5</sup> Tiwän Jekowu Berseba teke kukut. Wawakngä uläkwäkgä Jekop, mängätnä, engangä yangu kalbimä inulungu kinggä pewän kukinu unggwengwenkätan päko peke, päke kukin. <sup>6</sup> Unetäkänu kälawu äminsak äwa hängä täpänä Kenan päkin yangu undä unuxät pake kukin. <sup>7</sup> Jekopdä ixät nanä undä päke, Isip kukut. Wawakngä, yäpanä, bapunä wäwi, bapunä mängälä yang unda päke kukut.

<sup>8</sup> Jekopde wawakngä, bapunä yangu Isip kukinu umanä using.

Yakap täpä Ruben. <sup>9</sup> Tiwänu Rubende wawaxu Hanok, Palu, Hesron, Karmi yang. <sup>10</sup> Tiwänu Simeonde wawaxu Jemuel, Jamin, Ohat, Jakin, Sohar Saul yang. Saulde mingä Kenan nanä. <sup>11</sup> Tiwänu Livaile wawaxu Gerson, Kohat, Merari yang. <sup>12</sup> Tiwänu Judale wawaxu Er, Onan, Sela, Peres, Sera yang. Tiwändeyä Erkät Onankälu Kenan kumgumäläk. Judale wawaxu Peres, uläpäle wawaxu Hesron, Hamul yang. <sup>13</sup> Tiwänu Isakarde wawaxu Tola, Pua, Jasup, Simron yang. <sup>14</sup> Tiwänu Sebulunde wawaxu Seret, Elon, Jalel yang. <sup>15</sup> Jekopde wawaxu uläkwaxu, mängätnä Lea itä Mesopotemia yiwixäwik dukngikut. Yäpanä täpätuxäyä andukngikut. Umanä Daina. Jekopde mängälu Leata dukngikutkät bapunä uläkwäkälu unekänu 33.

<sup>16</sup> Tiwänu Gatde wawaxu Sifion, Hagi, Suni, Esbon, Eri, Arodi, Areli yang. <sup>17</sup> Tiwänu Aserde wawaxu Imna, Isva, Isvi, Beria yang. Tiwänä haminä Sera. Aserde wawaxu Beria, uläpäle wawaxu Heber, Malkiel yang. <sup>18</sup> Gat Aser yangu, Jekopkät Silpaxätde wawak. Silpa uläpä Labandä yäpanä Leale puyä äminäle imikulunin. Jekopkät Silpaxätde dukngikumäläkät bapunä uläkwäkälu unekänu 16.

<sup>19</sup> Jekopde mängälu Resel ile wawaxu Josep, Bensamin yang. <sup>20</sup> Josepde mängälu Asenatdä wawakngä Isip dukngikulu Manase, Epraim yang. Asenalu Potipera Onde prisu uläpäle yäpa. <sup>21</sup> Tiwänu Bensaminde wawaxu Bela, Beker, Asbel, Gera, Naman, Ehi, Ros, Mupim, Hupim, Art yang. <sup>22</sup> Jekopde mängälu Reseldä dukngikutkät bapunä uläkwäkälu unekänu 14.

<sup>23</sup> Tiwänu Dande wawaxu Husim. <sup>24</sup> Tiwänu Naptalile wawaxu Jasel, Guni, Jeser, Silem yang. <sup>25</sup> Dan, Naptali yangu Jekopkät Bilhaxätde wawak. Bilha uläpä Labandä yäpanä Reselde puyä äminäle imikulunin. Jekopkät Bilhaxätde dukngikumäläkät bapunä uläkwäkälu unekänu 7.

<sup>26</sup> Inä Jekopde wawak äwä bapunä yangu Kenan teke Isip kukinu unekänu 66. Wawakngäle mängät täkwäkäyä using kukin, tiwändeyä unuxälu doxendekin. <sup>27</sup> Tike Josepde wawaxu Isip alakumäläxü uläpäyatkät Jekopde wawak, bapunä Kenan teke Isip kukinu uläkwäkälu unekänu 70.

<sup>28</sup> Isiwu axundokengu, Jekopdä Josewu Gosen apu dayipikge natäke, Juda gämäk iningyäpiwän, Josepde kukut. Tiwänä Jekop yänggwälu Gosen kundoxawä, <sup>29</sup> Josepkäyä

Gosen kuwikge kalisu inäne gwenu tändäkngake, täko yiwike, nanä Israel kawikge kukut. Ku nanä kake täku betaxäwik, belakngä initikut.

<sup>30</sup> Tiwänä nanätä Josewu using inikut. “Nina kayitä angganduke, ‘Käluk yiwixaläk,’ yangu anataxat. Ge äpmanu axupitdekän,” yang inikut.

<sup>31</sup> Tiwänä Josepdä notnä, nanä, äwä nanaxät nanä yangu using yänikut. “Kingü using ku iniwit. ‘Notna, nana, äwä nanaxät nanä yangu Kenan kewu uwomune yiwixayingu näle aapuying. <sup>32</sup> Äminu uläkwäxu sipsip, towiyä gämän yang daying yiwäxayingunin. Ngä sipsipnä, towiyä gämänä, äwä hängä täpänä yangu undä päkapuying,’ yang iniwit. <sup>33</sup> Ge kinggä yawän kuwä, ‘Ginu ina puyä bimä pahakayingunin?’ yang daniwänu, using ininong. <sup>34</sup> ‘O bulämbam täpänin, ninu tupä bapunindä pahakakin using pahakamängunin. Wawakdäkäneta sipsip, towiyä gämän yang daying yiwixakumängä, using daying yiwäxamäng,’ yang ininong. Using iniwä, kinggä Gosen kewu awomune äpme pewän yiwitning, inale Isip nanä sipsip daying yiwäxaying äminde mähe natäxayingunin,” yang yänikut, Josepdän.

## 47

### *Josepdä notnä, nanä yang kingge yänipäkapgut*

<sup>1-2</sup> Tiwänä Josepdä notnä 5 tuwänguwän, Gosen kep womu teke, kingge kukin. Kuke Josepdä kingü using inikut. “O king, nana, notna yangu sipsipnä, towiyä gämänä, äwä hängä täpänä undä päke, Kenanu aleke apuhika, Gosen kep womune aapuyingä undan yiwiyak,” yang inikut. Inikengä notnä uläkwäxu yawän, kingge kayine kopgin.

<sup>3</sup> Tiwän kinggä using yänikut. “Ginu ina puyä bimä pahakayingunin?” yang yänikut. Yäniwän yäkwäle wamu using yakin. “O bulämbam täpänin, ninu tupä bapunindä pahakakin usinggän, sipsip daying yiwäxamängunin,” yang inikin.

<sup>4</sup> Unetäkänu using inikin. “Kenankätanu naxu wenä hikngä tiwän, sipsipdä nä-nangäsaxäyä wenä tinggawä, mätekngä womsimu ane yiwitnimde apumäng. Ge gätä tākembä yawi, ninu Gosen yiwitnim?” yang inikin.

<sup>5-6</sup> Tiwänä kinggä Josewu using inikut. “Isip kewu awomu gätäne. Nangga äwä notda yangu gäle apuying. Tiwän Isipkätanu kewu nomän hikngä Gosendän. Ge une yawi yiwitnong.

“Tiwänu notda uläkwäkätanu, iminimindäka kälawu nomängän daying yiwixayingä kakengu, u äminuningän tuwänguyo. Tiwän nätäne itä daying yiwitining,” yang inikut.

<sup>7</sup> Tiwänä Josepdä nanä Jekowu kingge kayine initäkapän, Jekopdä kingü wam gwaläng imikut. <sup>8</sup> Imän kinggä “Gä krismasda dasingdasong?” yawän, <sup>9</sup> using inikut. “Kewu anggomune tihikuxäwik, krismasna 130 yiwixat. Tiwän u tihikukumu meyä bulak tihikukum. Bapunatä tihikuxäwixu, krismasu meyä ayiwikin. Tike näle krismasu mätekngä,” yang inikut. <sup>10</sup> Tikengä wam gwalängu hipdu imixäwixu, aepuxukut.

<sup>11</sup> Tiwänä kinggä inikut using, Josepdä nanä, notnä yangu Ramses Distrikätanu\* kewu womduhim yämän, une yiwikin. Isipkätanu Ramses Distrikge kewu nomän hikngä.

<sup>12</sup> Unetäkänu Josepdä nanä, notnä, nanaxät nanä, äwä engang yangge natäke, naxu ämin apmäng yämixawän, näxäwik yiwikin.

### *Josepdä Isip nanä gatängyämikut*

<sup>13</sup> Isip nanä, Kenan nanä yangu naxu wenä hikngä tinggawän, takgä yiwixäwä, kitokngänä wenä tikin. <sup>14</sup> Tiwänu moningu Isip nanätäne awä Kenan nanätäne yangu undä hikngä nakge tahaxäwik, Josepde imä päke, kingge yolune päku pekut. <sup>15</sup> Isip nanä Kenan nanä yangu moningä undä mumbä pulukgawä, Isip nanä undätä apu, Josewu using inikin. “Moninginu undä amutna puluying. Tiwändeyä gä inale nindung yiwixawi kumnangge tikamäng? Naxu niming,” yang inikin.

<sup>16</sup> Tiwänä Josepdä using yänikut. “Moningsä awulukge tiwänu, kälawu alowikayingunin päkapu namixawä, yäkwäle naxu äpme damit,” yang yänikut. <sup>17</sup> Yäniwän sipsip,

\* 47:11: Gosen kewu uwomu umanä tākngatu Ramses Distrik.

meme, towiyä gämän, hos, äwä donggi yangu undä päkapu imikin. Tixawän yäkwäle nak yämän näxäwik, yiwixawä krismasu unggwenu apgut.

<sup>18</sup> Krismasu unggwenu apuxuwän puluwänä, hipdu apu Josewu using inikin. “Bulämbam täpänin, ‘Naxu nimiyo,’ yangu dongganinangäsä teyä, moningninu wenä. Tiwän kälawu äminsakäyä gäle undä anggamikumäng. Ge äpmanu hängä täpätu nakge gaminangäsä wenä. Tike nihäxät kepninkätgän. <sup>19</sup> Gä inale nindung yiwixawi kungäxätna, kepninu moyo yiwitnanggenggak? Nihäxät kepninkät päxäwik, naxu nimiyo. Tiwän ninu kingge puyä ämin moyoyi däknngana, itä nihä äwä kepnin yangu towikngä däknngawik. Nak salin nimiyo. Tiwän unin pahana, kewu wäyi doliwik. Tiwän bulä alawä, unin päke nake, doxumnim,” yang inikin.

<sup>20</sup> Naxu wenä hikngä tiwän, Isip nanä undä kepnä pewä, Josepdä kewu undä kingge umande uhiwän, kinggä päke, towikngä däknngakut. <sup>21</sup> Josepdä kepnä uhiwän, äminu Isip nanä undä hikngä kingge puyä ämin moyoyi däknngakin. <sup>22</sup> Tike prisu moningu kinggä iwikge yämixawän, naxu uhingnäkakakin. Ge nakge dondapmäke, kepnä dowewä päkut.

<sup>23</sup> Tiwänä Josepdä äminu Isip nanä using yänikut. “Äpmanu kingge umande kepsä, gihä yangu auhinggat. Ge nak salinu anin päku, puyäne pahanong. <sup>24</sup> Itä bulä alawä päkengu, äpuke 1-u kingge imixäwik, 4 gihäle penong. Tikengu gihäle peningune nanä käwutdu sakngäyile pexäwik, käwutdu gihä, gihäxät nanä, äwä engangsä yang näningge, penong,” yang yänikut.

<sup>25</sup> Yäniwän using inikin. “O bulämbam täpänin, ninu axumnangäsä teyä, gätä ilakngä ninduke, gatängnimitäkapunggawi, käluk yiwitnanggekamäng. Ge kingge puyä ämin moyoyile äpme yiwitnim,” yang inikin.

<sup>26</sup> Tiwän Josepdä mämä wamu using tekut. “Isipkätanu kewu kinggänekän. Ge äminu undä naxu puyäne nanä päkengu, äpuke, 1-u kingge imixäwik, 4 inäle pening.” Mämä wamu uläknga äpmankäyä using yiwäxak. Kinggä äminbamde kewu awäke teyä, prisde kewu dowäkut.

#### *Jekopdä inä kupän kwayiningge Josep inikut*

<sup>27</sup> Israel yänggwälu Isip päku, Gosen kep womune yiwikin. Une yiwixäwik, kepnä pätake kuke, engangu dukngixawä, meyä sakngälakut.

<sup>28</sup> Jekowu Isip yiwixawän, krismasu 17 apuxukut. Unekänu krismanä 147 yiwikut. <sup>29-30</sup> Täpduxu axupikge däpi tiwän, wawakngä Josewu yawän apän, using inikut. “Gätä ilakngä nanduxaläkngä kakengu, näle natake, gwälam hikngä tahaxäwik, wamu ganiwilu kätakga bakanale kematde täxäwik, ‘Usingu äpme tahawit,’ yangu hiyäkände hikngä naniyo. Nätä kupa, Isipkätanu maxwayinong. Tike nätä kungäke bapunale kuwa, gupna Isipdä take, bapuna kwayikin womune täku kwayinong,” yang inikut, Josewun.

Iniwän “Usingu äpme tahawit,” yang inikut.

<sup>31</sup> Tiwänä Jekopdä “Anätule umande hiyäkände hikngä naniyo,” yang iniwän, Anätule umande hiyäkände hikngä inikut. Tiwän Israelu däme däpmunä pekgak womune täpu temäke, Anätule eu wam yakut.

## 48

#### *Jekopdä Epraimkät Manasexälu wam gwaläng yämikut*

<sup>1</sup> Täpduxu womdu yiwihikangä, ämindä Josewu using inikin. “Nangga amalik,” yang iniwä, Josepdä wawakngä Manase Epraim yang yänipäke, nanäle kukut.

<sup>2</sup> Kuwän “Wawakga gäle aapuk,” yawä, Israelu awekulu, kwätän hikngä tahake, enake yiwikut.

<sup>3</sup> Tikengä Josewu using inikut. “Nä Kenankätanu taunu Lus unggäpangune\* yiwixäwa, Anätu Kitokngänä Käyä Täpätä apu, wam gwalängu using namikut. <sup>4</sup> Nätä pahawa, gä engangu naxälä towimbi, meyä sakngälawik. Nätä pahawa, bapuka kantrinä inätä take

\* 48:3: Tupä taunu Betel unggäpangu Lus yang inikakin.



yiwitning. Tiwän kewu awomu, bapukale tupäkände äpme yämit,' yang nanikut," yang inikut, Josewun.

<sup>5</sup> Unetakanu using inikut. "Nä ane gäle doapuxäwa, wawakga Isip alakumäläxu aläpöyalu nina wawak däkngakamäläk. Ruben Simeon yang towikum bimä, Epraim, Manase yangkäyä wawakga däkngakamäläk. <sup>6</sup> Tiwän engangu Epraim, Manase yangge mehene towimbiläxu, gikale. Tiwän näle wawakgä kewu Kenan uwomune päningu, Epraim, Manase yangkäyä awähimäläk. Tike ulapnä ile mehene alatningu payänäle kewune yiwitning. <sup>7</sup> Wamu u yänggalu, mingga Reselde natäke yänggat. Kewu Mesopotemia uwom teke, Kenan kewu uwomune taunu Epratde wäkngäsim kuxäwik, Reselu kumgut. Tiwän butayä hikngä natäke, Epratde kahit kwayimune kwayikum," yang inikut. (Epralu, äpmanu Betlehem yang inikaying.)

<sup>8</sup> Tikengä Israeldä Josepde wawak dayike, "Aläpöyalu imin?" yang iniwän, <sup>9</sup> Josepdä yäkwäle wamu using inikut. "Aläpöyalu wawakga Anätutä ane Isip yiwixäwa namikulunin," yang inikut.

Tiwän "Näle päkapso. Tiwän wam gwaläng yämit," yang inikut.

<sup>10</sup> Israelu äminäläke tiwän, kayi kupilä tiwä, nomänu dondayipgut. Ge Josepdä wawakngä yänipäkapän, Israeldä bapunä päku betake, kis tahangyämikut. <sup>11</sup> Betake Josewu using inikut. "Gäle nomu dombänggandupit yang natäxakum deyä, Anätutä pahawän, gikakänu donggandut. Tike wawakgaxät undä dandupa yiwimäng," yang inikut.

<sup>12</sup> Tiwäna Josepdä wawakngä Israelde bälängäne wäkngäsim yiwikumäläxu yäniwän, kwayimune päku yiwixawät, Josepdä sopäsoyä nanäle nomune puke, däme kepkatan täpu temgut.

<sup>13</sup> Josepde wawaxu uläpöyalu, yakap täpä Manase, tiwän ulapnä Epraim. Ge Josepdä Manase kätakngä dambunä hamändä täke, Epraimu kätakngä hiyänä hamändä täke, Israelde yänipäkapän, Manase Israelde hiyä käwut yiwän, Epraimu Israelde dambu käwut yiwikut. <sup>14</sup> Tiwändeyä Israeldä kätakngä hiyä hamändä Epraimde kuhilune täke, kätakngä dambu hamändä Manasele kuhilune täkut. Manasetä gämäk alakut deyä, kätakngä hiyä hamändä doläkut.†

<sup>15</sup> Tixäwik wam gwalängu using yämikut.

"Bapuna Abraham, nana Aisak yangu Anätule wam täwake, ile gepbine yiwikumäläk. Anätu uläpätä yiwikyiwiknga yiwitäkapulu, iwikge nandung yiwik.

<sup>16</sup> Meyä näle apginu nä axumnangäsä teyä, itä ängela däkngake gatängamixawän yiwitäkaput.

Ge Anätu uläpätä wakwakdäkä aläpöyalu bänip kwikwixu äpme yämik.

Ämindä wawakdäkä aläpöyatde uman yakengu, nina, bapuna Abraham, äwä nana Aisak yangge dombulämdäning.

Tiwän wawakdäkä aläpöyalu engangu äpme towimbät, meyä sakngälawik, kewu anggomunen," yang yakut, Jekopdän.

<sup>17</sup> Nanätä kätakngä hiyä hamändä Epraimde kuhit täpän kake, Josepdä "Uhamänu Manasele kuhit tänangäsä tahanggak?" yang natäke, nanäle kätaxu uhamänu Manasele kuhiläne täku tewikge täxäwik, <sup>18</sup> using inikut. "Nan, usingundo. Yakawu aläpänin. Ge kätakga hiyä hamändä ile kuhit täyo," yang inikut.

<sup>19</sup> Tiwänä Jekopdä usingu dolahawikge natäke, using inikut. "Wawaknga, anatät. Ixäyä bapunä äpme meyä sakngälake, kantri inätä täke yiwitning. Tiwän umänä käyä tiwik. Tiwändeyä ulapnäle umanu bulämbam hikngä äpme tiwän, payänäle umanu yapmimbik. Tiwänä ulapnäle bapunä meyä sakngälake, kantrinä inäinä päke yiwitning," yang inikut.

<sup>20</sup> Tikengä täpduxu unggwenune Jekopdä wam gwalängu using yämikut.

† 48:14: Tupä nanätä wam gwaläng yäminingge, wawakngä yakap täpä nanätä kätakngä hiyänä hamändä päke, ulapnä dambunä hamändä päkakin.

“Mahande Israel nanätä äminu wam gwaläng yäminingge natäkengu, gitde natäpä apän, using yänining.

‘Anätutä gwälam hikngä tupä Epraim, Manase yangge pahakut usingu, gälexäyä usingän pahayok,’ yang yänining,” yang yänikut, Jekopdän.

Wamu u yakulu, ulapnä Epraimde umanu yakapde yiwän, payänä Manasele umanu mahande yiwikut.

<sup>21</sup> Tiwänä Israeldä Josewu using inikut. “Nä axumnanggenggat. Tiwändeyä Anätu ginkälu äpme yiwixäwik, bapuhäle kewune hipdu danipäke kuwik. <sup>22</sup> Sekem nanäle kewu nomän hikngä. Tupä kwälemna, gwäwäyana yang päke, Amor nanäxät amäke, kewu uwom tākumu notdale doyämüt, tike gäle gaminggat,” yang inikut.

## 49

### *Jekopdä wawakngä mahande dasingga yiwitninggäne yänitapgut*

<sup>1</sup> Jekopdä wawakngä yangyävambän apä, using yänikut. “Wäkngasim apnong. Tiwän mahande dasingga yiwitninggäne danitapit.

<sup>2</sup> Ginu undä Jekopde wawak, ginu undä ane apnong.

Nä nansä Israeldä yäwilu, apuke natäxätng.

<sup>3</sup> Ruben, gä wawaknga yäkap täpä.

Näle kitokngä, gätä päkuläk.

Wawakdäkäne gä gämäk towikum.

Umanda käyä.

Kitokngäka käyä.

<sup>4</sup> Tiwändeyä umanda wenä tiwik.

Yanggä däknake matäwä sipmäkayingbimä säkge doyiwxaläxunin.

Nanggale mängätkät pekumäläk.

Mängätanaxät peke, mayäkngä bulämbam hikngä namikuläk.✠

Ge gä yakap täpäle doyiwiläk.

<sup>5</sup> Simeonkät Livaixälu yiwikyiwikngä usäkän.

Hängä amäk pahanangäsätäne päke, äminsipmäk tahakamäläxunin.✠

<sup>6</sup> Wepdä wam yäxawälu, nä doxuwa yiwitnim.

Wam yiwikyäxawälu, donggatängyäma yänim.

Inale tokngä natäkengu, ämin sipmäkamäläxunin.

Äminde towiyä gämände kendängalu yumdekän sipmändäkngawät tahandambätäkayingunin.

<sup>7</sup> Bäniptoxu yupsäng natäke, tokngä natäxäwik,

äminu tokngä däkä yumdekän yämikamäläxunin.

U tahakamäläkge tokngä däkä inä pähimäläk.

Tiwän bapunä unekänu donggatäke yiwitning.

Tike Israelkätanu kewu notnätä päningune täpätu täpätu petäke kuwa yiwitning.

<sup>8</sup> Juda, notdatä umanda tängetnatning.

Iwalda gätäkän sipiläk.

Tiwän nanggale wawakgä gäle sopäsopä putning.

<sup>9</sup> Juda, gä laion bimä.

Laiondä kälap ku sipmäke nake,

hipdu päkapu pekyiwixawä,

ämindä doxu pahangyävaxayingbimä.

<sup>10</sup> King puyä Judatä täpixu ämindä doläning.

✠ 49:4: Yakap 35:22 ✠ 49:5: Yakap 34:25-30

Inä bapunätä tätäke koxawä,  
towikngätä apungä puyä uläknga täpik.

Täke kantri undä itä daying yiwik.\*

<sup>11</sup> Donggi wain puyäne äwamä pewä, wain salinu änäning.  
Tiwän täwikngäxäyä wain yanggätä ähälutning.

Tiwändeyä wainu dowuluwik.

<sup>12</sup> Ämindä wain tängokgäwä, kayi wain bimä dak tining.  
Kälawu äminsakge mämu ämindä päke tängokgäwä,  
mayä mämbimä kwak hikngä tining.†

<sup>13</sup> Sebulunu yanggä gwende kwayimune yiwik.  
Kewu uwomu nomän tiwän, sipdä päkapu yiwitningge nomän.  
Kewu Sebulundä täpixu täkungu taun Saidonde kewune yiwik.

<sup>14</sup> Isakalu donggi kitokngä gwendu bimä.  
Tiwändeyä meyä käwukäwut wamängämä,  
moyo päke pek yiwik.

<sup>15</sup> Isakalu kewu äyiwä täkaningge womdu kawän nomän hikngä tiwänu,  
moyo yiwän täkäning.  
Tike äminde puyä ämin moyoyi däknage,  
meyä päpikge gwetakengu,  
puyä kitokngä hikngä pahawik.

<sup>16</sup> Danu äminä nomän daying yiwik.  
Israel notnätä daying yiwixaying using daying yiwik.

<sup>17</sup> Danu gomok bimä.  
Gomokgä kahitapäne kohopike yiwixawä, äminu hos tängäne apä, hosde bäläng  
yähawä, hosdä hätnawä, äminu hos tängäne yiwixayingunin päkepu sipmäkay-  
ing using tahawik.‡

<sup>18</sup> Yawe, gätä gatängamiläkge yiwixat.

<sup>19</sup> Gatde yolu kukanananggä apu pahawä malining.  
Tiwändeyä Gatdä mähexätandä apu sipik.

<sup>20</sup> Aserde kewune naxu nomän alätning.  
Tiwän naxu gwälam hikngä kingge yämik.

<sup>21</sup> Naptali meme tukgä inä natäk tihikuxäwik,  
engangä gwälam hikngä dukngikaying using tahawik.

<sup>22</sup> Josewu nawu täkngatu bimä.  
Yanggä akondokayingune doke, salinä meyä hikngä aläxawä,  
kätakngä täpmäxäwik, dämän täpä täpä kopik.

<sup>23</sup> Kwalemdä amäkaying ämindä tokngä natäke kwälemdä temningge pahakin.

<sup>24</sup> Tiwändeyä Josewu kwälemnä päkulu,  
kätakngä doyamumbä, nomängän mukut,  
inale Jekopde Anätu kitokngänä käyä uläpätä gatängämikut.  
Anätu uläpä Israel daying yiwixak täpänin.

\* 49:10: Wamu aläknga, yäpulinä kätak hikngä donatäxayingunin. † 49:12: Judale kewu nomän hikngä tiwän, nak puyä meyä pahaxäwik, kälawu meyä towitning. ‡ 49:17: Dande bapuna äminu naxäländö. Tiwändeyä kitokngänä käyä tiwä, iwalnä sipning.

Anätu uläpä Israelde hup. §

<sup>25</sup> Bapukale Anätutä gatängaminggaxunin.

Anätu Kitokngänä Käyä Täpätä bänip kwikwik gaminggaxunin.

U gamikgä pahawän, hopä enetängätä kepdane epning.

U gamikgä pahawän, yanggä amälankätandä kepdane akopning.

U gamikgä pahawän, mängälä gin yänggwätkätan nanä engangu meyä dukngitning.

<sup>26</sup> Wam gwalängu bapunatä näle namikinu, gäle gamitdä ayapmik.

Wam gwalängu meyä hikngä anggaminggätdä täwalde nomu ayapmik.

Wam gwalängu anggaminggalu gätä päpiläk.

Notda täkwäkätanu äminu bulämbam däknkuläkgä päpiläk.

<sup>27</sup> Bensaminu homu tuxu kitokngäna käyä gwendu bimä.

Kälawu tembänä ku sipmäke nänggaxunin. \*\*

Ge kupiläne notnäle uhike yäminggaxunin,” yang yakut, Jekopdän.

<sup>28</sup> Wamu uläkwäxu Israelde wawaxu 12 uläkwäke bapunä mahande dasingga yiwitninggäne yänikulunin. ‘Using yiwitning’ yang u yänikulu, wawakngäle yiwikiwikngä dayipän tixawä yänikut

*Jekopdä kupän kwayikin*

<sup>29-30</sup> Wawakngä mahande dasingga yiwitninggäne yänikengä, Jekopdä wawakngä puyä wamu täkngatu using yänikut. “Nä axungwäke notna axumgin aminde kuwitde däpi alik. Ge axupa, gupna Kenan täke kunong. Täku hupgänangu bapuna, nana yang pekändäkäne tenong. Hupgänangu undäkä Makpelaxätan, Epron Hit nanä uläpäle kewune. Makpelaxät Mamrexälu wäkngäsim wäkngäsim. Hupgänangu undäkä kepkät Abrahamdä Epronde kätaxune mätmätde uhikut. <sup>31</sup> Abraham, mängätinä Sara yang undäkäne pekin. Tiwän Aisak, mängätinä Rebeka yangkäyä unekän pekin. Ge Leatä kupäntäyä une tekum. <sup>32</sup> Kewu uwomkät, hupgänangu undäkäxälu Abrahamdä Hit nanäle kätaxune auhikut. Ge ninaxäyä axupa, gupna aläku, hupgänangu undäkänekän tenong,” yang yänikut.

<sup>33</sup> Puyä wamu wawakngä yänipulukengä, Jekowu bälängä awekgaxune päko peke kungäke, bapunä tupä kunginde kukut.

## 50

<sup>1</sup> Nanatä kupän, Josewu butayä hikngä natäke, nanä betake initixäwik, kis tahangämikut. <sup>2</sup> Tikengä “Gupnä bukatayäk,” yake, puyä äminä doktale yiwixaying täkwäxu yäniwän, nanäle guwu mälasin pexäwik, täwikgä täpä koptut. \* <sup>3</sup> Puyä uläknga tahananggengu, täpduxu 40 tahakakin. Ge Israelde guwu using pahaxawä, täpduxu 40 apuxukut. Tixawän Isip nanä ile butayä natäke, kwänäm tixawä, täpduxu 70 apuxukut.

<sup>4</sup> Butayä täkngane yiwikinu puluwänä, Josepdä kingge puyä äminu umanä käyä täkwäxu using yänikut. “Näle täke natäkengu, kingu using ininong. <sup>5</sup> ‘Josewu nanatä using inikut. “Wamu uyäwilu, Anätule umande ‘Usingu äpme tahawit,’ yang naniyo,” inike “Nä axupitde däpi alinggak. Ge nätä kupa, mätmälu Kenen kep womune ninale kwayikum däkäne täku teyo,” yang iniwän, “Usingu äpme tahawit” yang Anätule umande inikut. Ge täkembä tewi, nanä Kenan täko tekengä, hipdu apik?” yang ininong,” yang yänikut. <sup>6</sup> Yäniwän king ku iniwä, Josepde wam natäke, kinggä using yakut. “Täke. Nanggatä yawän Anätule umande inikuläk using täko teyo,” yang inikut.

<sup>7</sup> Tiwänä Josewu nanä kwayiwikge koptut. Tiwän kingge puyä äminu umanä käyä kingge yolune pahakaying, puyä äminu umanä käyä Isipkätan pahakaying awä <sup>8</sup> Josepkät

§ 49:24: Anätu huwu bulämbamu gwendu bimä. Israel nanä undan kuhopiwä, iwalnätä sipnangäsändo. \*\* 49:27: Homu tukgä kälap yäwake sipmäke napulukaying using, Bensaminde bapunäxäyä iwalnä using pahaning. \* 50:2: Isip nanä umanä käyä ämindä kupä, gupnä bukatayäk yake, doktatä gupnä matäke, bäniyä sike, maäläsinu inäinä peke, täwikgä wamätäke kokakin. Tikengu boksune pexakin.

nanä, payänä, ulapnä, nanäxät nanä yangu undä kopgin. Tixawän Gosenu engangä, sipsipnä, towiyä gämänä yanggäkän yiwikin. <sup>9</sup>Tixawän amäk äminu hos tängäne päko yiwike kukaying ämin, äwä karis bimälängäne päko yiwike kukaying ämin yangkäyā using kopgin. Äminu u kopginu meyä hikngä.

<sup>10</sup> Axuhika Atat nanätä witde dapäkdapäkngä uhinggikaying womune kundopgin. Atalu Yanggä Jodan Dupine wäkngäsim. Uwomune kundokengu, butayä hikngä natäke, kwänämu bulämbam gwen tikin. Tixäwik Josepdä nanäle natäke, butayä täkngane yiwixawän, täpduxu 7 apuxukut. <sup>11</sup> Butayä täkngane yiwixawä dayike, Kenan nanä uwomune yiwixayinggä using yakin. “Isip nanä butayä hikngä natäxaying,” yang yakin. Ile tiwän, kewu Yanggä Jodan Dupine wäkngäsimu uwomu, umanä ‘Abel Misraim,’<sup>†</sup> yang inikaying.

<sup>12</sup> Jekopde wawaxu inä yänikut using tahakin. <sup>13</sup> Nanäle guwu Kenan kewune täko, hupgänangu Makpela nanä däkäne tekin. Makpelaxät Mamrexälu wäkngasim wäkngasim. Hupgängangu undäkäxät kewu uwomkälü Abrahamdä mätmätnäle, Efron Hit nanä uläpäle kätaxune uhikut. <sup>14</sup> Nanä kwayikengä Josep, notnä äwä äminu ixät kopgin yangu undä hipdu Isip kukin.

#### *Josepdä notnä bänip kwikwik wam yänikut*

<sup>15</sup> Nanä kwayikengä, Josepde päyänä täkwäxu using yakin. “Nanu alikut. Ge wäyi täkgnaläknga Josepde pahakumängge, yäkwäle Josepdä tokngä natäke, tokngä däkä nimiyäk,” yang yakin.

<sup>16</sup> Yake wamu Josepde using tewä kukut. “Nangga axupikge däpi tixawänu, using ninikut. <sup>17</sup> Josewu using ininong. “Wäyi täkngaläknga payakatä gäle pahake tokngä däkä gamikindeyā, gutongänä pahawi hopinong,” yang ininong, yang ninikut. Ninu nanggale Anätule gepbine yiwixamäng. Ge wäyininu takembä pahawi hopining?” yang yawä ku inikin. Iniwä Josewu wamu uläknganin natäke, kwänämnä tikut.

<sup>18</sup> Tiwänä payänä undä täkwäkngä takapu, Josepde kayine pimake, “Ninu gäle puyä ämin moyoyi,” yang inikin.

<sup>19</sup> Iniwä using yänikut. “Manaxälatnong. Nä Anätundo, ngä nätä tokngä däkä damit. <sup>20</sup> Gindä näle wäyi pahaningge natäpgin. Tiwändeyä Anätutä wäyi u pahakinunin täpän täkwämbän, nomän tik. Äminu meyä axumnangäsä teyā, Anätutä anggatängyämän, käluk yiwixaying. <sup>21</sup> Ge manaxälatnong. Gihäxät engangsäxälu äpme dandung yiwit,” yang yänikut, bänip kwikwik wamun.

#### *Josewu äxumgut*

<sup>22</sup> Josewu notnä täkwäkät Isip yiwikin. Tixäwik Josewu krismanä 110 tikut. <sup>23</sup> Äyiwixawängän wawakngä Epraimde bapunä alawä, wawakngä Manasele wawaxu Makirde engangkäyā alawä, Josepdä inäle päkut.

<sup>24</sup> Tiwänä Josepdä notnä using yänikut. “Täpduxu axupitde däpi alik. Tiwändeyä Anätu anggatängdamikge äpme apik. Itä apungu, ginu kewu awomunetä, kewu Abraham, Aisak äwä Jekop yangge yämikge kitokngä hikngä yänikut womune danipäke kopik,” yang yänikut. <sup>25</sup> Yake using yänikut. “Wamu daniwilu, ‘Usingu äpme tahanim’ yangu Anätule umande naninong. Anatutä anggatängdamikge apänu, gupna kewu awomunetä ähikngä täke kopnong,” yawän, “Usingu äpme tahanim,” yangu Anätule umande inikin.

<sup>26</sup> Josewu krismasu 110 yiwike kumgut. Tiwänä gupnä mälasin peke, bokskätan tekin.

<sup>†</sup> 50:11: Hibrü wamune ‘Abel Misraim’ äwä “Isip nanä kwänäm tikaying,” yangu guläkngä usäkän.

## Rut

### *Naomi ayä axumgut*

<sup>1</sup> Tupä Israel nanä kingu wenäne, Israel äminde kepkätanu gusit tiwän, naxu wenä tikut. Tiwän Juda nanä täpätu Betelehem yiwixakulu, mängätnä, wawakngä täpäyat yang päpän, Israelu teke, womsimu kantri Moap päku yiwitningge kukin. <sup>2</sup> Wäwi uläpä umanä Elimelek, tiwän mängätnä Naomi, tiwän wawakngä uläpäyatde umanu Malon, Kilion yang. Uyänggwälu Efralunetä sakngälakin. Tiwänu taunä Betlehemu uwomu Judaxätan. Uwomu aleke päku Moap yiwikin.

<sup>3</sup> Päku yiwihika, Elimelexu aweke kungäxawän, Naomi wawakngä täpäyatkät inäkän yiwihika, <sup>4</sup> wawakngä mängätnä Moap nanä päkumäläk. Umanä Opa, Rut, yang. Moap päku, krismasu 10 yiwike, <sup>5</sup> wawakngä Malon Kilion yangkäyä undä kungumäläk. Ayä wawakngä uläpäyat yangu undä teke kungin, Naomin.

### *Naomixät Rutkät Betlehem kukumäläk*

<sup>6</sup> Womsimu Moap yiwixawän, “Yawetä äminämbamu apu gatängyämike, naxu wuyäne nanä yäminggak,” yawä natäpgut. Tikengä Moap teke ayinä täpäyatkät hipdu kuningge tändäkngakin. <sup>7</sup> Tike ayiwixakut womu teke, hipdu Juda kep womune kuningge kahit täpäne kukin.

<sup>8</sup> Täku kahitbäna ayinä yänikut, “Hipdu mingsä yot gihänggihä kukahon. Gitdä näxät, axumgin äminkätde tahakumäläk bimä tāknga, Yawetä gitde gwälam hikngä pahayok. <sup>9</sup> Yawetä gatängdamän, apsä päke, ile yolune gupsäng yiwison,” yake, kis pahangyämän, kwänämnä duksäng tikumäläk.

<sup>10</sup> Tixäwik, “Undanä. Nilu notdambamde gäxät kunim,” yang inikumäläk.

<sup>11</sup> Tiwän “Ayina hikngä, kukahon, yotsäle. Inale kunim, näxälun? ‘Wawakngä äpmembä dukngiwän itä pähimäläk,’ yang natäxamäläk?” yang yänikut Naomitän. <sup>12</sup> “Ayina hikngä, yotsä hipdu kukahon, inale nä äminäläke alit. Ge apna tänangäsando. Nina natäpa wawak dukngitnangäsä tiwän, kupilä anggwenunekän apna täke, wawaknga dukngiwa, <sup>13</sup> gilü ile yiwixawät tākahimäläk? Bä wäwi täpätuyi dayikengu, apsäle doxuhimäläk? Ayina hikngä, undana. Meyä gitdä pämläxu nätä pätdä ayapmik, inale Yawetä nä maha temängamikut,” yang yänikut.

<sup>14</sup> Unin yäniwän, hipdu duksäng hikngä tikumäläk. Tike Opa hawanä kis tahangämike, yotnäle kukut. Tiwändeyä Rulu Naomixät gatäke kuhimäläkge natäpgut.

<sup>15</sup> Tiwän, Naomitä inikut. “Kayo. Notda mängälu notnämbamkät anätunäxätde hipdu axunggak. Gäxäyä kuwi kukahon,” yang inikut.

<sup>16</sup> Tiwändeyä Rutdä using inikut. “Anggapmambitde mananing yäpikike, hipduna kuwitde mananing yäpiyo. Säneka kuwi, näxäyä axuwit. Säneka yiwi, näxäyä une yiwit. Gäle notdambamu näle notna. Gäle Anätuka näle Anätuna. <sup>17</sup> Säneka kupi, näxäyä une kupa kwayining. Nilu kungäkgäkänä matäwik. Tike hängä täpätutä matäwänu, Yawetä meyä bulämbam hikngä namikge natäxat,” yang inikut. <sup>18</sup> Tiwän Naomitä kawänu, Rulu ixät kuhimäläkge kitokakut. Tiwän axuwikge ining yäpikulu undan tekut.

<sup>19</sup> Tiwänä unetä kuhika, ku Betelehem kundopgumäläk. Kundopät Betelehem nanä undätä duksang kulakaxäwik, mängälätä “Naomimbä an?” yang yakin.

<sup>20</sup> Yawä “Naomi yangu mananinong. Mara yang naninong, inale Anätu Kitokngänä Käyä Täpätä yiwikiwiknga alahawän wäyi hikngä tikut,” yang yänikut, Naomitän.\*

<sup>21</sup> Tikengä hipdu using yänikut. “Anetä teke kukumu, hängäna meyä. Tiwändeyä Yawetä hipdu moyo hikngä nanitakapuk. Ge Naomi yangu inale nanining? Yawetä nä alahawän malit. Kitokngänä Käyä Täpätä meyä anamik,” yang yänikut.

\* 1:20: Naomi yangu yäpuli kulakak. Mara yangu yäpuli meyä.

<sup>22</sup> Wamu uläknga Naomitä Moap kep teke, ayinä Rulu Moap nanä täpaxät hipdu kukumäläkgäne. Täpduxu uwomkätanu sänggum bimä bali yang yänikayingu moyokän matäxawä, Betlehemu kundopgumäläk.

## 2

### *Rulu Boasde wuyäne pahakut*

<sup>1</sup> Naomile ayä Elimelekät nanä täpätu hängänämbamgän tiwän umanä käyä. Uläpä umanä Boas.

<sup>2</sup> Rut Moap nanä täpätä Naomi inikut. “Tewi wuyäne kuwa, imindäka ilakngä nandupänu, ile mehene kuxäwik, bali salinu itä matäxawän epningu butuwit,” yawän, “Ayina hikngä, kuyo,” yang inikut, Naomitän.

<sup>3</sup> Tiwän Rulu axu, nak matäkakin äminde mehene yäwaxäwik, bali itä matäxawä epginu, bututäke kukut. Puyä ulängä kukulu, Boas Elimelekät nanä uläpätäne yangu äpmeyä katapgut.

<sup>4</sup> Awahaxawä, inä unggwenunekän Boasu Betlehemdä apu, nak matäkakin äminu “Yawexälu gikä, yang yäniwän, yäkwäle “Yawetä pahawän nomändän yiwiläk,” yang inikin.

<sup>5</sup> Tiwänä Boasä nak matäkin ämindäne kuhiläle tuwängukut täpä inikut. “Mängälämätexu aläpä imindäne?” yawän, <sup>6</sup> yäkwäle using inikut. “Uläpä Moap nanä, Moapdä Naomixät apgumäläxunin. <sup>7</sup> Tembänä apu ‘Täkembä tewi nak matäkaying äminde mehene yäwaxäwik, bali awamäxawä däpäkngä epningu butuwit?’ yang nanike, bututäkapuk. Tiwändeyä gepmäne matekngä wesim yiwän täkaying,” yang inikut.

<sup>8</sup> Tiwänä Boasä Rut inikut. “Kätak natäxayo. Bali wuyä awomu maleke ku, täpätuy-itäne tängälängäne mambutuyo. Mängälämätexu wuyä alängäne pahakayinggä kuxawä kuxäwik butuyo. <sup>9</sup> Wäwi säneka matäwayak yangu kätak dayixäwik, mängälämätexu ixät pahakayingu mehene yäwayo. Puyä ämina, ‘Malahawä maliyok,’ yangu kitokngä ayänit. Yanggäkalembä tiwä, axu itä uhike peningunin tangopso,” yang inikut.

<sup>10</sup> Tiwänä Rutdä sopäsopä puke, kuhilä kewune täpu temäke inikut, Boasun. “Nä malä nanä. Tiwändeyä ilakngä inale nanduxaläk? Näle inale natäxaläk?” yawänä, <sup>11</sup> Boasä inikut. “Nä anatäpgum, apdatä kungaxawän, hawakale dasingga tahatäkapunggaläxun. Mingga, nangga, yotda yang peke, äminu tupä dondayiakuläkke apguläkke nä anatäpgum. <sup>12</sup> Ge u tahakuläkke yäkwäle, Yawetä gamiyok. Yawe Israel nanäle Anätuninu anggandung yiwikge apguläk täpätä hängäläpä meyä gamiyok,” yang inikut.

<sup>13</sup> Yawän, “Bulambam täpäna, gä näle ilakngäkänu usinggän nandupiläkke natäxat. Mängälämätexu gäle wuyäne pahakayingu umanä käyä, tiwän nä umana wenä. Geyä wam gwälangu gätä naniläkgä, meyä nätä pälu anggatängaminggak,” yang inikut, Rutdän.

<sup>14</sup> Nak nänangäsä täpduk tiwän, Boasä Rut inikut. “Ane apu, brelu päke, yanggä kaxalä täkngane pewi kaxalawä, nänggä,” yang inikut. Yawän, Rulu täkapu, bali matäkaying ämindä yiwikinune puku yiwikut. Tiwänä Boasä sänggumde notnä puhäk hakinu imikut. Imän napän täke tiwän, naxu käwutdu ayiwikin.

<sup>15</sup> Anake, bali butuwikge enaxawänä, Boasä wuyä äminä kitokngä yänikut. “Bali awamäpeningunembä päpän kakexäyä, mainiwä mayäkayok. <sup>16</sup> Tike awamäpeningune nanä notnäxäyä aluliwä akopä pengäminong, tiwän butuwik. Tiwänu maininggämätanong,” yang yänikut.

<sup>17</sup> Geambutuxawän tukawän, bali u butukulu täku sipmäng yäwambän bulätäkän epä kawänu, meyänä 13 kilo bimä tikut. <sup>18</sup> Tiwän bali päke, taun täku, dasingdasingga päkulu hawanä iniwän kakut. Tiwän anapän täke tiwän yiwikinkät sike imikut.

<sup>19</sup> Imän kake, “Äpmanu säne butuläk? Iminde wuyäne pälak? Äminu uläpä gandutewän päläxu, Yawetä pahawän nomändän yiwiyok,” yang inikut, Naomitän.

Iniwän Rutdä, inikut, iminde wuyäneka pahakulun. “Puyä ulängä pätdäne towikngä umanä Boas,” yang inikut.

<sup>20</sup> Iniwän, “Boasu Yawetä pahawän nomändän yiwiyok. Yawetä axumgin äminkät käluk yiwixaying äminkätde gwälam hikngä pahanggaxu dolexak,” yake using inikut. “Wäwi uläpä apnitde notnä hikngä. Ge notnäle natake nindung yiwitnangäsä täpätu,” yang inikut, Naomitän.

<sup>21</sup> Iniwän, Rut Moap nanä uläpätä inikut. “Täkngatuxayä using nanik. ‘Puyä äminaxät unekän gatäke kuxäwik butuyo. Tixawän sänggum bimä undä matäwä puluwik,’ yang nanik,” yang inikut.

<sup>22</sup> Tiwän Naomitä Rut inikut. “Ayina hikngä, mängälämätexu Boasde wuyäne pahakayingkät kuningu täke. Inale äminu täpätule wuyäne ku päxawi, tahawä maliyä,” yang inikut.

<sup>23</sup> Ge mängälämätexu Boasde wuyäne pahakakinkät gatäxäwik, bali pänggäwä puluwän, witkäyä pänggäwä pulukut. Unggwenggwenkätanu Rulu hawanäxät yiwikumäläk.

### 3

#### *Rulu ayäle täwakut*

<sup>1</sup> Täpduxu gwendune hawanätä Rut inikut. “Ayina hikngä, nätä wäwi täpätu kake gama, itä mängätnäle täpän, yotsäne gupsäng yiwisimäläk. <sup>2</sup> Boasde natäpso. Mängälämätexu ile wuyä pahaxawä ku butukuläxu uläpä apnitkät nanä. Äpmanu tukwatde bali sipmäng yäwäxawä bulätä epukaying womune däpäkdäpäkngä uHINGGIWIK. <sup>3</sup> Ge yanggäka häluke, hängä kápängänä käyä gupdane pahake, täwikga käluk pahake, uwomune kuyo. Tike nak yanggä yangu donapuluxawänu, alänggämänu maxuwi gandupsok. <sup>4</sup> Awäku pewänu, une hikngä pekgak yangu kätak kayo. Ge awexawänä, ku täwixu aomipewixu, nomnä bälängä omimbik däkähimgän tängenake, bäläng kwayimnäne peyo. Tiwänu itä dasingga tahawiläkge äpme ganiwik,” yang inikut.

<sup>5</sup> Iniwän Rutdä inikut. “U yänggaläk usingu äpme undä pahawit,” yang yakut.

<sup>6</sup> Tikengä Rulu bali sipmäng yäwäxawä bulätä epukakin womune ku, hawanätä dasingga inikulu, undä täwake pahakut.

<sup>7</sup> Boasu nakngäxät yanggänäxät napän, täke hikngä tinggawän, bänipgwäläng natake, bali pekinde kwayimune päku pekut. Pexawän, Rulu wepdäkän ku, täwixu bälängä pänguhikulu, nomnä däkähimu tängenake, bäläng kwayimnäne pekut.

<sup>8</sup> Ge Boasdä kepdamände, dasingga tike enake, täpän täkwämbänu, mängälä täpätu bäläng kwayimnäne pekgawän kakut. <sup>9</sup> Kake, “Gä imin?” yawänä, Rutdä, “O bulämbam täpäna, nä Rut. Gä apnale notnä. Ge mängätdale täyo,” yang inikut.

<sup>10</sup> Iniwän, “Yawele pahawän nomändän yiwiläk. Ge gwälam hikngä täknga äpmasim tahanggaläk, tupä hawakale tahakuläxu ayapmik. Wäwimätexu hängänämbamgänbä bā hängänä wenämbä unin ku apdale päpi yiwixät nangäsä teyā usingu dolahaläk,” yang inikut. <sup>11</sup> “Manatänatäliyo. Äminbamu taun yiwixaying undä anatäxaying, gä mängälä nomän täpä yangun. Ge wamu u yäläxu undä äpme tawake pahawit. <sup>12</sup> Hiyäkän. Nä apdale notnä. Tiwändeyä apdale notnä hikngä täpätu undan. Tike nä atumaha bimä. <sup>13</sup> Kupiläne ane yiwiyo. Ge gwäsiyā katapnim. Dasingga, notnäle natakungu, äpmembä mängätnäle täke gandung yiwik. Using tahawixu täke. Tike wenä tiwänu, Yawele umande yänggat. Nätä äpme täke gandung yiwit. Ge une pekgayo. Tixawän gwäsi tiwik,” yang inikut, Boasdän.

<sup>14</sup> Tiwänä bäläng kwayimnäne pexawän, axwakawikge tixawän, “Ämindä nandupnäng” yake enakut, inale “Mängälä täpätu bali sipmäng yäwäxawä bulätä epukaying womune kuk,” yang natäpnäng yakut, Boasdän. <sup>15</sup> Tikengu unetäkän using inikut. “Kwäman täwikga täpi dopän täpi wäsiwän,” yang iniwän, using tahawän, 25 kilo bali wälükngämike, täko gwäpikngämike, hipdunä taunde kukut.



<sup>16</sup> Tixawän Rulu hawanäle kuwän, using inikut. “Ayina hikngä, kuwi dasing tahak?” yang iniwän, Boasdä ile dasingga pahakulu Rutdä undä inikut. <sup>17</sup> Inike, unetäkänu using inikut. “‘Hawakale moyo hikngä maxuyo,’ yake bali 25 kilo namik,” yawänä, <sup>18</sup> Naomitä inikut. “Ayina hikngä, wepdä yiwixayo. Tixawän dasingga tiwixu, äpme yawä natäpiläk. Inale wamu uläknga yawän nomätawikge, äpmanu Boasu doyiwän tākānanggekaying.”

## 4

*Boasdä mängätnäle täkut, Rulun*

<sup>1</sup> Tixawän Boasu taunde yämä dākāne, wamu inulung wopwom yiwik yäkakin womune päku, une puku yiwikut. Yiwixawänu, Elimelekge notnä Boasdä natake yakut täpä une apgut. Apän, Boasdä inikut. “Notna, ane päkapu puku yiwit,” yawän, päku puku yiwikut.

<sup>2</sup> Tiwänä Boasdä kuhiläle taun yiwixakinu 10 using päke yawän, unuxäyā unekän päku puku yiwä, <sup>3</sup> itä notnä uläpä inikut. “Naomi hipdu Moapdä apgut täpätä kewu notnit Elimelekgäne moningge tek. <sup>4</sup> Ge ayäwa natäpiläkge natät. Ge gä notnitde natake, ile kep kang yiwiläkge uhiwiläkge natäkengu, äminu ane puku yiwiyingu aläkwäk äwä notnambamde kuhiläle yiwixayingu aläkwäk yangge kayine uhing. Tike mehe natäkengu, nomän naniyo, tiwän natäpit. Inale, äminu täpätuyitä uhinangäsādo. Tike gäkän. Tiwänä nä unetä ätumaha bimä,” yawän, äminu uläpäta, “Näta äpme uhiwit,” yang yakut.

<sup>5</sup> Tiwänä Boasdä yakut. “Täke hikgnä. Gä kewu Naomile kätaxune uhikengu, usinggän Rut Moap nanä kombälu uläpaxäyā aläpiläk. Ge axumgut äminde hängäläpä umanä tāknga yangu using ayiwitning,” yawänä, <sup>6</sup> notnä uläpätä yakut. “Using kakengu, nä uhinangäsādo, inale moningu engangale yäminangäsä, moyo mumba kunäng. Ge gika uhing. Douhiwit,” yang inikut.

<sup>7</sup> Täpduxu unggwengwenkätanu Israel nanä hängä täpätu äminde yanguhiningge natäkengu, äminu täpätutä bäläng yayikngä utdoke, äminu auhiwikge natäxakut täpäle imikakut, wamu uläknga yawä nomätānanggengun. <sup>8</sup> Ge notnä uläpätä Boasu, “Gika uhing,” yang inikengu, bäläng yayikngä utdoke imikut.

<sup>9</sup> Tiwänä Boasdä kuhiläle yiwixakinu uläkwäk äwä äminu undä une yiwikin yangu using yänikut. “Ginu äpmanu ananduxawä, Elimelekät wawakngä Malon awä Kilion yangge hängäläpä undä hikngä Naomile kätaxune uhinggat. <sup>10</sup> Unetäkän daniwilu, Rut Moap nanä Malonde kombälu uläpä nätä mängätnale tänggat, axumgut täpäle hängäläpä awä umanä tāknga yangu usinggän yiwitningge. Ge bapunä gwende uman tāknga itä teng yiwixäwik, Malonde notnäle uman yakengu, ile dombulämdäning, taunäxätanun. Ge ginu äpmanu ananduxawä uhinggat,” yang yanikut.

<sup>11</sup> Yawän, kuhiläle yiwixakin awä äminu undä yämä dākāne yiwikin yanggä yakin. “Hiyäkän, ninu angganduxätna uhinggalak. Yawetä mängätä yotdane kopixu uläpä tahawän, Reselkät Leaxätä Jekopde engangu meyä dukngikumäläk bimä tiyok. Ge gä Efratkätanu hängäka meyä tiyok. Tixawän Betlehemkätanu umanda tāknga yatake kopnong. <sup>12</sup> Yawetä engangu mängälä uläpäle imän dukngikgamixu, inä tahawän gin yänggwälu Juda Tema yangge wawaxu Peres yänggwät tikut bimä tike, umansä käyā tiyok,” yang inikin.

*Rutdä Boasde wawak dukngikut*

<sup>13</sup> Tiwänä Boasdä Rulu yotnäne täke kuwän, mängätnä dākngawän, yiwikumäläk. Tiwän Yawetä kitokngä imän, tängäne käyā tiwän, engangu wäwi täpätu dukngikut.

<sup>14</sup> Dukngiwän mängälätä Naomi inikin. “Yawele uman tängenatnim. Itä äpmanu anggandung yiwitnangäsä täpätu anggamik. Äpme Israelkätanu wawakdäkä uläpäle uman tāknga yatake kopnong. <sup>15</sup> Tiwän itäyā yiwikyiwikga pahawän käluk tiwä, äminu täke tixawi, itä äpme gandung yiwik, inale ayikatä wawakga 7 itä tahanangäsä bimä tāknga ayapmike, gäle butayä natake, dukngikgaminggak,” yawä <sup>16</sup> Naomitä engang kápä betäxäwik, kang yiwikut.

<sup>17</sup> Tiwän mängälä inalängän yiwixakindä umanä Obet yang inike, “Engangu wäwi uläpä Naomile dukngikngämik,” yang yakin, ämimbamun. Tiwänä Obelu Jesile nanä, tiwän Jesi Dewitde nanä.

*King Dewitde bapunä*

<sup>18</sup> Peresde wawaxunetä sakngälatäke ku King Dewilune kukulu using. Peresde wawaxu Hesron.

<sup>19</sup> Tiwän Hesronde wawaxu Ram. Tiwän Ramde wawaxu Aminadap.

<sup>20</sup> Tiwän Aminadapde wawaxu Nason. Tiwän Nasonde wawaxu Salmon.

<sup>21</sup> Tiwän Salmonde wawaxu Boas. Tiwän Boasde wawaxu Obet.

<sup>22</sup> Tiwän Obetde wawaxu Jesi. Tiwän Jesile wawaxu Dewit.

## Jona

### *Jona Täckeläpäle wam upukut*

<sup>1</sup> Yawetä Jona Amitaile wawaxu using inikut. <sup>2</sup> “Gä Niniwe<sup>\*</sup>, taunu inulung hikngä unggäpangune kuyo. Ku duksäng yäninggämätayo. Inale nä andayit, itä gutongä hikngä yiwik maliyingun,” yang inikut.

<sup>3</sup> Tiwändeyä Jona Yawele wam hapduke, Tasisde datäkuwikge kukut.<sup>†</sup> Yawe teke datäkuwikge, Jopa puku, siwu gwendu Tasisde kuwikge tahanggawän kake, moningu uhike, unggwenune koke, Tasisde kukut.

<sup>4</sup> Tiwändeyä sip gwenu axuxawän, kwämanu Yawetä tewän, yanggä gwenu inulung hikngä apuxawän, yanggä gwenkäyä naxälä täku temgut. Tinggawän sip uputnangäsä tikut. <sup>5</sup> Tiwän sipde wuyä äminu anaxälake, anätunäle inäinä tumuxu anggatängyämningge yaxawik, “Asing pahana, sip gwenu kwängä äpmembä tiwik?” yake, hängäläpä une pekinu päxawik, yanggäxätan mumbä wukukin.

Meyä uläknga apgulu, Jona siwu gälämnä gwenkätan täpu däpmunä pekbuläm-daxawän apgut. <sup>6</sup> Tixawän sipde kuhiläle yiwixak kápätä puku kake, “Meyä täknga apuxawän, Gä inale pekgaläk? Enake, anätukale tumuxu yang. Tiwän itä butayä äpmembä ninduke nipmambän yiwitnim,” yang inikut.

<sup>7</sup> Tixawän sipde wuyä ämindä inäkän yakin. “Umaninu yamäke bekätan kekngälutnim. Tikengu iminde umanda tükengu ile meyäle apunggak yänim,” yake, using tahake, Jonale uman täkin.

<sup>8</sup> Tikengä Jona inikin. “Nining. Meyä ninde apunggaxu aläknga, iminde meyäle tiwän apunggak? Gä ina wuyä pahanggaläxunin? Tiwän säne nanä? Gä kantri sanggäpangune nanä? Gä äminu saläkwäkät nanä?” yang inikin. <sup>9</sup> Iniwäyä, Jonatä using yänikut. “Nä Hibrü uläkwäkät nanä. Nä sopäsopä Yawe Anätu yekäwune nanä, kep, yanggä gwen yang pahakut täpäle pukgalunin,” yang yänikut. <sup>10</sup> Yakapkäyä Jonatä “Yawe teke datängapunggat,” yangu ayawän natäpgingde, naxälä hikngä natake, “Usingu inale tahaläk?” yang inikin.

<sup>11</sup> Yanggä gwenu hipdu aläku temgulu yapmike, meyämeyäkän täku temänggawän, “Gäle dasing tahana, yanggä alinggaxu kupitang yiwik?” yang inikin. <sup>12</sup> Iniwä yäkwäle Jonatä using yänikut. “Ginu näle wäyile tiwän, kwämanu inulungu aläkngatä apu pahawän malikaying. Ge nä yanggä gwenkätan täke mumbä pukuwa, ulinggaxu wenä äpme tiwik,” yang yänikut.

<sup>13</sup> Tiwän wuyä äminu, “Sipgwenu ämbä tahana, kwayimune kuwik?” yake, yanggä duksäng hikngä kwayikin. Tiwändeyä yanggä gwenu yakap täku temgulu ayapmike, duksäng hikngä täku temänggawän, tahawä täke dolikut. <sup>14</sup> Tinggawän Yawele tumuk wamu using yakin. “Äminu aläpätä kupänu, manhipi kumnom. ‘Itä äminu nomän tängukaying,’ yangu manatängnimiyo, inale Gä o Yawe, gika natake pahaläk,” yake, <sup>15</sup> Jona täke yanggä gwenkätan mumbä pukukut. Tiwän yanggä gwenu duksäng hikngä täku temgulu wepdä kupitang yiwikut. <sup>16</sup> U tahawän kake, wamu kitokngä yakin using, sipde wuyä äminu Yawele naxälä hikngä natake, hikawu tänguke, ofale hawä ihikuxawän, tumuxu inikin.

<sup>17</sup> Jonä yanggä gwenkätan täke mumbä pukuwänu, Yawetä natäpän, pisu inulungu gwendutä apu Jona guläpäkut. Tiwän undan yiwixawän, täpduxu gwenälä gwendu apuxukin.

\* 1:2: Niniwe Asiliale taunu inulung hikngä gäpanggu. Asilia nanä Israel nanätäne iwanä. † 1:3: Tasisu gusitdä pukunggak käwut, tiwän Niniwe gusitdä akonggak käwut.

## 2

*Jonale tumuk*

- <sup>1</sup> Jona pisde bänipkätan yiwixäwik, tumuk wamu Anätunä Yawele <sup>2</sup> using yakut.  
 “Yawe, nä anaxälake yanggäwämba,  
 nätä natäke yakumu gätä pahakuläk.  
 Ämusing hikngä axumgin ämindä yiwixayingkätandä,  
 tumuk wamu anggatängamiläkge yäwa,  
 näle tumuxu anatäpguläk.  
<sup>3</sup> Gätä mumbi,  
 nä yanggä ämalan hikngä,  
 yanggä bänipkätan epgum.  
 Tiwän yanggätä täpän kopa,  
 gäle yanggätä täku temäke pänguhikut.  
<sup>4</sup> Tiwän using natäpgum.  
 ‘Gätä gika nomdanetä anawaläk.  
 Tiwändeyä gika takwän yotda hipdu axawit.’  
<sup>5</sup> Yanggätä täpän kopgum,  
 tiwän pälä päkakopa hakin.  
 Yanggä gäpmayi hikngä gwendä  
 tängäna täpä undä hikngä täpän kopa,  
 songäsongä yanggäne nanätä  
 kuhitna gwenu wamgin.  
<sup>6</sup> Nä täwan kemat hikngä aepgum.  
 Kepdä yämä iwikiwik yiwitde alepän kuhingamikut.  
 Tiwändeyä, Yawe Anätunatä  
 gapmayinetä käluk täkako tewi yiwikum.  
<sup>7</sup> Nina natäpa, käluk yiwitnangäsä täknga wenä tinangge tiwän,  
 Yawe, nä gäle natäke,  
 tumuxu yäwa,  
 yot takwändanetä anatäpguläk.  
<sup>8</sup> Hängä kitokngänä wenä ämindäkän kwätäluke  
 tumuxu ile tahakaying äminu uläkwäxu,  
 gwälam hikngä gätä pahangyäminggaläxu  
 maha yämikaying.  
<sup>9</sup> Tiwändeyä nä kawu gäle tayixäwik,  
 gäle uman täknga yatängenaxäwik,  
 hikawu gäle tänguke häwa ihikuwik.  
 Wamu kitokngä u yakumu  
 undä pahawit.  
 Axumnangäsä tiwändeyä,  
 Yawetäkän käluxu nipmambän yiwixamängunin,”  
 yang yakut.  
<sup>10</sup> Tiwänä Yawetä pis gwenu iniwän, täku yanggä kwayimune watutekut, Jonan.

## 3

*Jona Täkeläpäle wam gwalamikut*

- <sup>1</sup> Tiwänä Yawetä Jona hipdu using inikut. <sup>2</sup> “Gä Niniwe taunu inulung hikngä unggäpangune ku, wamu nätä ganinggalu yänitapso,” yang inikut. <sup>3</sup> Tiwän Jona Yawele wam täwake, Niniwe kukut.  
 Taunu unggäpangu inulung hikngä, ge axu wuyä une pahananggengu, täpduxu gwenalä gwendu pahanangäsä. <sup>4</sup> Ge täpduxu yakap gwenu, Jona taunu unggäpangune kopgut. Ko tihikuxäwik, using yänikut. “Täpduxu 40 apuxuwänu, Niniwe Yawetä

alahawän maliwik,” yawän <sup>5</sup> natäke, Niniwe nanä Anätule wamde bänip tike, “Naxu dohikngä nake takgä yiwitnim,” yakin. Yake äminu undä, umanä käyä äwä umanä wenä yangu meyä natäke, täwixu meyä täkngatäne palapalangänä käyä däkändäkä pahakin.

<sup>6</sup> Niniwele kingu wamu uläknganin natäke, meyä päke, sia yiwixakut däkä teke epuke, täwixu belakngä kinggäne utdopeke, täwixu meyä täkngatäne palapalangänä käyä pahake, mulup däkaxätan puku yiwikut. <sup>7</sup> Tikengä mämä wamu Niniwe nanäle kitokngä täknga yatewän kukut. Using yakut.

“Wamu aläknga nä kuhitsäle yiwixatkät, wuyä äminaxätdä using yäkamäng. Ämin äwä hikawu ämindä daying yiwixaying, inulung matekngä yang undä hängä täpätu manapä tiyok. Nak, yanggä yangu mahikngä nanong. <sup>8</sup> Ämin, hikawu ämindä towikaying yangu undä täwixu meyä täkngatäne palapalangänä käyä pahanong. Pahake äminbamu undä tumuk wamu Anätulekän kitokngä yänong. Yaxäwik wäyi hikngä täkngaläknga äwä äminsipmäk täknga yangu awenong. <sup>9</sup> Tiwän dasingga, Anätu ninde tokngä hikngä natäxu äpmembä teke, bäniyä täpän täkwämbän ‘Asipit,’ yang natäk täknga teke donihipik?” yang wamu using tewän epuxukut.

<sup>10</sup> Tiwän unin pahake wäyi hikngä täkngaläknga pahakakinu Anätutä awekinä dayipgut. Dayike, awahawän maliningge yakulu, bäniyä täpän täkwämbän, dowahawän malikin.

## 4

### *Anätutä Niniwe äminde butayä natäpgut*

<sup>1</sup> Anätutä Niniwe nanä dowahawän maliwä, “Asipnangäsä pewän yiwixaying?” yake, Jona tokngä hikngä natäpän, bäniyä däkita bimä ihikut. <sup>2</sup> Tokngä natäke, Yawele tumuk yakut. “Yawe, yotna yiwixäwixu, ‘Axu yäwa bäniyä päpä täkwämbä dosipiläxunin,’ yangu dongganikum? ile tiwän yakawu, Tasisde datäkuwitde tahakum. Nä anatäpgum, gä Anätu butayä ämin. Tokngä yupsängu donatäke, gwälam hikngä pahangyämिंगgaläxunin. Natändetdetda awäpi täkwämbä, dowahawi malikayingunin, yangun. <sup>3</sup> Ge, Yawe, tewi kungängäwa. Na käluk yiwitde donatät. Axupitde natäxat,” yang inikut. <sup>4</sup> Iniwän Yawetä inikut. “Gä tokngä inale natäxaläk?” yang inikut.

<sup>5</sup> Tiwän Jona yot gäpangu teke, gusitdä akonggak käwut päku gepmänä tahake, puku yiwixäwik, “Niniwe dasingga tiwän kawit?” yake kang yiwikut. <sup>6</sup> Tiwän Anätu Yawetä “Jona gusitdä ihiyäk,” yake, nawu kwämbätduhimu Jonale gepma imikge natäpän alakut. Tiwän Jona nawu uxwambatde täke hikngä natäpgut.

<sup>7</sup> Geyä kwepdätä gwäsi hikngä Anätutä natäpän, nawu uxwämbälu gomokgomokgä matäwän kumgut. <sup>8</sup> Ge gusitdä akoxawänu, Anätutä wawuwawungu tokngä hikngä täknga gusitdä akonggakätandä natäpän apgut. Tiwänä gusitdä Jona kuhiläne ihing-gäwän tahandambätakut. Axupikge natäke, “Nä käluk yiwitde donatät. Axupitde natäxat,” yang yakut.

<sup>9</sup> Tiwänä Anätutä inikut. “Nawu uxwämbätde tokngä inale natäxaläk?” yawänä, Jonatä yäkwäle using inikut. “Na tokngä täke natäxat. Tokngä hikngä natäke, axupitde natäxat,” yawänä, <sup>10</sup> Yawetä inikut. “Nawu axwämbälu kwepdän alakutnä, äpmanu gwäsi kungäk. Gätä doxwayikuläk. Tike uxwämbätde gä wuyä täkngatu dowahakuläk, tiwändeya gä butayä ile natäxaläk. <sup>11</sup> Äminu Niniwe nanä, hängä nomän bä gutongä yangu donatäxaying äminu 120,000 ayapmikut. Tiwän hikawu ämindä daying yiwixayingkäyä meyä hikngä. Dasingga tiwän taunu inulungu unggäpangge butayä donatäpit?” yang inikut, Anätutän.

## Wam Yäpuli

Anätule wam kende kamängu, äminu tupä hikngä nanä tiwän womduyine nanätäne kende kamäng. Hängänä täpätuyi äwä hängä u pahakakinu täkngatuyi yanggäne kendeke bulämnä natäxamäng. Ile tiwänu, wamu täkngatuyile yäpuli ane temgumäng.

Wamu ane temgumängu, ABD yäkamäng using, yakawu leta A däkäneta ku leta wasekengä Y däkäne temgumäng. Ge wamu täkngatule yäpuli natäpäläkge natäkengu, wamu uläkngale leta yakap dakanin kayo. Wamu leta A däkäneta päkutnä kakengu, leta A bulämbam däkale gepbine kayo. Tiwän wamu leta B däkäneta päkutnä kakengu, leta B bulämbam däkale gepbine kayo.

*A*

alta Alta yangu däkixoxu hupdäkän temätäke koke ofa, Anätule häkakinunin.

*Ä*

*B*

bali Bali naxu rais bimä. Sälinä päke, yamänggämimbä, flawa dakngawä, bret häkayingunin.

*D*

donggi Donggi towiyä bimä. Tiwändeyä belakngä bimä, tiwän kitokngänä käyä. Ge ämindä ulängäne hängä täpänä meyä päko peke, päke tihikukayingunin.

*E*

*F*

fik Fixu pa däkätu. Tämnä kwälängä, tiwän sälinä ämindä näkayingunin.

*G*

gupnä matäkin Kontraxu Anätuxät Abrahamkät pahakumäläk täkngale yäxäwik, wäwile yämunde gup matäkaying.

*H*

hos Hosu towiyä bimä. Tiwändeyä belakngä, tiwän kitokngänä käyä. Ge ämindä ulängäne päko yiwixäwik tihikukayingunin. Bä hosu karis wamängyämä, hosdä tulipäke tihikukayingunin.

*I*

*J*

*K*

kalis Kalisu kalbimä. Tiwändeyä hosdä tulipäke tihikukakin.

kamel Kamelu hos bimä. Tiwändeyä belakngä hikngä, tiwän kitokngänä käyä. Ge ämindä ulängäne hängä täpänä meyä päko peke, päke tihikukayingunin.

kerup Keruwu ängela bimä, tiwändeyä gupnä kälap gup bimä. Anätutä hängä takwän täpäläpä dayingyiwitningge pekut.

kis Israel nanätä kis pahakakin. Äminu täpätutä notnäle alamnä molänätä täpik. Wäwi notnä ixät nanä bänip gwälangge using pahakakin.

kontrak Kontrak yangu äminu täpäyalätä wamu täkngatukän yake, “Nä usingu äpme tahawit, tiwän gä using tahayo,” yake yatäpät kitokangaxunin. Tuwäng wamu täkngatu using. Wäwi täpätuxät mängätinäxätdä miti yolune täko, pastol äwä ämin yangge kayine “Unekän yiwihika kumsim,” yang yäkamäläk.

*L*

laion Laionu pusimbimä, tiwändeyä bulämbam hikngä, tiwän kitokngänä käyä. Kälap, ämin yang sipmäke näkayingunin.

*M*

**N**

nomän Gwaxu Anätule kayine nomänu, ofale bä anananggengu täke.

**O**

ofa Ofa yangu hängäläpä Anätule imikakin täpäläpänin.

olip Olip yangu pa uman. Ile salin pängsäpä, yanggäyi apukakin.

**P**

pris Prisu äminbamde meyä päke, ofa äwä tumuk yangu Anätule pahakakin ämin unin.

profet Profelu Anätutä “Using tiwik,’ yang yänixawän yatapmäkaying ämin unin.

**R****S**

sekel Moning bä hängäle meyä.

silwa Hängä moninggä uhikamängge bimä silwatä uhikakin.

sipsip Sipsiwu towiyä bimä, tiwändeyä dängämnämbamgän. Tiwän Israel nanätä gwakngäle äwä dängämnätä täwik pahaningge, il tiwän towikayingunin.

**T**

taunde yämä däkä “Iwanindä apu nihipnäng,” yake, yot gäpangge kwayimune dämän pahakakin. Tiwän aepuxuningge, yämä sipmäkakin. Taunde yämä däkäne, wamu inulung wopwom yiwik yäkakin.

towikngä Hängä täpä uhike, towikngä däkngakaying usinggän, hängänämbamgän ämindä äminu puyänä pahangyämningge uhike, towikngä däkngakakin.

**U****W**

wain Wainu naxu täpätu tomato bimä. Awahawä dopä, talangu däpi mapä koke, salinä meyä kwämbätkwämbät alakaying. Bulä alawä, ämindä päkapu peke, bälänggä yayinggämike, yanggäyi päke, säkge pewä yiwitäke kuhika, yanggä nomänu tiwäyä tängokayingunin.

wit Wilu rais bimä. Nak yolune pewä, wäyi dolikayingunin.

**Y**

yis Yisu flawatä täkäningge, flawane pewä, flawa täkawäyä, hängäkayinguing. Tike flawa yupsäng häningge natäkengu, yisu dowexayingunin.